

Exodus

Israel-kenh-rnem akngerrirreyel Egypt-itwek

¹⁻⁵ Awank-akerr artwamp anyent anenh, itnan ikweren Jacob, itnan ingweran ikweren Israel. Jacob-kenh alerikw anyent itnan Joseph, kel Egypt-itwek anenh arrwekel. Artwamp ra alerikw ikweren-rnem atnwen-hek, anewikw ikweren-rnem-kenh-then, arrengey-rnem-then artartey-rnem-then ingkerrenh-antey Egypt-warl-anem, 70-pel. Alerikw ikweren-rnem, Reuben, Simeon, Levi, Judah, Issachar, Zebulun, Benjamin, Dan, Naphtali, Gad, Asher.

⁶ Ingwer-inger Joseph-then awayikw ikweren-rnem-then ilwenherrek apmer Egypt-itwek. ⁷ Israel-kenhel-rnem alerikw akngerr atnyenek. Israel-kenh-rnem akngerram-akngerrirrek Egypt-ampeny-itwel.

*Egypt-areny-rnem Israel-kenh-rnem-kety
arlkarirreyel, rernem renh-rnem irrwampenh-antheyel*

⁸ Atyetyart ingwer Egypt-areny ingkern-they arrernekk, rernem renh Pharaoh itnewek. Ra akwerrp anenh, angka Joseph-kenh iterl-arey-angenh, Joseph ra arrwelarl anenh. ⁹ Ingwer-ingeran Pharaoh ikweren-rnemek apatemel angkek, “Nhak arenherr-arey, Israel-kenh-rnem! Akngerr innganem irrek! Nthakenh anwantherr irrem? ¹⁰ Ahelengkw apmer ingwer-areny-rnem apetyenty, anwenhantherr

atwekerr. Israel-kenhel-rnem apek yanh-rnem alpemilekerr, ingkerrenhel-antey anwenhantherr atwekerr! Israel-kenh-rnem apmer ingwer-warl anterrerrekerr, warrk-kety ipmelhekerr!"

¹¹ Pharaoh-el atyetyart ampep-rnem rnkernek, rernem Israel-kenh-rnem irrwampenh-anthek, rernemaw artewentyel warrkirretyek. Atyetyart ampep-rnem ahelengkw inngarl, whip-el renh-rnem atwenh. Tawen ilkwa atherr Israel-kenhel-rnem artek, itnan ikwer-atherrenh Pithom Rameses-then. Egypt-arenyel-rnem akarrilek amern akngerr ingkerrenh-antey, amern akwernek warl ilkwernem-warl. ¹² Atyetyart ampep-rnem rernem Israel-kenh-rnem atwenh intem-antey, Israel-kenhel-rnem ampa atnyenek akngerrarl. Rernem arlpimpirek apmer ingwer-rnem-warl. Egypt-areny-rnem aterirrek Israel-kenh-rnem akngerrirrekarl-kety. ¹³ Egypt-areny-rnemel irrwampenh-anthek Israel-kenh-rnem, rernem artewentyel warrkirretyek alhengkerrirrek-atwety. ¹⁴ Egypt-arenyel-rnem irrwampenh-anthek renh-rnem, rernem warlr-nem artetyek, apwert bricks mpwaremel. Rernem ahern angernek arrpemarl, amern weyt rnkerneyek lyapelhileyek. Egypt-areny-rnem amperrngirrey-angenharl ikwer-rnem.

¹⁵ Theth atherr anenh Egypt-itwel, Israel-kenh-atherr. Itnan ikwer-atherrenh Shiphrah-then Puah-then. Ratherr arelh Israel-kenh-rnem arntarnt-arenh, ampa atnyenetyek ilenh. Ingwer-inger Pharaoh-el ilanthek Shiphrah Puah-then renh-atherr, ¹⁶ "Mpwelanth

arelh Israel-kenh-itwel arntarnt-aremel anerl-ayntenherr-atherr. Awey apek atnyenentyan, atwemelarl ipmek-antey! Kwey apek atnyenenty, atwey-angenharl mentyarl.”

17 Theth atherrel Akngeyekant awelhenh, Pharaoh-ek awelhey-angenharl. Awey-rneman ratherr atwey-angenharl, menty anetyekarl.

18 Pharaoh-el warrkenh anyent thwenek, theth renh-atherr ikngwerl-alpetyek. Ra angkek ikwer-atherr-anem, “Kel atha ilek, awey yanh-rnem atwetyek! Mpwelanthan atyeng awelhey-angenharl! Mpwelanth awey-rnem iteth atnyenenh wenh!”

19 Theth atherrel tyernek, “Arelh Israel-kenh-rnem rlterrkarl, arelh Egypt-areny-rnem rlterrk-wenyarl. Arelh Israel-kenhel-rnem ampa atnyeney-angker arntety-weny, aylanth nthakenh awey-rnem atwey-angenh. Amey-rnemel kel-antey renh-rnem akngenh.” **20-21** Theth atherr inngarl Akngeyek awelhenh. Akngeyel renh-atherr arntarnt-arenh, ampa akngerr an-thek ikwer-atherr. Akngeyel ampa Israel-kenh-rnem akngerram-akngerrilek.

22 Ingwer-inger Pharaoh-el Egypt-areny-rnem ilanthek, “Arelh Israel-kenh-rnemel awey atnyenenty, kwaty lher Nile-warl iwemarl. Kwey-rnem mentyarl, awey-rnemant iwemarl, rernem ilwetyek kwaty kwenel!”

2

Moses irrkngarl ayntek Egypt-itwek

¹ Artwa anyent Israel-kenh anenh, ranap Levi-kenharl. Artwa ra kwey aleyak anewartir-rek. Arelh ra Levi-kenh arrpemarl. ² Ingweringer arelh ampakert-anem irrek, rap awey akely atnyenek-anem. Arelh ra arek, awey mwerr-angker inngarl. Ra warlek irrtyertel akwernek, Egypt-areny-rnemel aremel atwekerr. ³ Alkent irrpety-penh amikwan ywarn iterrenh alakenh, “Nthakenh atha awey akely warlek intem-antey irrtyert akwerney-angenh!” Rap rtnwa akely renh arnwarnek, ankerel apernek alyelkilemel, kwatyarl nthakenh aylpey-angenh. Ra awey akely inemel, rtnwek athenek, kwaty lher Nile-warl akngek, antywer arlpenty apenng-warl kwaty-warl. Rtnwa ampa akelyenp renh arrernek kwaty-warl, apenng-angketyarr-warl. ⁴ Angkwerelikw renh apentek ayteyikw, amikwel kwaty-warl arrernetyek. Angkwerelikw arek, kwatyek ra rnkernek, iterrek-anem, “Mwerr apek awey yanhey?” Ra arleng-they rtnwa ampa akelyenp arntarnt-arenh.

⁵ Ikwer-penh Pharaoh-kenh alerikw aleyak ilkwa ra alhek kwaty lher-warl, pwerlpirretyek. Kwaty lher impalthel ra alhenh apenng-angketyarrel, arelh warrkenh akngerrel renh apentenh. Ra alhenh, rap rtnwa renh arek kwaty-itwek apenng-angketyarr-itwek. Arelh warrkenh anyent ra ilek, “Nhak alhay inetyek!” ⁶ Kel ra inerl-alpek kwey aleyak ikwer-warl. Kel ra altywerilek, awey akely-anem ra arek. Avey akely artnek-anem. Kwey aleyak ra amperrngirrekarl ikwer. Ra alhengk-arek, rap warrkenh anyent ilek-anem, “Ay! Ampa akely nhan Israel-

kenharl!"

⁷ Angkwerikwan apetyek ayernemel, "Ay! Mwer-errang ayeng alhem apek, arelh Israel-kenh ikngwetyek, ampa akely nhenh aylpatyel anthwengileyek?"

⁸ Kwey aleyak angkek, "Ya! Kel mwerraw! Kel anamerl alhay ikngwetyek!" Angkwerekw alhek, amikw ikweren ikngwetyek. Kelanem ra ikngwerl-alpek amikw ikweren kwey aleyak-warl. ⁹ Kwey aleyakel amikw aweykenhek ilek, "Ampa nhenh aknga, aylpatyel anthwengileyek. Ampa arntarnt-arerl-aynta, atha ngenh man anthey-akenh." Kel amikw ikweren-hel renh apmer-warl akngeynek, arntarnt-arerl-ayntetyek, aylpatyel anthwengileyek.

¹⁰ Ikwer-penh ampa ra alkenhirrek, arlkwenty-iperr-anem. Amikw ikweren-hel akngeynek Pharaoh-kenh alerikw-warl, antheynek renh. Ampa akely renh ikweren-hem alkenhilek aleyak ra. Ra itnewek-anem renh Moses, alakenh anayntileyel, "Atharl weth inek kwaty-itwek."

Moses Egypt-they apmer Midian-warl irrtyertanterreyel

¹¹ Moses ilkwerrek, artwanem ra. Ingweringer ra alhek Israel-kenh warrkenh-rnem-warl, ikweren-hem-warl. Ra arek, rernemarl artewentyel warrkirrek. Egypt-areny anyent ra arek, rarl whip-el artwa Israel-kenh atwek arnterr. ¹² Moses ra artepang arelhek, ingwerentyel arekerr. Arrangkw. Ra iterrek, "Anyentaw ayeng, atha atwetyek!" Ahelengkw renh-anem atwek Moses-el, ipmek-antey ra atwek, arrewaly

renh irrkewarl akwernetyek. Rap alpek-anem apmer-warl.

¹³ Ingwepenh Moses alhek angkep irrkaty-warl Israel-kenh warrkenh-rnem-warl. Artwa Israel-kenh-atherr ra arek, ilterrenharl. Artwa anyentel ra atwek artwa anyent ingwer. Moses-el renh iltek, "Ay! Ilekekarl ntwa artwa yanhan atwek? Apmer anyent-areny-atherran innganem atwerreyel!"

¹⁴⁻¹⁵ Artwa ra tyernek, "Nganang atyetyartarl? Angwenhel-anem ngenh arrernek, nga atyetyart anwekantherr anetyek, anwenhantherr ilayntyek? Ayenh-anem ntwa atwetyek, wetharl ntwa atwek-apeny apmwerrkel?"

Atwekarl-kety Moses aterirrek. Ra iterrek, "Ilekay? Nthakenhay? Akngerrel ayenh iterl-areyelarl, atharl atwek wenh!"

Moses-arl aterel anterrekk apmer arleng-warl, apmer Midian-warl. Pharaoh-el awek-penh ra iltyemwerney-rnem ilanthek, Moses atwetyek. Iltyemwerney rernem alhek, ywarn-antey ikwer nthwenh.

Midian-ampeny-itwek Moses aney-alhek kwaty ngentyel. ¹⁶ Apmer Midian ikwerel anenh artwa anyent, itnan Jethro. INGKART-areny atyetyartarlap ran, alerikw 7-pel aleyak-rnem-akert. Kwey aleyak-rnem yep-yep-rnemek arrwekel alhenh, kwaty ngenty-warl anthwengileyek. ¹⁷ Artwa ingwer-rnem apetyek, arrngelekarl ikwer-rnem-kety, kwey aleyak-rnemel kwaty inpekerr terap-warl yep-yep-rnemek. Kwey aleyak-rnem nthakenh kwaty-warl arrererrey-angenh.

Moses-el arek, artwa rernemarl kwey aleyak-rnem aywepek. Moses ranem artwa renh-rnem aywepek. Moses-el-anem kwaty thelek terap-warl yep-yep-rnemek. ¹⁸ Kwey aleyak-rnem alperlewek akngey ikwer-rnem-kenh-warl Jethro-warl. Ra ayernek-anem, “Ay! Ilekekarl arringkerr iparrpaw apey-alpek? Ingkeny akenhel-anteyaw! Ayengan iterrek, kwaty arringkerr thelerl-anentyek-athen alerl. Arringkerr iparrparl apey-alpek!”

¹⁹ Kwey aleyakel-rnem renh tyernek, “Artwa ingwer-rnem arrngert angkekarl, kwaty yep-yep anwantherr anthwengilekerr. Artwa Egypt-arenyel aywepek renh-rnem, kwaty yep-yep anthwengiley-alkenh.”

²⁰ Jethro-el ayernek, “Nthenharl artwa ran? Ilekarl arringkerr iwerl-alhekan artwa renhan? Kel artwa renh ikngwetyek alhenherr-arey. Ra apetyetyek, amern arlkwetyek.” Kel rernem ikngwerl-alpek Moses renh.

²¹ Moses apetyek, Midian-ampeny-itwek ikwer-rnem-itwek ra anenh-anem aleth-antey. Jethro-el aler kwey aleyak anyentarl ikwer anthek. Moses-an aleyakarl ikwer arlwenthirrek-anem, itnan ikwerenh Zipporah.

²² Ingwer-inger Zipporah-el atnyenek awey akely. Moses-el renh itnewek Gershom, alakenh anayntileyel, “Ayengan apmer ingwer-arenyarl, alethangarl. Alakenharl awey renh itnewek Gershom.”

²³ Ingwer-ingeran Pharaoh weth Egypt-areny ilwek-anem. Egypt-arenyel-rnem

irrwampenh-anthenh-antey Israel-kenh-rnem, iparrp warrkirretyek. Intem-antey atwemel warrkemilemel. Israel-kenh-rnem arlek, "Akngayay! Anwenhantherr arntarnt-araw Egypt-areny-rnem-kety!"²⁴ Akngayel renh-rnem awek, ranem iterrek renh-rnem arntarnt-arayntetyek iylpelirrey-angenh, rarl arrwekeleny-rnem arrwekel alhelek-angkwarr, Abraham-then Isaac-then Jacob-then, ingkern-penh-rnem arntarnt-arayntetyek.²⁵ Akngayel Israel-kenh-rnem arek-penh, rap ikwer-rnem amperrngirrek.

3

Akngayel Moses ileyel, "Israel-kenh-rnem Egypt-they atnwenheyneyek"

¹ Moses-el arntarnt-arenh yep-yep-rnem Jethro-kenh, malyey ikwerenh-kenh. Jethro ranap apmer Midian-areny atyetyart Akngay-kenh tyatyarl anenh. Ingwer-ingeran Moses yerlirrek-anem, yep-yepel-rnem renh apentetyek nanikwet-rnem-then arlpaw intwar-ampeny-warl altwerl. Ra alhek apwert ilkewearl. Apwert ilkwa Akngay-kenh itnan Sinai.

² Akngay-kenh itna INGKARTarl. Ingwer-inger ra thwenek antyerl Moses-warl. Antyerl INGKART-kenh ikwer aremirrek arwerl apwen-itwel. Arwerl apwen ampek-anem rwa lherrm. Moses-el rwa renh arek, ampekarl lherrm. Alperr ampey-angenharlap ran, rwa lherrm arwarl!

³ Moses iterrek, "Ay! Ilekarl nhan? Alperran atherrk-anteyarl ampey-angenharl! Arrer-warl alhey, atha aretyek."

⁴ Arwerl apwen ampeyel-they INGKARTel arek, Moses-arl apetyek. Ra arlek, "Moses-ay!"

Moses-el tyernek, "Nhantey ayengaw!"

⁵ Akngey angkek, "Arleng-apeny rtnay! Pwe-tan iylwarl. Ahern nhenhan aknganent-yarl! ⁶ Ayengan Akngey rey-antey arrpemarl, arrwekeleny ngkwenh-rnemek Abraham-ek-artwey-then, Isaac-ek-artwey-then, Jacob-ek-artwey-then. Rernem ayenh apenteyel." Moses Akngey-kety aterirrek. Ranap inngerrarl artel-hek, Akngeyel renh arekerr.

⁷ INGKART angkek Moses-ek, "Atha areyelanem, Egypt-areny-rnemel Israel-kenh-rnem atyenh-rnem irrwampenh-anthenty atwemel. Atha aweyel, rernem atyengarl arlkeyel, arlka kwarnelhentyan. Ayeng amperrngerreyel-anem.

⁸ Ikwer-penh ayeng apetyek, Israel-kenh-rnem atnwenheynetyek Egypt-they. Ayeng apetyek atnwenheynetyek apmer mwerr-angker-warl, amern-angketyarr-warl, apmer atherrkeny-warl. Aleyan ingwer-rnem aneyel-antey apmer ikwer-itwel, Canaan-areny-rnem, Hitt-kenh-rnem-akerr, Amor-areny-rnem-akerr, Perizz-areny-rnem-akerr, Hiv-areny-rnem-akerr, Jebus-areny-rnem-akerr. ⁹ Ya, atha aweyel, Israel-kenh-rnem arlkeyelarl. Atha iterl-areyel, Egypt-areny-rnemelarl renh-rnem irrwampenh-anthemel atwenh. ¹⁰ Alakenh atha ngenh thwenem Pharaoh-warl, ntwa renh alakenh iletyek, 'Atha atnwenheynetyek Israel-kenh-rnem Egypt-they apmer ingwer-warl.' Kel iparrp alhay!"

¹¹ Moses apatemel ilelhek Akngeyek, "Ayengan arrangkwarl, mwerr-wenyarl.

Artwa apmwammaw ayengan, atyetyart-weny. Atyetyart Pharaoh atyetyart awelhey-angenharl. Nthakenh atha Israel-kenh-rnem Egypt-they atnwenheyney-angenh!"

12 Akngeyel Moses ilek, "Ayeng alhey ngkweng-angkwarr Pharaoh-warl ilkwatherr. Ntwa atyenh-rnem Egypt-they atnwenhenty, renh-rnem ntwa atnwenhey-alpetyek apwert nhenh-warl. Arrantherr ayenh awetyek apwertek, atyeng aker tyenkerr arrtyetyek, atyeng array inkwerelhetyek. Ntwa ayenh iterl-aryntetyek innga, atharl ngenh ileyel-angkwarr."

13 Moses-el Akngey ayernek-anem, "Ayeng ikwer-rnem-warl alhenty, alakenh ayeng angkenty, 'Akngey rey-anteyarl ayenh angkakert thwenek arrekantherr-warl, Akngey weth arrwekeleny-rnemel awank-akerr apenten.' Rernem irrpelthirremel ayernekerr, 'Angwenhel ngenh thwenek? Ilek-apenyarl ran wenh, itnan ilekarl ra?' Nthakenh atha iley-alhem?"

14 Akngey itnewelhek-anem, "Itnan ayeng Yaway, alakenh anayntileyl, 'AYENGARLAP ALETHARL ANEYEL'. Ntwa Israel-kenh-rnem ila, 'Yanhey-antey, rarl ayenh thwenek.'

15 Akngey Moses-ek angkek arrpemarl, "Ntwa Israel-kenh-rnemek angka atyenh ila." Ikwerpenh Moses Israel-kenh-rnem-warl iley-alhek, "Akngeyarl rey-antey arrpemarl, arrwekeleny-rnemel arrwel renh apentek, Abraham-then Isaac-then Jacob-then. Rey-antey ayenh thwenek arrekantherr-warl. INGKARTarl itnan ikwerenh wenh intem-antey. Nhepenh-anyem arrantherr renh INGKARTarl itnewem, aler

arrekantherrenh-rnem-then arrengey-rnem-
then artartey-rnem-then."

16-18 Akngey Moses-warl angkek arrpemarl, "Artwamp weth-rnem Israel-kenh-rnem ntwa ikngwerl-alpa, angka atyenih ilemel. Rernem arternp ngkweng awelhetyek." Kel Moses-el artwamp-rnem ikngwerl-alpek ilemel, "Akngey rey-antey arrpemarl, arrwekeleny-rnemel arrwel renh apentek, Abraham-then Isaac-then Jacob-then. Itnan ikwerenh INGKARTarl. Rey-antey atyeng iylparrernalhekk, angkemel, 'Atha arek, Egypt-areny-rnemel arrenhantherr irrwampenh-anthenh atwerlanemel. Atha alakenh alhelek, atha Egypt-they arrenhantherrenh atnwenhey-alpetyek atweyelarl-kety. Atha atnwenhey-alpetyek apmer mwerr-warl amern-angketyarr-warl. Aley-anem artwa ingwer-rnem nhak aneyel, Canaan-areny-rnem, Hitt-kenh-rnem-akerr, Amor-areny-rnem-akerr, Perizz-areny-rnem-akerr, Hiv-areny-rnem-akerr, Jebus-areny-rnem-akerr. Arrekantherr atha anthetyek apmer renh.'

Arrantherr Pharaoh-warl alhenherr-arey. Ilenherr-arey ikwer alakenh, Anwantherr Israel-kenh-rnem Akngey anwekantherrenh apenteyel-rnem. Itnan ikwerenh INGKARTarl. Ra iylparrernalhekk anwekantherr-warl. Anwantherr arlpaw-warl alhetyek irrpety-ingerek-atwety, aker tyenkerr arrtyemel anthetyek INGKARTek, Akngey anwekantherrenhek, ikwer inkwerelhemel. Mwerrang anwantherr alhem wenh?' Alakenh

ntwa artwampel-rnem-then ilenherr-arey Pharaoh-ek. ¹⁹ Pharaoh weth, ra ngkweng awelhey-angenharl arrangkwarl. Atha renh arawerrng rlterrkell attwenty-penant, ra ngkweng awelhetyek, arrenhantherr tyarlewetyek. ²⁰ Atha Egypt-areny-rnem arawerrng ilkwakertel atweyen akngerr-inger. Rernem atyengety aterirreyen. Ikwer-penant Pharaoh-el arrenhantherr tyarleweyen. ²¹ Yew, Egypt-areny-rnem aterirreyen ngkwengety Israel-kenh-rnem-kety-then. Arrantherr alperlewenty Egypt-they, Egypt-areny-rnemel ilek-ilek akngerr anthem arrekantherr. ²² Arrantherr alperlewentyel, arelh Israel-kenh-rneman rernem ayernetyek arelh Egypt-areny-rnem arnkwerperek, nikelithek, iltiek-arelhek, ampwal ingkerrenhek gold-penh thilp-penh. Arelh-rnem Egypt-areny-rnemel anthetyek ilek-ilek. Arrantherr antheyen arrpemarl ampermem arrekantherrenhek. Alakenh Israel-kenhel-rnem ilek-ilek akngerr ineyen Egypt-areny-rnem-they." Alakenh angkek Akngay Moses-ek.

4

INGKARTel Moses rlterrkileyel

¹ Moses angkek Akngayek, "Israel-kenh-rnem irrpeltherrekerr, atyeng awelhey-angenharl. Rernem atyeng angkekerr alakenh, 'INGKART ngkweng aremirrey-angen-hantey!'"

² INGKART-el ayernek Moses, "Ilekarl yanhan ntwu antwerrkeyel iltielan?"

Moses-el tyernek, "Irretetyarl wenh nhenhan."

³ INGKART angkek, "Iwa yanh ahern-warl." Kel ra iwek. Ra rtnwem irrekarl. Moses aterel anterrek rtnwem ikwerety. ⁴ INGKART angkek, "Kanty-they inay!" Kel Moses-el inek kanty-they, ranap irrertety-anem irrek arrpemarl. ⁵ INGKART angkek, "Israel-kenh-rnem-warl alhentyel, irrertety yanhap iwa ahern-warl, ikwer-rnem iylparrernemel wetharl ntwa iwek-apeny. Rtnwem irrenty, kanty-they ina arrpemarl, irrertetyarl irreyen h weth-apenyarl. Rernem arentyel, rernem ayenh iterl-arem-anem. Ntwa ila ikwer-rnem, 'Akngay reyantey arrwekeleny-rnemel apentek, Abraham-el-then Isaac-el-then Jacob-el-then, itnan ikwerenh INGKART, ra aremirrek atyeng.' "

⁶ INGKART angkek Moses-ek arrpemarl, "Iltya aylpa arnkwa kwen-apeny-warl." Kel Moses iltya aylpa kwen-apeny-warl. Kel iltya tyerrelhek, iltya tywen-angketyarr-anem arelhek. ⁷ Akngay angkek ikwer, "Iltya angkep aylpa arrpemarl arnkewarl." Kel ra tyerrelhek arrpemarl, iltya ra arelhek, tywen-weny-anemarl.

⁸ INGKART angkek ikwer, "Ntwa apek Israel-kenh-rnemek iylparrernetyek irrertety renh iwemel, rtnwem irrenty aretyek, rernem irrpeltherreyelarl-kety. Ntwa iltya tyerrem, ikwer-rnem lwewarrernetyek tywen-angketyarr-anem, alakenh-angkwarr rernem ayenh iterl-aretyek ayengarl rlterrk inngan, Rernem angkeyel, 'Arraty inngip Moses angkeyel!' ⁹ Rernem apek iterl-arey-angenh-antey arrangkw-antey, kwaty inpa kwaty

Iher Nile-itwek, ahern-warl thelemel, rernem aretyek. Arrnganem ra irrem."

¹⁰ Moses-arl INGKARTek awelhey-angenh ny-errerenharl. Moses angkek-anem, "INGKARTay! Ayeng aleny apekap anenh ampa akelyank, arternp-antey ayeng angkem. Nga aremir-rek atyeng-warl, ayeng aleny apekap-antey arrangkw-antey, ntwa ayenh mwerreley-areny!"

¹¹ INGKART angkek ikwer, "Ayengan INGKARTarl, ilek-ilek mpwarey-angker. Atha ngenh rlterrk angketyek mpwarey-angker ilek-ilek-angkwarr. Ayengan rlterrkarl, atha artwa arwengk mpwarey-angker, avey-angenheletyek. Atha artwa akater mpwarey-angker. Atha artwa arey-angenheley-angker aparrng mpwarey-angker. Artwa apek aparrng anenty, atha renh aretyek mpwarey-angker. ¹² Nga ilelhey-angenh atyeng, aleny apmwa, nga angkey-angenh-arrpantey. Israel-kenh-rnem-warl alha! Ayeng alhem ngkweng-angkwarr, athap ngenh rlterrkilem. Atharl ileman, nga angketyek."

¹³ Moses ranap awelhey-angenh-antey Akngeyek. Ra angkek, "INGKARTay, mentyaw! Ayenh ilanthey-angenh! Ingwer apek ilanthay wenh!"

¹⁴ INGKART ahelerrek Moses-ek, ra angkek-anem, "Yaw! Awayengkw ngkwenh Aaron-alew? Ranap Levi-kenh arrpemarl. Atha renh ilanthem ngkweng-angkwarr alhetyek. Angka rlterrk-akertarlap ran. Aaron-el ngenh arentyel, rap irrngeyarl irreman. ¹⁵⁻¹⁶ Atha mpwelenh alpemelemel-ayntey, akalty-anthetyek mwerr-angkwarr. Atha ngenh atyetyart arrernek Aaron-

ek. Atha ngenh ilem-tangkwel, ntwap Aaron iletyek. Aaron katy angketyek Israel-kenh-rnem ingkerrek, ayeng arlkwenteyel-angkwarr. **17** Irretety-akert alpa Egypt-warl. Ingwer-inger atha ilenty, arawerrng rlterrkel ntwa mpwaretyek irrertetyel, rernem ngenh iterl-aretyek, nga arawerrng rlterrak atyenh-akert.”

Moses Egypt-warl alpeyel

18-19 Moses Midian-itwek irrpety-inger arwa ra anenh. INGKART ikwer angkek, “Alpay Egypt-warl. Artwa weth-rnem, ngenharl atwetyek-anek-rnem, rernem kel ilwenherrek ingkerr.”

Moses alpek malyeyikw-warl Jethro-warl. Ra angkek, “Malyeyay! Mwerrang ayeng alpemay apmer Egypt-warl? Atyenh-rnem atha aretyek wenh, mwerrang rernem aneyel.”

Jethro-el renh tyernek, “Mwerraw! Kel alpay! Akngeyel arrenhantherr arntarnt-arem.”

20 Kel Moses-el tywenek anewikw alerikw-atherr tangkey-warl. Ran ingketyel alpek, tangkeyel anewikw ikwerenh ampa-atherr akngeynek. Moses Akngey-kenh irrertety-akert alhenh, arawerrng rlterrak-akert.

21 INGKART angkek Moses-warl, “Nga Egypt-warl alhenty, ngap atyeng awelha ikwer-itwel, ayengarl ngkweng angkem. Irretetyel ilek-ilek mpwara arawerrng rlterrkel, Pharaoh-el ayenh iterl-aretyek, ayengarl rlterrak inngan. Atha renh arwengkileyen, ngkweng awelhey-angenhanem ra irretetyek, awerrarl. Israel-kenh-rnem nthakenh ra tyarlewey-angen, Egypt-they.

22 Ra arrngert angkenty, renh ila, ‘Alakenh

INGKART ngkweng angkenty, "Pharaoh, nga alerengkw ilkwek artewentyel ilkelheyel. Israel-kenh-rnemek ayeng artewentyel ilkelheyel irrkaty-angkwarr, rernem aleraty-rnem. ²³ Tyarlewa renh-rnem Egypt-they, rerneman aker tyenkerr atyeng ampernemel anthetyek, atyeng inkwerelhetyek. Ntwa Israel-kenh-rnem antwerrkenty, alerengkw arrwekelely ngkwenh atha atwem ipmek-antey." 'Alakenh ila Pharaoh-ek." ...

²⁷ Ikwer-penh Moses alpek Egypt-warl anewikw ikwerenh-akert alerikw atherr-akert. Moses ampepel-antey alpenh, INGKART angkek Aaron-ek awayikw ikwerenhek, "Arlpaw-warl-anem alha, Moses rlwatetyek." Ra alhek arlpaw-warl, Moses rlwatetyek. Ampepel-anem ra alhek, rap Moses renh arek-anem apwert Akngey-kenh-itwek, apwert itnan Sinai. Ra apetyek, Moses renh antwerrkemel arrwantyek. ²⁸ Moses-el Aaron ilek, "INGKARTarl angkek atyeng arrwekelarl." Aaron-ek irrertety renh lwewarrernek. Moses angkek Aaron-ek, "INGKARTel ilek, irrertety renh lwewarrernetylek Israel-kenh-rnemek, rernem aylenh iterl-aretyek, INGKARTelarl aylenh thwenek arawerrng rlterrk-akert."

²⁹ Ingwer-inger Moses-atherr Aaron-atherr alpek Egypt-warl. Kel ikwer-they Ratherr artwamp-rnem akarrilek, Israel-kenh-rnem. ³⁰ Aaron-el ilek Israel-kenh-rnem, INGKARTarl Moses-ek angkek arrwekel. Moses-el irrertety renh iwek. Rernem arek, angkek-anem, "Ay! Rtnwem-anemarlap irrertety nhan!" Ra

kanty-they inek arrpemarl ikwer-rnem, rap irrertety arrpemarl irrenhey-alpek, rernem aremel. Ra iltya arnkewarl akwernek, kel tyerrelhemel iltya tywen-angketyarr. Angkep arrpemarl iltya renh akwernek arnkewarl, kel ra tyerrelhemel arrpemarl, mwerr-anemarl irrek. ³¹ Israel-kenh-rnemel arekel, rernem iterl-arek, INGKARTelarl Moses thwenek, arawerrng rlterrk-akertel. Rernem angkerrenh, “INGKART iterrek anwekantherr. Ranap anwenhantherr ipmey-angenharl, anwenhantherr arntarnt-areyel-antey. INGKARTel anwenhantherr arek, Egypt-arenyel-rnem irrwampenh-anthenh atwemel.” Rernem kwenirrek-anem INGKARTek, inkwerelhek-anem ikwer.

5

Moses-then Aaron-then ratherr Pharaoh-warl alheyel, ikwer angketyek

¹ Ikwer-penh Moses-then Aaron-then Pharaoh-warl alhek, ratherrap angkek, “Anwernantherr Israel-kenhel-rnem apentem INGKART renh, Akngey anwekantherrenh. INGKARTel ngenh ilem alakenh, ‘Arrngert angkey-angenh Israel-kenh-rnemek. Tyarlewetyek renh-rnem, rernem alhetyek apmer arlpaw ikwer-warl. Kwenty rernem arlkwetyek, aker tyenkerr atyeng anthemel!’ ”

² Pharaoh arrkngert angkek, “Ay! Angwenharlap ran? Athan INGKART iterl-arey-angenharl! Ayengan ikwer awelhey-angenharl! Athan Israel-kenh-rnem tyarlewetye-angenharl, arlpaw-warl alhetyek, arrangkwarl!”

³ Aaron-atherr Moses-atherr ratherr angkek ikwer, “Akngay weth anwernantherr apentem, ra anwernenhantherr ilek, arlpaw-warl alhetyek arlta irrpety-ingerek-atwety. Arlpaw ikwerel aker tyenkerr arrtyemel anthetyek Akngay anwernekantherrenh, itnan INGKARTarl. Ntwa apek anwernekantherr arrngert angkenty, INGKARTel anwenhantherr arntety anthekerr, anwenhantherr ipmek atwekerr!”

⁴⁻⁵ Pharaoh angkek-anem Moses ikwer-atherr, “Ilek-kety mpwel Israel-kenh-rneman warrkety akngem wenh? Warrkan impenarl! Rernem akngerrarl! Warrk-kety mpwel arrkngert angkeyel! Iley-alpenherr-atherr ikwer-rnem-warl, ‘Arrantherr warrkorr-ayntetyek!’ ”

⁶ Israel-kenhel-rnem bricks akngerr mpwarenh itwern arrpanenhel, warl-rnem artetyek. Egypt-arenyel-rnem arrwekel Israel-kenh ingwer-rnem rlwanek, atyetyart akely-rnem anayntetyek Israel-kenh warrkenh-rnemek. Ingwer-inger Pharaoh atyetyart-rnemek angkek, Egypt-areny-rnemek, Israel-kenh-rnemek. ⁷⁻⁸ “Israel-kenh-rnem rernem alhengkerirrek warrk ilkwekety. Rernem arlkarirrek, bricks akngerr mpwarekerr menty. Warrk-kety-anem rernem arlkarerreyel, warrkety ipmelhetyek-anem. Alakenh rernem ayenh ayerneyel, ‘Anwernantherr arlpaw-warl alhetyek, aker tyenkerr arrtyemel anthetyek Akngay anwekantherrenhek.’ Israel-kenh-rnemek ayeng awelhey-angenharl. Arrantherr anthenh Israel-kenh-rnem atherrk arleny, bricks mpwaretyek. Nhepenh-anyem arrantherr

atherrk arleny anthey-anghen-anem, mentyanem. Ilenherr-arey Israel-kenh-rnem, ‘Atherrk arlenyek ament nthweynetyek, bricks mpwaretyek. Wetharl akngerr mpwarenhapeny, alakenh mpwaretyek!’ Bricks irrpetyap apek rernem mpwarenty alhengkerrel, renhnem iltenherr-arey alhengkerrerrentyan.

⁹ Irrwampenh-anthenherr-arey arnterr warrkirretyek! Alakenh iletyek, ‘Ipmelheyangenh warrkirretyek!’ Rernem apek arnterr intem warrkirrenty, rernem awey-angenh angka Moses-kenh, Moses ra irrtywerrentyarl.” Alakenh Pharaoh angkek atyetyart ampep ikwerenh-rnemek-then atyetyart akely-rnemek-then.

¹⁰ Ikwer-penh rernem Israel-kenh-rnem-warl alhek, renh-rnem ilek, “Pharaoh-el anwernenhantherr ilanthek, atherrk arleny arrenhantherr anthey-angenh, bricks mpwaretyek. ¹¹ Ra ilanthek arrpemarl, arrantherr atherrk arleny nthwemel akwetyetyek. Alhengkerrerrey-angenh warrkirretyek. Wetharl akngerr mpwarenhapeny, alakenh mpwaretyek!” ¹² Ikwer-penh Israel-kenh-rnem alhek apmer arrpanenh-warl, atherrk arleny akwetyetyek, bricks mpwaretyek. ¹³ Egypt-arenyel-rnem renh-rnem irrwampenh-anthek, arnterr warrkirretyek. Rernem ilek, “Iparrp warrkirrenherr-areyay! Warrkirretyek wetharl arrantherr awank warrkirrek-apeny, bricks akngerr mpwaremel.” Ikwer-penh Israel-kenhel-rnem bricks akngerr mpwarey-angenh, arrangkw. Atherrk arleny akelyarl akwetyek, bricks irrpetyapant mpwarek. ¹⁴ Ahelengkw-

rnemel atyetyart Israel-kenh-rnem ilek, "Rernem lyert apmwerrkel-then alhengkerrekan, akely mpwarek!" Rernem atyetyart Israel-kenh-rnem irrwampenh-anthek atwemel. Rernem ayernek-anem, "Ilek arrantherr warrk-kety ipmelhek-anem? Irrpetyap-anem arwa rernem mpwarek, akngerr-weny-anem?"

¹⁵ Atyetyart Israel-kenhel-rnem Pharaoh renh ayerney-alhek, "Irrepern anwernantherr! Ilekekarl nga ahelerrekan anwernekantherr? Anwernantherr warrkenh-rnemarl ngkwenh. Ilekekarl atyetyart Egypt-areny-rnemel anwernenhantherr atweyelan? ¹⁶ Ntwa ilek atyetyart ngkwenh-rnem, atherrk arleny anwernenhantherr anthey-angenh, bricks mpwaretyek. Anwernantherr bricks irrpetyap mpwarek, akngerr-weny, atherrkek arrangkwarl. Rernem ahelerrek, anwernenhantherr atwek. Ahelerrey-angenh anwernekantherr! Atyetyart ampep ngkwenh-rnemek ahelerra!"

¹⁷ Pharaoh angkek, "Arrantherran alhengkerr-rnemarl wenh! Arlkarerreyel warrk-kety! Alak-enh arrantherr ayenh arlkareweyel intem-antey, arlpaw-warl alhetyek, aker tyenkerr arrtyemel anthetyek INGKARTek. ¹⁸ Kel iparrp alpenherr-arey warrk-warl! Atherrk anthey-angenh-kety anemarl atha! Mpwarenherr-arey bricks akngerr arrantherr arrwekel mpwarek-apeny!"

¹⁹ Atyetyart Israel-kenh-rnemel awek Pharaoh angkek, rernemap angkerrek, "Nthakenh irreyay! Irrpetyapant mpwarenty anwantherr, atyetyart Egypt-arenyel-rnem anwenhantherr

atwem!" ²⁰ Ikwer-penh rernem warl Pharaoh-kenh-they tyerrelhek, Moses-atherr Aaron-atherr arey-alhek. Moses-atherr Aaron-atherr ikwer-rnem mpwelhenh. ²¹ Rernem renh-atherr iltek. "INGKARTel mpwelenh atwey-areny! Pharaoh-then atyetyart ampep-rnem-then ahelerrek anwernekantherr, mpwelarl arlpaw-warl alhetyek ayernek-kety! Mpwel ayernek Pharaoh, anwenhantherr arlpaw-warl tyarlewetyek. Alakenhan rernem anwernenhantherr ipmek atwetyek!"

²² Moses ranem ament-anem alhek INGKART-warl angketyek. Ra ayernek, "INGKARTay! Ilekek ntwa atweyelan anwernenhantherr irrwampenh-anthemel nhek Egypt-itwek? Anwernenhantherr ngkwenharl! Ilekek ntwa pwarrk ilkwa anthek atyenh-rnemek? Ilekek ntwa ayenh thwenek Egypt-warl? Arrangkwek. ²³ Ntwa ayenh ilanthek, ayeng Pharaoh-warl alhetyek. Kel ayeng alhek, angka ngkwenh ilek. Alakenh ra ahelerrek ngkwenh-rnemek, renh-rnem atwek irrwampenh-anthemel. Ilekekan ntwa anwernenhantherr arntarnt-arey-angenhan?"

6

¹ INGKART angkek Moses-ek, "Ntwa ayenh areyenh, atharl Pharaoh arrkngert antwer-rkeyenh, ra Israel-kenh-rnem nthakenh atwey-angenh. Pharaoh renh atha atweyenh arawer-rng rlterkel. Ikwer-penh ra Israel-kenh-rnem irrenteyenh-anem, rernem alhetyek apmer arlpaw-warl."

² Akngey angkek Moses-ek, "Ayengan INGKARTarl. ³ Arrwel ayeng aremirrek Abraham-ek, Isaac-ek-then, Jacob-ek-then. Rernem iterlarenhant itnan ayenh El Shaddai, Akngey rlterrk innga. Rernem itna ayenh INGKART iterl-arey-angenharl. ⁴ Atha renh-rnem alhelek, ingwer-inger apmer Canaan renh-rnem anthetyek. Rernem anenh apmer Canaan-el, apmeran ingwer-rnem-kenharlap, rerneman apmerek-artwey-wenyarl, alethangarl. ⁵ Israel-kenh-rnem artnenh, Egypt-areny-rnemel renh-rnem atwekarl. Rernem iterreyek-athen, atha artnekarl awey-angenh. Israel-kenh-rnem artnekarl atha awek. Ayeng atyenh-rnemek iylpelerrey-angenh, atharl arrwekeleny-rnem alhelek, apmer renh anthetyek ikwer-rnem."

⁶⁻⁹ Akngey Moses-ek angkek, "Alha, Israel-kenh-rnem ileyek angka atyenh." Kel Moses alhek Israel-kenh-rnem-warl, ilek-anem, "Alakenh Akngeyel arrekantherr ileyel. Ran INGKARTarl. Ra Egypt-areny-rnem arrngert antwerketyek, rernemarl nthakenh arrenhantherr irrwampenh-anthekerr atwekerr. Arrantherr warrkirrey-angenh anem menty Egypt-areny-rnemek. Ra atnwenhetyek arrenhantherr Egypt-areny-rnem-kety arawerrng rlterkel. Egypt-areny-rnem ra irrwampenh-anthem atwemel. Arrantherr ikwerenh-rnem aneyenh-anem, ra Akngey arrekantherrenh aneyenh. Arrantherr renh iterl-areyenh-anem, ra Akngey arrekantherrenh, itnan INGKART. Akngey irrkatyel tyarlewek arrenhantherrenh Egypt-areny-rnem-kety atwemarl-kety. Ra arrenhantherr at-

nwenhem apmer weth-warl, arrwekel wetharl ra arrwekeleny-rnem alhelek apmer renh anthetyek, Abraham-then Isaac-then Jacob-then. Apmer renh ra anthem arrekantherr. Apmerek-artwey-rnem arrantherr aneman. Ran INGKARTarl.” Moses-el alakenh Israel-kenh-rnemek ilek. Moses ikwer rernem awelhey-angenharl irpeltherrenharl, rernemarl aterirrek ahelengkw Egypt-areny-rnem-kety.

10-11 INGKART angkek Moses-ek, “Pharaoh iletyek alhay, Israel-kenh-rnem tyarlewetyek Egypt-they, arrkngert angkey-angenh!”

12 Moses angkek INGKART-warl, “Israel-kenh-rneman atyeng awelhey-angenharl! Pharaoh atyeng awelhey-angenh arrpemarl! Ayeng aleny apekaparl, nthakenh ayeng mwerr angkey-angenh. Pharaoh atyeng awelhey-angengan.”

13 INGKARTel akalty-anthek Moses-atherr Aaron-atherr Israel-kenh-rnem-then, nthakenh mwerr-angkwarr Pharaoh-ek angketyek. Ra ilek renh-atherr, ratherr Israel-kenh-rnem Egypt-they atnwenheyetyek.

Nhenh-rnem arrwekeleny-rnem Aaron-kenh anenh

14 Israel-kenh-rnem akngerr anew-anenh. Nhenh-rnem itnernem alakenh: Jacob itna ingweran Israel, alerikw ilkwa ikwerenitnan Reuben. Reuben-kenh alerikw awey-rnem 4-pel, itnan Hanoch-then, Pallu-then, Hezron-then Carmi-then. Avey rernem alkenhirrek. Alerikw akngerr arrengey akngerr-then apetyek ikwer-rnem-they. Nhenh-rnem Reuben-kenh-rnem.

¹⁵ Alerikw ingwer Israel-kenh itnan Simeon. Simeon-kenh alerikw awey-rnem 6-pel, itnan Jemuel, Jamin, Ohad, Jakin, Zohar, Shaul. Shaul-kenh amikw Canaan-areny. Awey rernem alken-hirrek. Alerikw akngerr arrengey akngerr-then apetyek ikwer-rnem-they. Nhenh-rnem Simeon-kenh-rnem.

¹⁶ Alerikw ingwer Israel-kenh itnan Levi. Levi anek aherrety 137-ek-atwety. Levi-kenh alerikw awey-rnem irrpety, itnan Gershon, Kohath, Merari.

¹⁷ Gershon-kenh alerikw awey atherr, itnan Libni-then Shimei-then.

¹⁸ Kohath anek aherrety 133-ek-atwety. Kohath-kenh alerikw awey-rnem 4-pel, itnan Amram, Izhar, Hebron, Uzziel.

¹⁹ Merari-kenh alerikw awey atherr Mahli-then Mushi-then.

Alerikw akngerr arrengey akngerr-then apetyek ikwer-rnem-they. Nhenh-rnem Levi-kenh-rnem. Rernem ilelhek Levi-kenh-rnem.

²⁰ Artwa weth Amram anewarterrek awenhik-wek, itnan Jochebed. Jochebed-el awey atherr atnyenek, Aaron-atherr Moses-atherr. Amram anenh aherrety 137-ek-atwety.

²¹ Artwa weth Izhar, alerikw awey-rnem ikweren irrpety anenh, itnan Korah, Nepheg, Zicri.

²² Artwa weth Uzziel, alerikw awey-rnem ikweren irrpety anenh, itnan Mishael, Elzaphan, Sithri.

²³ Artwa weth Aaron anewarterrek Elisheba-ek. Elisheba alerikw kwey Amminadab-kenh anek, angkwerikw Nahshon-kenh. Elisheba-el

ampa 4-pel atnyenek, Nadab, Abihu, Eleazar, Ithamar.

²⁴ Artwa weth Korah, alerikw awey-rnem irrpety ikwerenh anenh, itnan Assir, Elkanah, Abiasaph. Awey rernem alkenhirrek. Alerikw akngerr arrengey akngerr-then apetyek ikwerrnem-they. Nhenh-rnem Korah-kenh-rnem.

²⁵ Aaron-kenh alerikw Eleazar anewarterrek arelhek. Arelh-kenh aynikw itnan Putiel. Ratherr awey akely atnyenek itnan Phinehas.

Nhenh-rnem arrwekeleny-rnem Levi-kenh-rnem-kenharl.

²⁶⁻²⁷ Awayenheng-atherr Aaron-then Moses-then irrkaty-atherr, INGKARTelarl arrwekel ilek, "Israel-kenh-rnem atnwenhenherr-atherr Egypt-they arlpaw-warl." Innga ratherr Pharaoh ilek, Israel-kenh-rnem tyarlewetyek, rernem Egypt-they alpetyek.

Aaron ra rliterrk angkey-angker

²⁸⁻²⁹ Arrwekel-antey INGKART ra angkek Moses-warl Egypt-itwek alakenh, "Ayengan INGKARTan. Pharaoh renh ila ingkerrehn atha ngenh arrwekel ilek-angkwarr."

³⁰ Moses angkek INGKARTek, "Ayengan aleny apekaparl, nthakenh ayeng mwerr angkey-angenh. Pharaoh atyeng awelhey-angenhan."

7

¹ Ikwer-penh INGKART angkek Moses-ek, "Aray! Atha ngenh atyetyart arrernek Pharaoh-ek. Atha ngenh ilem-tangkwel, ntwap Aaron ileytyek. Atha awayengkw ngkwenh Aaron

arrernek arrpemarl, angkey-angker katy ngkweng angkayntetyek. Aaron katy angketyek, ayeng Akngeyarl arlkwenteyel-angkwarr. Ra Pharaoh iletyek, alakenh ra awelh-ayntetyek.

² Awayengkw ngkwenh ila, ra Pharaoh renh iletyek, atharl ngenh ilek-angkwarr. Alakenh-anyem Aaron ra Pharaoh-ek iletyek, 'Arrngert angkey-angenh Israel-kenh-rnemek. Tyarlewa, Egypt-they rernem alperlewetyek.' " ³ INGKART angkek Moses-ek, "Atha Pharaoh arwengkiletyek, ra awelhey-angenh anayntetyek. Ingwer-inger ayeng Egypt-areny-rnemek aremirreyenh arawerrng rlterrk-akert. ⁴ Pharaoh ra awerrantey anayntetyek. Ra mpwelek awelhey-angenh aneyenh. Ingwer-inger atha Egypt-areny-rnem atwetyek. Ikwer-penh atha Israel-kenh-rnem atnwenheynem Egypt-they arawerrng rlterrk-akertel. ⁵ Egypt-areny-rnemel ayenh iterl-areyenh, ayeng INGKART inngarl." Alakenh angkek INGKART Moses-ek. ⁶ INGKARTel Moses-ek-atherr Aaron-ek-atherr alakenh ilek, ratherr angka irrkaty-antey INGKART-kenh iley-alhek Pharaoh-warl. ⁷ Moses-atherr artwamp atherranem ratherr irrek-anem. Moses-an aherrety 80-pel-anem irrek alyepelarl, Aaron-an aherrety 83-pel-anem ra irrek.

Irretety Aaron-kenh rtnwem-anem irreyel

⁸⁻⁹ Ikwer-penh INGKART angkek Moses-ek-atherr Aaron-ek-atherr, "Mpwel alhenty Pharaoh-warl, ra mpwelenh alakenh iley-ayntenty, 'Mwerr-angker mpwaretyek

arawerrng rlterrk-akertel, atha renh iterlaretyek, INGKARTel inngelarl mpwelenh thwenek!' Moses, Pharaoh-el ngenh ra ileyayntenty alakenh, ntwa ila Aaron alakenh, 'Irretety renh iwetyek Pharaoh arrwekelampeny-itwek. Irretety ra rtnwem-anem irretyek.' "

¹⁰ Moses-atherr Aaron-atherr kel ratherr alhek Pharaoh-warl-anem. Rap ilek-anem renhatherr, "Mwerr-angker mpwaretyek arawerrng rlterrk, atha aretyek." Aaron ra irrertety renh iwek Pharaoh-warl arrwekel-ampeny-itwek, ra warrkenh ikwerenhel-rnem-then aretyek. Irretety rap rtnwem-anem irrek.

¹¹ Pharaoh ra warrkenh anyent ikwerenh thwenek, artwa akalty-rnem-then ngangker-akert-rnem-then ikngwerl-alpetyek. Rernem rtnwem mpwarek arrpemarl ikwer-rnem-kenhangkwarr. ¹² Rernem irrertety renh iwek ahern-warl-anem arrpemarl, irrertety rernem rtnwem-anem irrek ingkerrenh-antey. Rtnwem Aaron-kenhel rtnwem ingwer-rnem kwernek ingkerrenh-antey. ¹³ Pharaoh ran awerr-antey anenh. Nthakenh Moses-ek-atherr Aaron-ek-atherr ra awelhey-angenh. Alakenh INGKART arrwekel-antey angkek Moses-ek, Pharaoh rarl awerr-antey aneyenh.

Moses-el-atherr lher Nile-itwek kwatyan arrnganem mpwareyel

¹⁴ Ikwer-penh INGKART angkek Moses-ek, "Pharaoh ra anerl-ayntetyek awerr-antey. Ra

Israel-kenh-rnem Egypt-they tyarlewey-angenhanterey. ¹⁵ Ingwepenh nga alha kwaty lher Nile-warl, kwaty impalth-itwek rtnay. Irretety weth akngemel. Nga mpwelha Pharaoh-ek, ra kwaty lher-warl apetyentyek, pwerlpiretyek. ¹⁶⁻¹⁷ Ra apetyenty, angka atyen ikwer ila.” Ingwepenh Moses-then Aaron-then alhek kwaty lher Nile-warl, Pharaoh-ek mpwelhetyek. Pharaoh warrenh-rnem-then apetyek, INGKARTelarl ilek-angkwarr. Moses-el Pharaoh ilek, “INGKART ra Akngey aneyel Israel-kenh-rnemek. Rap ayenh thwenek, ngkweng-warl iletyek. Alakenh ra ngenh ileyel, ‘Arrngert angkey-angenh atyen-h-rnemek, rernem alhetyek arlpaw-warl. Rernem aker tyenkerr arlpaw-itwek atyeng arrtyemel an-thetyek, atyeng inkwerelhemel-anem. Nga atyeng awelhey-angenh.’ Alakenh INGKARTel ngkweng-warl ilem arrpemarl, ‘Ntwa ayernek Moses, “Angwenn INGKART ran?” Kel mwerr, ayeng arawerrng rlterr ilkwakert aneyel, alakenh ntwa ayenh iterl-aretyek. Arraty ayeng ngkweng angkeyel! Moses-el irrertetyel kwaty lher Nile atwetyek. Ra kwaty atwenty, rap arrnga-anem irreman. ¹⁸ Ikwer-penhan irrpeng-rnem ingkerrenh ilweyen, kwaty inteng-anem irreyen. Egypt-areny-rnem arrantherr nthak-ehn kwaty antywey-angenh kwaty lher-pen, arrangkw-anem, kwaty rarl apmwirrem.’”

¹⁹ Ikwer-penhan INGKARTel Moses ilek, “Aaron ila, kwaty irrertetyel alhel-aretyek kwaty-rnem ingkerrenh Egypt-itwek, alay-rnem-then, lher-rnem-then, artnep-rnem-then, ngenty-

rnem-then. Ra irrertetyel alhel-arem, kwaty-rnem rernemap ingkerrenh arrnganem irrem. Kwaty rtnwel-then tyampitel-then rernemap ingkerrenh arrnganem irrem arrpemarl, apmer arrpanenhel.” ²⁰ Moses-elap Aaron ilek, irrertetyel alhel-aretyek kwaty lheritwek. Aaron rap atwek-anem kwaty. Kwaty ingkerrenh arrnga-anem irrek. Pharaoh-el warrkenh ikwerenhel-rnem-then rernemap arek. ²¹ Irrpeng-rnem map ingkerrenh ilwek kwaty lher-itwek, intengerrek-anem. Kwaty intengerrek arrpemarl, Egypt-areny-rnem rernemap arek kwaty intengerrekarl-anem, menty antywey-angenh-anem. Kwaty-rnem ingkerrenh rernemap arrnga-anem irrek Egypt-itwek.

²² Ikwer-penh ngangker-akert-rnem Egypt-areny-rnem rernem kwaty inpek, rernemap arrnga mpwarek arrpemarl, ikwer-rnem-kenhangkwarr. Pharaoh-el arek-penh, ra awerrirrek arrpemarl. Rap nthwekern awelhey-angenh irrek ikwer-atherr Moses-ek-atherr Aaron-ek-atherr. Alakenh INGKARTel arrwekel ilek-renh-atherr Moses-atherr Aaron-atherr, Pharaoh rarl awerr irrem ikwer-atherrety. ²³ Pharaoh rap renh-atherr iwerl-alhek, apmer ikwerenh-warl-anem ra alpek. Rap awelhey-angenh ikwer-atherr, ikwer-atherr iterrey-angenh. ²⁴ Egypt-areny-rnem rernemap nthwekern kwaty antywey-angenh. Rernemap ngenty-anem angernenh kwaty lher arrerenty-itwek kwatyek, kwatyek nthwerl-apenh-antey.

²⁵ INGKARTel kwaty lher Nile-itwek arrnga

kwaty-penh mpwarek. Ikwer-penh Moses ra anenh apmer ikwerenhel arlta 7-ek-atwety.

8

INGKARTel antyetyerr-rnem thweneyel Egypt-ampeny-warl

¹ Ikwer-penh INGKARTel Moses ilek, “Iley-alha Pharaoh ikwer angka atyenh.” Kel Moses alhek Pharaoh-warl iletyek, “Alakenh INGKART ngkweng illem, ‘Atyenh-rnem arlpaw-warl alhetyek, atyeng tnakemel inkwerelhetyek. Arrngert angkey-angenh, tyarlewa renh-rnem!

² Nga arrngert angkentyan, atha antyetyerr-rnem thwenem Egypt-ampeny-warl, apmer ingkerr arrngeleyek. ³ Antyetyerrel-rnem kwaty lher Nile-itwek arrngeleyek. Rernem kwaty-they warl arrpanenh-warl aylpetyek. Ampererrey-alhetyek warl ngkwenh-warl, warl-rnem warrkenh-rnem-kenh-warl, warl-rnem Egypt-areny-rnem-kenh ingkerrenh-warl. Pantyel atnarnpey-alhetyek. Rernem atnarnpey-alhetyek amern amperney-angker-itwek-then arlengarr amernek-arelh-itwek-then ingkerrenh-itwek-antey. ⁴ Antyetyerr-rnem atnarnpem ngkweng-itwek, warrkenh-rnem-itwek-then, ingkerrenh-itwek Egypt-itwek.’” Alakenh Moses-el Pharaoh renh ilek.

⁵ Ikwer-penh INGKARTel Moses ilek, “Aaron ila, ‘Irretetyel alhel-aretyek kwaty lher-rnem ingkerrenh-warl, kwaty alay-rnem-warl-then

kwaty ingkerrenh-warl-antey.' Ra alhel-arentyel, antyetyerr-rnem kwaty ingkerrenh-they tyerrelhem Egypt-itwek." ⁶ Kel Aaron-el irrertetyel alhel-arek kwaty lher-rnem, alay-rnem-then ingkerrenh Egypt-itwek. Antyetyerr akngerr-anem tyerrelhek kwaty-they. Rernem atnarnpey-alhek Egypt-itwek apmer ingkerrenhel. ⁷ Ngangker-akert-rnem Egypt-areny-rnem rernem irrkaty mpwarek arrpemarl, antyetyerr-rnem ingwer-rnem tyerrelhek kwaty-they arrpemarl. Antyetyerr akngerr innga-anem Egypt-itwek anenh! ⁸ Ikwer-penh Pharaoh warrkenh anyent ilek, Moses-then Aaron-then ingwerl-alpetyek. Ra renh-atherr ilek, "INGKART ayerna, antyetyerr ingkerrenh iwetyek atyengety, ingkerrenh-kety. Ra itwentyel, atha arrenhantherr tyarlewetyek, arrantherr arlpaw-warl alhetyek, aker tyenkerr INGKARTek arrtyemel anthetyek."

⁹ Moses-el Pharaoh ayernek, "Ilenger ayeng angkem INGKARTek ngkweng, ngkwenh-rnemek-then? Atha apek ayernenty INGKART, ikwer-penh antyetyerr-rnem ingkerr warl ngkwenh-they warl-rnem warrkenh ngkwenh-rnem-kenh-they tyerrelhemel rernem alpem. Rernem alpem kwaty lher Nile-warl, irrkaty ikwer-warl."

¹⁰⁻¹¹ Pharaoh angkek Moses-warl, "Ingwelar-reng INGKART ayerna."

Moses angkek, "Ya! Ayeng angkem INGKARTek ingwelarreng. Antyetyerr-rnem ingkerrenh alpetyek ngkweng-they, warrkenh Egypt-areny-rnem ingkerrenh-they. Rernem warl-rnem-they

tyerrelhem, kwaty lher Nile-warl ingkerrenh alpem. Ikwer-penh ntwa iterl-arem INGKART ra innga anyent-antey, Akngey anwekantherrenh, ingwer-rnem-apeny-weny.”

¹² Ikwer-penh Moses Aaron-then Pharaoh iwerl-alhek. Ingwepenh Moses INGKARTek arlek, “Antyetyerr ingkerrenh aknga Egypt-they!” ¹³ INGKARTel Moses awek, rap alakenh mpwarek. Antyetyerr-rnem ilwek, apmer arrpanenhel, warl ingkerrenhel-then, akethel-then. ¹⁴ Egypt-arenyel-rnem antyetyerr-rnem ingkerrenh ipmernem rernem akwetyeyenah. Antyetyerr-rnem rernem ingkerrenh intenger-rek. ¹⁵ Pharaoh ra antyetyerr ipmernem arekel, ra awerr arrpemarl irrek. Moses-ek Aaron-ek-atherr awelhey-angenr arrpemarl ra irrek. Alakenh INGKART arrwekel angkek, Pharaoh ra awerr arrpemarl irrem.

INGKARTel aheny-rnem thweneyel Egypt-ampeny-warl

¹⁶ Ikwer-penh INGKARTel Moses ilek, “Aaron ila, ‘Irretetyel ahern atwetyek.’ Ra ahern attwentyel, aheny akngerr-anem ahern-they tyerrelhem, Egypt-ampeny-itwek apmer arrpanenhel arrngeleytek.” ¹⁷ Kel Aaron-el irrertety inemel ahern atwekanem, Moses-elarl ilek-angkwarr. Aheny-rnem tyerrelhek ahern-they anamerl-antey, Egypt-itwek apmer arrpanenhel. Aheny-rnem alkerel aparnperrek, artwernem-then arelh-rnem-then ingkerrenh artek, atnwenth

ingkerrenh-then artek rernem. ¹⁸ Ikwer-penh ngangker-akert-rnem arrkernelhenh, aheny-rnem ahern-they tyerretyek-arrpantey, ikwer-rnem-kenh-angkwarr. Ywarn-antey arrkernelhenh, arrangkw. Aheny-rnem artwernem-itwek atnwenth-rnem-itwek anenhanterey. ¹⁹ Ngangker-akert-rnem angkek-anem Pharaoh-ek, “Arrangkw nthakenh aheny-rnem mpwarey-angenh anwantherr, akwerrp anwantherr. Arawerrng rlterrk Akngey-kenhantel Aaron-el ahern-they aheny-rnem mpwarey-angker.” Pharaoh ran awerr-antey, awelhey-angenh arrangkw. Alakenh INGKART arrwekel angkek Moses-ek, Pharaoh ra awerr anerl-ayntem.

INGKARTel ameng-rnem thweneyel Egypt-warl

²⁰ INGKARTel Moses ilek, “Ingwepenh akwenta, kwaty lher-warl alha. Nga mpwelha Pharaoh ikwer. Ra apetyenty, angka atyenh ikwer ila.” Kel Moses alakenh Pharaoh-ek mpwelhek. Pharaoh apetyek lher-warl. Moses-el Pharaoh ilek, “Alakenh INGKARTel ngkweng ilem, ‘Atyenh-rnem arlpaw-warl alhetyek, atyeng tnakemel inkwerelhetyek. Tyarlewa, arrngert angkey-angenh! ²¹ Nga arrngert angkenty, atha ameng-rnem arrekantherr-warl thwenetyek, arrenhantherr arwengkeleyek. Amengel-rnem ngenh ampereleyek, warrkenh-rnem ngkwenh-then, Egypt-areny-rnem ingkerrenh-antey. Ameng-rnem akngerrerreyen warl ikwer-rnem-itwek ingkerrenh Egypt-itwek, ahern ingkerrenhel rernem aparnperreyen. ²² Atha

ameng-rnem thweney-angenh apmer Goshen-ampeny-warl, Israel-kenh-rnem anew-aneyel-warlan, arrangkw. Ameng-rnem nthakenh anperirrey-angenh apmer Goshen-ampeny-warl. Ntwa ameng-rnem arenty Egypt-areny-rnem-itwekant, ntwa ayenh iterl-aretyek, ayengan INGKART inngarl anem Egypt-ampeny-itwek. ²³ Arraty, ingwelarreng arawerrng rlterrkel atha ameng-rnem thwenem Egypt-areny-rnem-warl. Ameng-rnem alheyen arrekantherr-warl, atha atyenh-rnemant arntarnt-arem ameng-kety. Ameng-rnem alhey-angenh atyenh-rnem-warl.”

²⁴ Kel alakenh ayntek. INGKARTel ameng-rnem akngerr thwenek ikwer-rnem-warl. Rernem aylpenhek warl Pharaoh-kenh-warl, warl-rnem warrkenh-rnem-kenh-warl-then. Ameng akngerr inngel-anem artey-alhek Egypt-itwek. ²⁵ Pharaoh-el thwenek warrkenh anyent Moses Aaron-then ikngwerl-alpetyek. Pharaoh angkek ikwer-atherr, “Ya! Apmer nhек-antey arrantherr aker tyenkerr arrtyemel antherl-ayntetyek Akngey arrekantherrenhek!”

²⁶ Moses-el tyernek renh, “Nthakenharl alakenhan? Anwernantherr pwelek-rnem atwemel, ampernenty, INGKARTek anthenty, Egypt-areny-rnem, ahelerrekerr anwernekantherr. Rernem iltenty apek, ‘Ilekek arrantherr pwelek-rnem atweyel? Impen anwernekantherr! Anwernantherr kwenerrem ikwerek altyerr-rnem!’ Ikwer-penharl rernem apwertel anwernenhantherr wekerr, ipmek atwekerr. ²⁷ Alakenh anwernantherr apmer nhек-antey aker tyenkerr arrtyey-angenh-

antey INGKARTek. Anwernantherr arlpaw-warl alhey-areny itwern irrptyek-atwety. Arlpaw-itwekant anwernantherr aker tyenkerr arrtyemel anthetyek INGKARTek Akngey anwernekantherrenhek. Alakenh INGKARTel ilek."

²⁸ Pharaoh-el ilek Moses-ek, "Ya, arranther alhenherr-arey arlpaw-warl Egypt-they. Arleng alhey-angenh. Angath-antey alhenherr-arey, aker tyenkerr arrtyemel anthetyek INGKARTek Akngey arrekantherrenhek. Alhey-alentyel, ayerna INGKART, ameng-rnem irrente-tyek anwernekantherr-they."

²⁹ Moses angkek ikwer, "Ya. Ayeng alpem, ayeng angkey-alpem INGKARTek. Ingwelarreng ameng-rnem ngkweng-they alpem, warrkenh ngkwenh-rnem-they-then Egypt-areny-rnem-they-then. Atyeng awelha! Irrtywerremel iley-angenh! Arrngert angkey-angenh, anwernantherr arlpaw-warl alhetyek, aker tyenkerr arrtyemel anthetyek INGKARTek."

³⁰ Ikwer-penh Moses-el iwerl-alhek Pharaoh, INGKART-warl angkek-anem. ³¹ INGKARTel Moses awek. Ingwepenh INGKARTel ameng-rnem irrentek Pharaoh ikwer-they, warrkenh-rnem-then-they, Egypt-areny-rnem-then-they. Ameng-rnem ingkerr ilwenherrek-anem. ³² Pharaoh ra awerrirrek arrpemarl, awelhey-angenh. Arrwekel-antey ra ilek, ra Israel-kenh-rnem tyarlewetyek Egypt-they. Ra arrngert angkek arrpemarl, renh-rnem tyarlewey-angenh, rernem Egypt-they arlpaw-warl alhey-angenh.

9

INGKARTel atnwendh-rnem Egypt-areny-rnem-kenh atwelyel

¹ INGKARTel ilek Moses, "Pharaoh-warl iley-alha angka atyenh." Kel Moses Pharaoh-warl alhek angketyek, "Alakenh INGKART rey-antey Akngey Israel-kenh-rnem-kenh ngkweng illem, 'Atyenh-rnem arlpaw-warl alhetyek, atyeng tnakemel inkwerelhetyek. Tyarlewa renh-rnem, arrngert angkey-angenh!'

²⁻³ Nga apek arrngert angkenty Israel-kenh-rnem-kety. Ntwa antwerrkenty renh-rnem Egypt-itwek, INGKARTel pwenty thwenem nantew arrekantherrenh-warl, tangkey-rnem-warl, kamwerl-rnem-warl, pwelek-rnem-warl, yep-yep-rnem-warl, nanikwet-rnem arrekantherrenh-warl ingkerrenh apmer arrpanenh-warl Egypt-itwek. Atnwendh-rnem ilwenherrem ingkerrenh. ⁴ Atnwendh-rnem Israel-kenh-rnem-kenh ilwenherrey-angenharl, itetharl anem. INGKARTel renh-rnem arntarnt-areyel.

⁵ Arraty, INGKART angkek atyeng, 'Ingwelarreng atnwendh-rnem Egypt-areny-rnem-kenh ingkerrenh ilwenherrem!'"

⁶ Kel ingwer-inger INGKARTel pwenty thwenek, atnwendh-rnem ingkerrenh Egypt-areny-rnem-kenh arntetyerrekk, Moses-elarl ilek-angkwarr. Ingkerrenh ilwenherrek. Atnwendh-rnem Israel-kenh-rnem-kenh ilwey-angenharl, arrangkwarl. ⁷ Pharaoh-el atnwendh-rnem Egypt-areny-rnem-kenh iltwenty ra arek. Ra warrkenh-rnem ilanthek, Goshen-ampeny-warl

alhetyek, Israel-kenh-rnem-warl. Rernem arey-alhek atnwenth-rnem Israel-kenh-rnem-kenh iteth-antey ingkerr. Rernem alpek Pharaoh ikwer-warl. Rernem ilek, "Atnwenth ikwer-rnem-kenhan iteth ingkerrarl!" Pharaoh awerrantey anenh, awelhey-angenh. Ra arrngert angkek arrpemarl.

INGKARTel pwenty artweker thweneyel Egypt-areny-rnem-warl

⁸ Ikwer-penh INGKARTel ilek Moses-atherr Aaron-atherr, "Alhenherr-atherr ikwenty inetyek. Moses, ntwa ikwenty inemel, iwa alker-warl, Pharaoh-el ngenh aretyek. ⁹ Ikwenty ra ahern-apeny irrem, alherrpel apmer arrpanenh-warl iwem. Ahernel artem Egypt-areny-rnem atnwenth-rnem-then, artweker akngerr irrem ikwer-rnem-itwek. Artweker akngerr arlka ingkerr-warl rernem arrernelhem, tywen-angketyarr."

¹⁰ Ikwer-penh Moses-el-then Aaron-el-then ikwenty inek. Ratherrap Pharaoh-warl alhek. Moses-el ikwenty iwek ikwer arrwekel alker-warl. Egypt-areny-rnem ingkerrenh atnwenth-rnem ingkerrenh-then rernem artweker-akert irrek. Rernem artweker-rnem anthwek-anem. ¹¹ Ngangker-akert-rnem Egypt-areny-rnem artweker-akert-anemarl irrek. Nthakenh rernem Moses-angkwarr rtney-angenh. ¹² INGKARTel Pharaoh renh awerrelek arrpemarl. Ra Moses-ek-atherr Aaron-ek-atherr awelhey-angenh. Alakenh INGKARTel arrwekel-antey ilek Moses, Pharaoh-arl ra awerrirrem arrpemarl.

INGKARTel apertew-rnem iweyel Egypt-areny-rnem-warl

13 INGKARTel Moses ilek, “Ingwepenh akemirretyek, Pharaoh renh aretyek. Ila Pharaoh ikwer angka atyenh.” Kel Moses ingwepenh akemirrek, Pharaoh-warl ileyek alhek, “Alakenh INGKART Israel-kenhel ngkweng ilem, ‘Atyenh-rnem arlpaw-warl alhetyek, rernem atyeng tnakemel inkwerelhetyek. Tyarlewa, arrngert angkey-angenh. 14 Nga apek arrngert angkenty, twenty atha arrekantherr-warl thwenem. Atha ngenh irrwampenh-anthetyek, warrkenh ngkwenh-rnem-then, Egypt-areny-rnem ingkerrenh. Ntwa ayenh iterl-aretyek, ayengan Akngey anyentarl aneyel, ingwer apek aney-angenh. 15-16 Atha arrenhantherrenh attwenty, arrantherrap ingkerrenh ilwenherremarl. Aleyaw arrangkw-anemarl! Mwerr-anemarl nga, iteth-anemarl atha ngenh atnyeneyel. Atha ilek-ilek mpwarey-angker arrangkw-they, ntwa ayenh iterl-aretyek, ayeng arawerrng ilkawakert. Ingwer-rnemel angka atyenh ilerl-apeyenh apmer arrpanenh-warl, itna atyenh tnakemel.’ 17 INGKARTel Pharaoh renh ilek arrpemarl, ‘Nga awerr-antey irrpeltherreyel. Nga ahelerreyel atyenh-rnem-kety, tyarlewey-angenh renh-rnem. 18 Atyeng awelha! Ingwelarreng atha thwenem apwert apertew, ngkweltyeleyek apmer arrpanenh Egypt-itwek. Arrantherr alakenh apertew arey-angenh, akwerrparl. 19 Warrkenh ngkwenh-rnem thwena apmer arrpanenh-warl. Renh-rnem ila, pwelek-rnem atnwenth ingwer-rnem-

then anyenteletyek, warl ikwer-rnem-kenh-warl renh-rnem akwernetyek. Ingwepenh apertewel Egypt-itwek atwem-kety. Ingkerrenh-antey atwem-kety akethel rtneyel-rnem artwernem-then atnwenth-rnem-then. Akethel rtneyel-rnem ingkerrenh ilwenherrem.’” Alakenh Moses-el Pharaoh ilek.

20 Pharaoh-kenh warrkenh-rnemel Moses renh awek, rarl angkenh. Ingwer-rnem arternpel ikwer awelhenh, rernem INGKART-kety aterirrenh. Rernem warrkenh tyayl-areny-apeny-rnem ikwer-rnem-kenh anamerl-antey ikngwerl-alhek, atnwenth-rnem-then. Rernemap ingkerrenh warl-warl akwernek.

21 Warrkenh Pharaoh-kenh ingwer-rneman Moses-ek awelhey-angenh, angka INGKART-kenhek. Warrkenh-rnem tyayl-areny-apeny-rnem ikwer-rnem-kenh atnwenth-rnem-then rernem akngetyey-angenh warl ikwer-rnem-kenh-warl, akwerney-angenh. Akethel-antey rtnenherrenh.

22 Ikwer-penhan INGKART angkek Moses-warl, “Akwa alker-warl-athetk atnyena. Atha kwaty apertew-rnem renh-rnem alker-they iwetyek ikwer-rnem-warl, renh-rnem ingkerrenh atwetyek, artwernem-then atnwenth-rnem-then amern-rnem-then ingkerrenh-antey Egypt-itwek.” **23-24** Moses-el irrertety inek, alker-warl-athetk atnyenek. INGKARTel apertew-anem iwek Egypt-warl. Awely-awely angkek, kwaty apertew-akert rntwek Egypt ikwer-itwek. Alakenh inngarl! Apertew akngerr ayntek ahernel. Egypt-arenyel-rnem alakenh-anyem

ingwer-inger arey-angenh, aleyant rernem arek! ²⁵ Apertewel ingkerrenh aketh-itwek rtneyel-rnem innga atwek Egypt-ampeny-itwek. Ingkerrenh ywerrerl-alhek aketh-itwek, artwernem-then atnwenth-rnem-then. Amern weyt ingkerrenh atwek, alperr-then arwerl-they atwek. ²⁶ Goshen-ampeny-itwek, Israel-kenh-rnem-itwek apertewel atwey-angenh, arrangkwarl.

²⁷ Pharaoh-el warrkenh ikwerenh ilanthek, Moses Aaron-atherr ingwerl-alpetyek, ratherr ikwer-warl angketyek. Pharaoh ikwer-atherr ilelhek, “Athan apmwel-areth mpwarek. Ayeng atyenh-rnem-then INGKART-kety ament aneyel. INGKARTarl arraty inngarl, anwekantherr-ampeny-weny ra aneyel. ²⁸ INGKART atyeng ayernenherr-atherr. Apertew ipmelhetyek awely-awely-then. Ra anwenhantherr atweyel-kety. Alhewer arrantherr alhetyek, atha arrenhantherrenh tyarlewem, antwerrkey-angenh-anem.”

²⁹ Moses Pharaoh-warl angkek, “Ayeng tawen nhenh-they alpem. Ayeng alpentyelan, akwa atha alker-warl atnyenem, athap INGKART ngkweng ayernem. Ra apertew ywerrelhileyek. Nthakenh ra apertew thweney-angenh, awely-awely arrantherr nthakenh awey-angenh arrpemarl. Arrantherr ahern nhenh iterl-arem INGKART-kenh-anem. ³⁰ Athan iterl-areyel arrenhantherr, arrantherr Akngey INGKART-kety aterirrey-angenh-antey.”

³¹ Arrwekel-antey kwaty apertew-akert rntwey-angenh-antey, antywer arlpenty itna

flax lyapek Egypt-itwek apmer arrpanenh-itwek. Amern parley lyapek arrpemarl. Flax amern parley-then ampeng-anem irrek apmer arrpanenh-itwek. Kwaty apertew-akert rntwek, apertewel flax-then amern parley-then athenemel atwek arrpemarl. ³² Amern weyt-then amern ingweran weyt-apeny-then alerlantey, ampengirrey-angenh-antey. Apertewel renh-rnem atwek, kel mwerr-antey, lyapenh-antey.

³³ Moses ra Pharaoh iwerl-alhek, tawen-they aketh-warl alhek. Ranem akwa-atherr irrwerlelek alker-warl-athek, INGKART ayernemel. Apertew awely-awely-then kwaty-then arternpelek, ywerrek-anem. ³⁴ Pharaoh ra alakenh-anyem arek. Ra apmwel-ayeth mpwarek arrpemarl. Ra awerr arrpemarl irrek, warrkenh ikwer-rnem-kenh-then awerrirrek, awelhey-angenh anenh. ³⁵ Pharaoh-el Israel-kenh-rnem nthakenh tyarlewney-angenh renh-rnem, antwerrkek-antey. INGKARTarl alakenh arrwekel-antey angkek Moses-ek, Pharaoh-arl ra awerrirrem arrpemarl.

10

INGKARTel intelyt akngerr thweneyel Egypt-warl

¹ INGKARTel Moses ilek, “Pharaoh-warl angketyek alha. Atha renh warrkenh-rnem-akert awerrelelek, ayeng arawerrng rlterrkel iylparrernelhetyek ikwer-rnem-itwek. ² Atha renh-rnem atwem-penh, arrantherr ayenh iterl-arayntetyek, ayengan INGKART inngarl

aneyel, akngey-arrpanney-rnem ikwer-rnem-kenh arrangkwarl. Ingkern-penhel-rnem ayenh iterl-arayntetyek arrpemarl, aler-rnem-then arrengey-rnem-then artartey-rnem-then rernem ilerrerl-anetyek ingkern-theyaml, Egypt-areny-rnem atha atwek arawerrng rlterrak-akertel.”

³ Moses Aaron-then Pharaoh-warl angketyek alhek. Warl ilkwa ikwerenh-warl aylpenhek, ratherr Pharaoh ikwer-warl angkey-alhek-anem, “Alakenh-anyem INGKART anwernekantherrenh ngkweng-warl angketyek, ‘Nga atyeng arleng-alenty awelhey-angen, ngap tnakelheyelant. Atyenh-rnem apmer arlpaw-warl alhetyek, aker tyenkerr rernem ayenh arrtyemel anthetyek, atyeng inkwerelhemel. Ikwer-rnem arrngert angkey-angen, tyarlewa renh-rnem! ⁴ Ngarl arrngert angkenty, ntwa atyenh-rnem antwerrkenty, intelty-rnem akngerr atha thwenem apmer ngkwenh-warl ingwepenhan. ⁵ Inteltyel-rnem ingkerrenh arteyenh apmer Egypt-itwek. Nthakenh ahern arey-angenheleyenh, inteltyel-rnem artem-kety. Apertewel atwek-penh amern weyt irrpetyapanem lyapenh. Intelty-rnem apetyeyenh, amern weyt ingkerrenh arlkweyenh, alperr-then ingkerr-antey. ⁶ Intelty-rnem warl ngkwenh-warl aylpeyenh, warl warrkenh-rnem-kenh-warl-then, warl Egypt-areny-rnem-kenh-warl-then, warl ingkerrenh-warl. Arrwekelenyel-rnem alakenh intelty akngerr innga arey-angen. Egypt-arenyel-rnem alakenh arey-angen, arrangkw. Aleyant-anem areyenh.’” Alakenh Moses Pharaoh-warl angkek, intwemel

alpek-anem.

⁷ Warrkenh-rnem ikweren Pharaoh ikwer-warl angkek-anem, "Moses nhenhan anwenhantherren kwantheyelan. Ra apmwel-areth anwenhantherren mpwareyel, apmer nhenhitwek. Ilek-anem nga menty angkeyel Moses-ekan? Israel-kenh-rnem tyarlewa apmer nhenh-they, rernem arlpaw-warl alhetyek, INGKARTek Akngey ikwer-rnem-kenhek tnakemel inkwerelhetyek. Ntwa iterl-areyel, ra apmer nhenh Egypt kel apmwelek."

⁸ Kel warrkenh-rnem alhek, Moses Aaron-atherr ikngwerl-alpek. Pharaoh angkek ikwer-atherr, "Ya! Kel alhenherr-arey apmer arlpaw-warl, tnakemel inkwerelhetyek INGKARTek Akngey arrekantherrenhek. Atha arrenhantherr menty tyarlewem, arrngert angkey-angenh-anem. Kel angwenharlap apmer arlpaw-warl alhem. Akngerr?"

⁹ Moses ikwer-warl angkek, "Anwernantherr ingkerrenh, artwamp-rnem artwa akely-rnem-then, arelh-rnem-then ampernem-then, pwelek-rnem-then yep-yep-rnem-then ingkerrenhantey. Anwernantherr apmer arlpawel aney-alhemel, kwenty anwernantherr atnyeneman, INGKARTek inkwerelhetyek."

¹⁰ Pharaoh Moses-warl angkek, "Arrangkwaw! Athan arrenhantherr tyarlewenty arelh-rnem-then ampernem-then-angkwarr, arrantherrap apey-alpekerr, atwetyek anenhantherr ingkerr Egypt-itwek. Mwantz atyeng awelhenherr-atherr, ament iylpelant awey-angenh. Ayeng mwerr-weny arrekantherr anem. Arranther

arelh-rnem ampernem-then atnwenheynetyek apek? Arrangkwaw! Nthakenh atha renh-rnem tyarlewey-angenh. ¹¹ Arrangkw. Artwerneman apmer arlpaw-warl alhenherr-arey, INGKARTek tnakemel inkwerelhetyek. Alakenh-anyem mpwelan arrwekel-antey ayernenh. Arelh-rnem-then ampernem-then artenyarl anayntem!” Pharaoh-kenh warrkenh-rnem rernem Moses-atherr Aaron-atherr warl-they irrentek-anem.

¹² Ikwer-penhan INGKARTel Moses ilek, “Akwa irrwerlela alker-warl-athek, Egypt apmer ingkerrenh-angkwarr. Intelty akngerr-anem apetyeyenh Egypt ikwer-warl, ingkerrenh-angkwarr arteyenh. Apertewel atherrk atwek-penh, atherrk intweyneyel angkep arrpemarl. Inteltyel-rnem alperr-rnem atherrk ingkerr arlkwem.”

¹³ Kel Moses-el irrertety ikwerenh inek, Egypt apmer arrpanenh-warl alhel-arek. INGKARTel alherrp ilkwa akngerrakw-they thwenek. Alherrp ra arltel-then ingwel-then aleth innga pwenh. Ingwepenhan alherrp ra intelty akngerr innga akngetyek. ¹⁴ Intelty-rnem ahern ingkerenh artenh, apmer ingkerr artenh, apmer Egypt-itwek. Rernem iterrek, “Aleyant anwantherr arek intelty akngerr innga.” Aley anwantherr arey-angenh arrpemarl intelty akngerr innga. ¹⁵ Intelty-rnem atnarnpem ahernel. Ahern irrpwerl inngirrek. Apertewel atwekarlpennh, atherrk-rnem arwerl-rnem angkep lyaperrenh. Inteltyel-rnem ingkerrenh-antey arlkwek, atherrk-rnem alperr-rnem-then amern-

rnem-then. Egypt-itwek arwerl-rnem ingkerr alperr-weny, atherrk-weny, arrangkw-anem ayn-tek.

¹⁶ Pharaoh-el anamerl-antey warrkenh ikwerenh thwenek, Moses-atherr Aaron-atherr ingwerl-alpetyek. Pharaoh angkek ikwer-atherr, "Atha INGKART Akngey arrekantherrenh-angkwarr apmwel-areth mpwarek, mpwelek-angkwarr-then. Ayeng mpwelek awelhey-areny. ¹⁷ Atyeng ahelerrey-angenh anenherr-atherr! Tyarlewenherr-atherr ayenh apmwa atyen-they, awakelhey-angenh, angkep ayenh atwey-angenh! Mpwel INGKART ayernenherr-atherr, intely ywerrelhiletyek anwekantherr-kety. Arrangkwelan, anwantherr ingkerrarl ilwenherrem amern-weny, intelyel-rnem ingkerrenh arlkwek!"

¹⁸ Moses-el Pharaoh renh iwerl-alhek, INGKART-warl angkek. ¹⁹ INGKARTel Moses renh awekarl angkenh, ran alherrp akngartewek-anem, altwerl-they-anem pwey-alhek-anem. Alherrpel intely-rnem ingkerrenh kwaty alay-warl-anem iwek. Kwaty alay itnan Apenng-angketyarr. Egypt-itwek intely arrangkw-anem. ²⁰ Ikwer-penhan INGKARTel Pharaoh renh awerr arrpemarl mpwarek, nthakenh ra Israel-kenh-rnem tyarlewey-angenh Egypt-they.

INGKARTel alker renh atwemengkeleyel

²¹ INGKARTel Moses renh ilek. "Akwa irrwerlila alker-warl-athek. Atwemengkirrem Egypt-ampeny-itwek, apmer arrpanenhel, arerrey-angenhant-arey atwemengkel." ²² Kel

Moses ra akwa alker-warl-athiek irrwerlilek. Atwemengkirrek-anem Egypt-ampeny-itwek ingkerreh-angkwarr. Atwemengk ayntek arlta irrpetyek-atwety. ²³ Artwernem ingkerreh nthakenh arerrey-angenhat-arey, atwemengk ayntek-kety-anem. Arlta irrpetyel rernem alhey-angenh anek, apmer anyentel-antey anenh. Rernem arey-angenh anek arrangkw. Israel-kenh-rnem-itwel Goshen-ampeny-itwel arlta-antey aynten, rernem arenh-anteyarl. Atwemengkirrey-angenh, arrangkw. Lyenentyel-apeny anenh rernem.

²⁴ Pharaoh-el thwenek warrkenh renh, Moses ingwerl-alpetyek. Pharaoh ikwer angkek, "Ya! Arrantherr alhenherr-arey apmer arlpaw-warl, INGKART tnaketyek, ikwer inkwerelhetyek. Atha arrenhantherr nthakenh antwerrkey-angenh. Arelh-rnem-then ampernem-then atwelenheynenherr-arey. Pwelek-rnem-then yep-yep-rnem-then nanikwet-rnem-then nhel-antey anerl-ayntetyekarl."

²⁵ Moses tyernek Pharaoh-ek. "Arrangkw! Nthakenh anwernantherr pwelek-rnem yep-yep-rnem-then nanikwet-rnem-then akgeynem, anwantherr INGKARTek arrtyemel anthetyek. ²⁶ Anwernantherr yerlirreyel ikwer-rnem ingkerreh, arrtyemel anthetyek INGKART anwernekantherrenhek. Inpa iterl-arey-angenh, aker ilek-apeny renh anwernantherr antheman, akngerr apek, irrpety apek. INGKARTel ingwer-inger anwernenhantherr ilem wenh."

²⁷ INGKARTel Pharaoh arwengkilek, awerr inngarl ranap anenh. Israel-kenh-rnem ra

tyarlewey-angenh arrangkw-antey. Rernem anenh-antey. ²⁸ Pharaoh-el Moses iltek, “Nhenh-they intem-antey alpa, apey-alpey-angenh-anem. Ayeng apey-alpenty, atha ngenh ipmek atwemarl!”

²⁹ Moses-el renh tyernek, “Mwerr, ntwa ayenh ilek wenh. Ayeng aleth-antey alpetyek. Ayeng apey-alpey-angenh, ngenh aretyek.”

11

Moses-el ileyel Pharaoh, “INGKARTel aler avey arrwekeleeny-rnem Egypt-areny-rnem atweyen”

¹ INGKARTel Moses arrwekel-antey ilek, “Atha Pharaoh Egypt-areny-rnem-then anyent-ingr-antey atweyen. Ikwer-penh ra arrenhanther-renh tyarlewem, arranther Egypt-they alhetyek. Pharaoh-el arrenhanther ingkerrenh irrentem Egypt-they. ² Israel-kenh-rnem-warl angketyek alha. Renh-rnem ila, Egypt-areny-rnem ampwal-rnemek thilp-penhek-then gold-penhek-then ayernetyek.” Alakenh-anyem INGKARTel arrwekel-antey ilek Moses-an. ³ Arrwekel-antey Egypt-areny-rnem ilkelhey-angenh anenh Israel-kenh-rnemek. INGKARTel renh-rnem mpwarek, awelhetyek Israel-kenh-rnemek. Egypt-arenyel-rnem iterl-arek Moses renh, artwa mwerrarl ra anenh. Ikwer-penh Israel-kenh-rnem rernem Egypt-areny-rnem ayernek thilpek, gold-ek-then. Egypt-areny-rnemel renh-rnem iltey-angenh arrangkw. Rernem mwerr Israel-kenh-rnem angkwarr anek. Rernem Israel-kenh-rnem thilp akngerr gold-then akngerr anthek.

⁴ Ikwer-penhan Moses angkek Pharaoh-ek, "Alakenh-anyem INGKART ngkweng-warl angkem, 'Ingwa ampepenyel Egypt-itwek ayeng alhayntem. ⁵ Ayeng ampererr-ayntem Egypt ikwer-itwek, atha aler awey arrekantherrenh-rnem arrwekeleny-rnem ingkerrenh atwem. Atha alerengkw ngkwenh awey arrwekeleny atwem. Atha arelh warrkenh-rnem-kenh ampikw awey arrwekeleny-rnem atwem arrpemarl. Atha pwelek irrwey arrwekeleny-rnem atwem arrpemarl. ⁶ Ikwer-penhan Egypt-arenyel-rnem artewentyel artnem alerikw ikwer-rnem-kenhek. Artewentyel innga nhopenh rernem artnem. Rernem angkerrem alakenh, "Anwantherr awank alakenh artney-angenh. Ingwer-inger anwantherr alakenh artney-angenh." Rernem iterrek, "Aleyant anwantherr intem-antey artnalhelhirrenh." Aleyan arrangkw-anemarl, intem-antey artnalhelhirrey-angenh ikwer-apeny. ⁷ R lengk ingwel Israel-kenh-rnem rernem mwerr-anem anem, akayel atnalhelirreyel. Arengk-rnem Egypt-areny-rnemek rnkernelheyenharl, arengk-rnem Israel-kenh-rnemek rnkernelhey-angenh arrangkwarl. Israel-kenh-rnemant atha arntarnt-areyel. Atha Egypt-areny-rnem arntarnt-arey-angenh, arrangkw. Alakenh ntwa iterl-arem ayeng INGKART.' Alakenh-anyem INGKART ngkweng-warl angkeman. ⁸ Ikwer-they warrkenh ngkwenh-rnem atyeng-warl apetyem kwenerrey-alhemel. Rernem angkem, 'Moses! Alha nhenh-they, ngkwenh-rnem ingkerrenh atnwenheyna apmer nhenh-they, rernemarl

ngkweng awelheyel-rnem.' Alakenh-anyem rernem atyeng angkenty, atha renh-rnem iwerl-alhem alhemel-anem." Moses ra ahelerrek, Pharaoh renh iwerl-alhek-anem.

⁹ Ikwer-penh INGKART angkek Moses-warl, "Pharaoh ngkweng awelhey-angenhan-antey. Atha renh arwengkilek, ayeng arawerrng rlterrik-akert aremirretyek Egypt-itwek, ingkerrenhel ayenh iterl-aretyek." ¹⁰ Kel arraty. Moses-atherr Aaron-atherr ratherr arawerrng rlterrk INGKART-kenh iylparrernen, Pharaoh-el aretyek. INGKARTel aleth-antey Pharaoh renh awerr mpwarenh, Pharaoh ra awelhey-angenhanen. Ra Israel-kenh-rnem tyarlewey-angenhan-antey, rernem Egypt-they alperlewetyek. Ra renh-rnem arleng-alenty antwerrkenh.

12

INGKARTel ileyel Moses, aker tyenkerr arlkwe-tyek Anperarl Alhek "Passover"

¹⁻² INGKARTel Moses-atherr Aaron-atherr ilek Egypt-itwek, "Aherrety arrpanenhel alkent lyerten arrantherr iterl-areman, renh itnewem Abib. ³ Mpwel alhenh-atherr Israel-kenh-rnem alakenh-anyem iletyek, 'Mpwelhenh-arey arlta 10-ek-atwety. Ikwer-penhan warlek-artweyel-rnem aker yep-yep inenherr-arey, rernem yep-yep akely atwetyek apmer amentew-ament. ⁴ Irrpetyapant apek warl anyentel anem, rernem apek aker yep-yep nthakenh arlkwey-angenharl warl anyent-itwek ywerrelhilemel, irrpetyapelan. Apmwarl alakenhan, rernem anyenterremel

arlkwentyan mwerrarl, akngerrelarl atnwenth ywerrelhilemelarl arlkwem. ⁵ Yep-yep ilek-apeny arrantherr rlwanem wenh, arlkwetyek? Yep-yep ampwerrk aherrety anyentel ilkwerrek irrwey mwerr-angker rlwanetyek, alyelk inngarl. Yep-yep-wenylan nanikwet irrwey akely rlwanenherr-arey.”

⁶ INGKARTel renh-atherr ilek, “Yep-yep renh inenty, arrantherr renh arntarnt-aretyek arlta 4-ek-atwety. Ikwer-penhan ingkeny aylpenhentyelan, Israel-kenh-rnem arrantherr aker yep-yep atwetyek-anem inkwarteyel, warl arrpanenh-itwek-anem. ⁷ Ikwer-penhan arrantherr warl arriw akern-ampeny yep-yep-penh arrngel apernetyek, irrker-atherrthen warl arrpanenh-itwek, warl yep-yeparl arlkwek-penh-rnem-kenhant. ⁸ Ingwa ikwerelantey yep-yep rwel ampernetyek. Aker renh arrantherr arlkwetyek, alperr tyekertel-then amern ilperr-ilperr-then. ⁹ Aker arlety arlkwey-angenh. Kwatyel amperney-angenh arrangkw. Aperrkel arrantherr aker renh ampernetyek, akapwert-then arlaw-atherr akwa-atherr analyt-then ingkerrenh-antey. ¹⁰ Ingkerrenh arlkwenherr-arey. Ingkeny tyerrelhenhey-alhentyel, aker ampeny apek ayntentyan, arrantherr arlkwey yang menty aretyek. Rwe warl iwenh-arey, aker ampeny ingkerrenh-antey ikwentyirremel ampetyek.”

¹¹ INGKARTel renh-atherr ilek, “Alakenh-anyem arrantherr aker arlkwetyekan. Aker arlkwey-alentyel, arnkwel aylpetyek pwetel-then. Irretety inenherr-arey, arrantherr alethel

alpetyek. Aker-then amern-then anamerl-antey arlkwenherr-arey wenh. Tyenkerr nhanyem INGKART-kenh arrantherr itnewem Anperarl Alhek 'Passover'. ¹² Ingwa ikwerel-antey ayeng alkerel alhayntem Egypt-angkwarr. Atha alerikw awey arrwekeleny-rnem-then atnwenth irrwey arrwekeleny-rnem-then ingkerrenh atwem Egypt-itwek. Ayeng INGKART innga, arawerrng rlterrk ilkwakert. Egypt-arenyel-rnemarl ingkart-arrpantery-rnem mpwarek apwert-penh arwerl-penh-then, rernem apenteyel kwenirrerl-anemel ikwer-rnem-warl. Atha renh-rnem ywerrelhilem. ¹³ Arrnga atha arenty arriw-itwek, ayeng anperarl alhem, awey arrekantherrenh arrwekeleny-rnem atha atwey-angenharl. Atha Egypt-arenyel-rnemant atwem. ¹⁴ Rlengk-they arrantherr arlta nhenhek iylpangkerl-ayntetyek. Aherretty arrpanenhel alkent lyerten Abib irrentyel, arlta impenel, arrantherr kwenty atyeng inkwerelhemel arlkwetyek. Aler-rnem-then arrengrey-rnem-then artartey-rnem-then arrekantherrenh rernem inkwerelhemel angkayntetyek atyeng-warl intem-antey.

¹⁵ Arrantherr tyenkerr Anperarl Alhek 'Passover' arlkwek-penh, kwenty ingwer arrantherr arlkwaynthenherr-arey arlta 7-ek-atwety. Amern ilperr-ilperrant arrantherr arlkwerl-ayntem arlta 7-ek-atwety. Amern pikinpat-akert arlkwey-angenh, arrangkw. Arlta arrwekel ikwerel, pikinpat warl-they inemel iwetyek, arlkwey-angenh. Ingwerentyel amern pikinpat-akert arlkwenty arlta 7-ek-atwety,

arrantherr renh irrentenherr-arey intem-antey. Atyen-hwenyarl ra. ¹⁶ Arlta anyent arrwekel ikwerel-anem arrantherr akarrireteyk, atyeng inkwerelhetyek wenh arlta anyent ingkern 7 ikwerel-then. Arlta atherrel, nthakenh arrantherr warrkirrey-angenh, arrangkw. Warrkant ipmenherr-arey, amernant alhewer ampernemel. ¹⁷ Arlta 7-ek-atwety alakenh-anyem arrantherr amern tyenkerr arlkwem, itnan 'Amern Ilperr-ilperr'. Arrantherr amern ilperr-ilperr arlkwem, arrantherr iterl-arerl-ayntetyek, atharl arrenhantherr Egypt-they atnwenheyenem. R lengk-they aler arrekantherrenh-rnem-then arrengey arrekantherrenh-rnem-then artartey-rnem-then rernem iterl-arayntem, iylpelerrey-angenh arrangkwarl. Arrantherr nenh-angkwarr apenterl-ayntetyek, atha arrernek-angkwarr. Arrantherr intem-antey kwenty arlkwayntetyek. ¹⁸ Aherrety arrpanenhel alkent arrwekel arrantherr itnewem Abib. Abib ra irrentyel, arrantherr anenherr-arey arlta 14-ek-atwety. Mpwelhenh-arey ingkeny aylpenhentyek. Ikwerpenh amern ilperr-ilperr arlkwenherr-arey. Amern ilperr-ilperr arlkwenherr-arey arlta 7-ek-atwety. ¹⁹⁻²⁰ Pikinpat iwenherr-arey warl-they, amern ilperr-ilperr arlkweyalenty. Ingwerentyel amern pikinpat-akert arlkwenty, renh irrentenherr-arey, aleth-antey alpetyek. Arlta 7-penh, ingkeny tyerrelhenh-penh arrantherr alhewer amern pikinpat-akert arlkwetyek. Nenh atha arrekantherr arrernek, arrantherr Israel-kenhel-rnem angka nenh

apentetyek, ingwerel-rnem arrekantherr-itwek aneyel-rnem-then. Apmer ingwerel apek aney-alpenty, amern ilperr-ilperr arlkwetyek-antey arlta impen ikwerel, angka nhenh apentemel.” Alakenh INGKARTel Moses-then Aaron-then ilek.

²¹ Ikwer-penhan Moses-el artwa thwenek, artwamp Israel-kenh-rnem ingwerl-alpetyek. Moses ra angkek ikwer-rnem, “Anyent ingkerrenhel yep-yep akely anyentarl-anyentarl ineynenh-arey. Atwenherr-arey, aker tyenkerr apmer amentew-ament arrantherr arlkwetyek.

²² Yep-yep attwentyel, arrnga tyampit-warl thelenh-arey. Ikwer-penh alperr tyekert arrnga-warl apelyelem. Arriw-warl apernem akern-ampeny irrker-atherr. Arrantherr anenherr-arey warl kwenel-antey ingwepenhek-atwety. Aketh-warl tyerrelhey-angenh. ²³ Ingwel rlengk INGKART ampererrerl-ayntem antyerl atwey-angker-akert. INGKART-then antyerl-then ratherr atwerl-apayntem Egypt-areny-rnem. INGKARTel arrnga arriw-itwek arenty, anper-antey alhem, arrenhantherr atwey-angenh. INGKARTel antyerl atwey-angker artwerelem, arrenhantherr atwekerr.”

²⁴ INGKARTel ilek, “Arrantherr angka nhanyem apentenherr-arey intem-antey. Yep-yep akely arrantherr atwenherr-arey aherrety arrpanenhel, intem-antey. Angka nhenh atha arrernek arrekantherr, aler-rnem-then arrengey-rnem-then artartey-rnem-then, arrantherr apenterl-ayntetyek intem-antey. ²⁵ Arrantherr anerl-ayntetyek apmer wethel, atharl arrenhantherr alhelekel, angka

nhenh yep-yep-akert apenterl-ayntenherr-arey intem-antey. ²⁶ Ingwer-inger aler arrekantherrenh alakenh ayernenty, 'Ilekekarl aker tyenkerr yep-yep anwantherr arlkweyel? Ilekekarl yep-yep anwantherr atwelyelan alakenh?' ²⁷ Rernem alakenh-anyem ayernenty, arrantherr alakenh arraty-antey ileyek, 'Aker tyenkerr anwantherr arlkwem, INGKARTek inkwerelhemel, rarl anwenhantherr Egypt-they atnwenhey-alpek apmer nhenh-warl. Anwantherr Israel-kenh-rnem Egypt-itwek anenh tyayl-areny-apeny. INGKART alkerel alhek, ra Egypt-areny akngerr atwek, alerikw arrwekeleny-rnem ikwer-rnem-kenh atwek. Rap alkerel anper-antey rwaylpenhek warlrnem anwekantherrenh-rnem-angkwarr. Ra menty arek anwernenhantherr atwely-angenh. Anwernenhantherr ilwekerr atnyenek.' "Israel-kenhel-rnem awek-penh, rernem ampwethel arrernelhek kwenerremel, INGKARTek inkwerelhemel. ²⁸ Ikwer-penh rernem apmer-warl-anem alpek. Yep-yep rernem atwek, warlanem arriw ingkerrenh arrngel aperneynenh, INGKARTel Moses-then Aaron-then ilek-angkwarr-antey.

INGKARTel awey alerikw arrwekeleny-rnem Egypt-areny atwelyel

²⁹ Ingwa ampepenyel INGKARTel awey arrwekeleny-rnem ipmek atwek ingkerrenh Egypt-areny-rnem-kenh. Pharaoh-kenh awey alerikw arrwekeleny ipmek atwek, awey alerikw arrwekeleny-rnem warrkenh-rnem-kenh-then

ipmek atwek ingkerrenh-antey. Pwelek irrwey arrwekeleny-rnem yep-yep-then ingkerrenh-antey ipmek atwek arrpemarl. ³⁰ Ingwa ikwerel-antey Pharaoh-then warrkenh ikwerenh-rnem-then ingkerrenh Egypt-areny-rnem-then akemerrek warl ingkerrenh-itwek. Aler awey arrwekeleny ikwer-rnem-kenh ingkerrenh ilwek. Rernem ingkerrenh artnalhelirrek aler ikwer-rnem-kenhek.

Israel-kenh-rnem Egypt renh iwerl-alheyel, apmer arlpaw-warl alhemel

³¹ Ingwa ikwerel-antey INGKARTel awey alerikw arrwekeleny atwek, pwelek-rnem-then, Pharaoh-el warrkenh thwenek, Moses Aaron-then ingwerl-alpetyek, renh awetyek. Ra ikwer-atherr angkek, "Arrantherr Israel-kenh-rnem alpenherr-arey, anwernenhantherr ipmemel. Anwernekantherr-itwek aney-angenh-anem. Apmer arlpaw-warl alhewer alhenherr-arey, INGKARTek tnakemel inkwerelhetyek. ³² Yep-yep-rnem pwelek-rnem-then atnwenheynemel ingkerrenh-antey. Alhenherr-arey ikwer-rnem-akert apmer arlpaw-warl. INGKART-anem ayernenh-atherr, ayenh-then arntarnt-arayntetyek." Alakenh-anyem Pharaoh-el ilek Moses-atherr Aaron-atherr. ³³ Egypt-arenyel-rnem Israel-kenh-rnem ilek, "Arrantherr Egypt-itwel anayntem, anwernenhantherr ingkerrenh-antey ilwenherrem! Anamerl apmer-they alpenherr-arey!"

³⁴ Israel-kenh-rnem rernem arrwekel-antey arlengarr amern arleyenp-warl kwaty thelek,

amern mpwaretyek. Pikinpat arrerney-angenhantey. Israel-kenh-rnem anyentarl-anyentarl arlengarr amernenp renh arrernek-anem yakweth-warl. Yakweth amernenp renh arertnek anpeth-warl, akngeyn-ayntetyek.

³⁵⁻³⁶ Moses-el arrwekel-antey Israel-kenh-rnem ilek, rernem Egypt-areny-rnem ayernetyek thilpek gold-ek-then arnkternemek-then. INGKARTel arrwekel-antey ilek Egypt-arenyrnem, rernem mwerr-angkwarr anetyek Israel-kenh-rnemek. Egypt-areny-rnemel ampwalrnem arwa alhewer-anem anthek Israel-kenh-rnemek.

³⁷ Israel-kenh-rnem apmer Rameses ikwerthey anperl-alhek, apmer Succoth-warl alhenh. 600,000-pel artwernem ingketyl alperlewenh, arelh-rnem-then ampernem-then. ³⁸ Apmer ingwer-areny-rnem alhek arrpemarl, Israel-kenh-rnemel-arleng. Rernem ingkerrenh-antey alhekan. Yep-yep-rnem pwelek-rnem-then nanikwet-rnem-then akngerr atnwenheynek.

³⁹ Ingwa ampepel-antey rernem aynteyarralpek, amern ilperr-ilperr amperneyarralpek, pikinpat-weny arrangkw, anamerlarl rernem anpenhew-kety, arlwar rtnelhelenh arrangkwarl.

⁴⁰ Egypt iwerl-alhey-alenty Israel-kenh-rnem arleng-alenty Egypt-itwek anenh, aherrety 430-ek-atwety rernem anenh. ⁴¹ INGKART-kenh-rnem ingkerrenh alperlewek arlta ikwerel Egypt-they. ⁴² Ingwa ikwerel INGKARTel Israel-kenh-rnem arntarnt-aremel atnwenheynek Egypt-they. Israel-kenhel-rnem ingwa anyent aleth-

antey iterl-arem, iylpelerrey-angenh. Rernem ingwa nhenhel atyek-antey arntarnt-arelhetyek aleth-antey. Rernem iterl-arey-areny, INGKARTel arrwekeleny-rnem arntarnt-arek.

⁴³ Ikwer-penhan INGKARTel ilek Moses-atherr Aaron-atherr; "Angka nhenh atha arrekantherr arraty ilem aker tyenkerrek itnan Anperarl Alhek 'Passover', arrantherr mwerr-angkwarr apenterl-ayntetyek, tyenkerr atnyenetyek. Israel-kenhel-rnemant alhewer yep-yep nanikwet-then arlkwem. Apmer ingwer-arenyel-rnem nthakenh alakenh arlkwey-angenh. ⁴⁴ Israel-kenhel apek warrkenh apmer ingwer-areny inem payemeletyek. Kel artwerrenty-penhel warrkenh rap aker tyenkerr alhewer-anem ra arlkwem. Warrkenh ra ampa apek, nthakenh aker tyenkerr arlkwey-angenh, arrangkwarl. ⁴⁵ Alethang apmer ingwer-areny, warrkenh alyeparl warrkirreyel arrekantherr-itwel, nthakenh ra aker renh arlkwey-angenh arrangkw."

⁴⁶ INGKARTel ilek, "Arrantherr Israel-kenhel-rnem aker arlkwenty, warl kwen-itwek anayntetyek. Aketh-warl tyerrelhey-angenh, aker arlkwetyek. Aker ngkwern rlweth-akey-angenh. ⁴⁷ Israel-kenh-rnem arrantherr ingkerrenhel arlkwenherr-arey. ⁴⁸ Apmer ingwer-areny ilkelhenty aker tyenkerr renh arlkwetyek, artweweny-antey apek, artwemernt renh mpwaretyek ikwerenh-rnem-then, aker renh arlkwey-alenty. Aker alhewer-anem arlkwetyek ikwer-rnem-itwek. Artweweny ra nthakenh arlkwey-angenh. ⁴⁹ Angka

nhenh Israel-kenh-rnemek ikwerel aneyel-rnemek-then. Arrantherr ingkerrenh angka nhenh mwanty apentetyek." Alakenh-anyem INGKARTel ilek Moses-atherr Aaron-atherr aker tyenkerrek, itnan Anperarl Alhek "Passover". Ikwer-penhan Moses-atherr Aaron-atherr ratherr alhek, Israel-kenh-rnem ileyek.

⁵⁰ Israel-kenh-rnem INGKARTek awelhenh, rarl renh-rnem ilanthek-angkwarr-antey, tyenkerr arlkwetyek. ⁵¹ Arlta ikwerelan INGKARTel Israel-kenh-rnem Egypt-they atnwenhek, ingkerrenh-antey.

13

Aler awey arrwekelely INGKART-kenhant

¹⁻² INGKART angkek Moses-ek, "Israel-kenh ingkerrenh ila, 'Artwa arelh-then ratherr awey arrwekelely INGKARTek anthetyek, warrkirr-ayntetyek ikwer. Pwelek irrwey akely arrwekelely Israel-kenhel-rnem tyenkerr INGKARTek anthetyek arrpemarl. Yep-yep-then nanikwet-then tangkey-then irrkaty-angkwarr ikwer anthetyek arrpemarl. Arrwekelely-rnemant INGKART-kenh ingkerrenh, ingwer-rnem mentyarl.' "

³ Moses angkek Israel-kenh-rnemek, "Arlta nhenhel arrantherr Egypt-they anperl-alhem. Nhethay-anyem arrantherr iterl-aratyantetyek arlta anyent impen nhenh, iylpelerreyang. Arrantherr warrkirrenh tyayl-areny-apeny Egypt-itwek. INGKARTel arrenhantherr atnwenhey-alpek arawerrng rlterkel. Arlta nhenhelan amern ilperr-ilperrant arrantherr

arlkwetyek. Amern pikinpat-akert arlkwey-angenh, mentyarl. ⁴ Alkent nhenh arrantherr itnewem Abib. Arlta nhenhel arrantherr anperl-alhek Egypt-they. ⁵ Awank-akerr INGKARTel ilek Abraham-ek, Isaac-ek-then, Jacob-ek-then, arrwekeleny-rnem arrekantherrenhek, apmer Canaan anthetyek arrekantherr. INGKARTel alhelek ikwer-rnem, 'Ingwer-inger atha apmer nhenh ingkern-penh-rnemek ngkwenh-rnemek anthem. Lyertan apmerel aneyel Canaan-areny-rnem, Hitt-kenh-rnem, Amor-areny-rnem, Hiv-areny-rnem, Jebus-areny-rnem.' Angka nhenh arraty innga! INGKARTel arrenhantherr amern-angketyarr-warl atwenheyneyen. Apmer ikwerel aney-alpentyel, arlta impen anyentel renh atnyenetyek aherrety arpanehel, arrantherr iterl-arayntetyek. Arrantherr akarrerr-ayntetyek aherrety arpanehel, iylpangkerl-ayntetyek, arrantherrarl Egypt-they alpek. ⁶ Arrantherr akarrerrentyel, amern ilperr-ilperrant arrantherr arlkwetyek arlta 7-ek-atwety. Amern pikinpat-akert arrantherr arlkwey-angenh, mentyarl. Arlta anyent ingkernel 7-el arrantherr kwenty atnyenetyek, INGKARTek inkwerelhemel. ⁷ Nhenhan arraty. Apmer ikwerel, arlta 7-ek-atwety amern pikinpat-akert nthakenh arlkwey-angenh, mentyarl. Pikinpat iwenherr-arey ingkerrenhantey."

⁸ Moses-el ilek, "Arrantherrarl tyenkerrek akarrirrenty, arrantherr alerikw-rnemek tyenkerr anayntiletyek, rernem iylpangketyek, 'INGKARTel anwernenhantherr atnwenhey-

alpek Egypt-they. Ran anwernenhantherr arntarnt-arek. Alakenh-anyem anwantherr akarrerrirreyel, ikwer iterretyek, amern ilperr-ilperr arlkwetyek.⁹ Arrantherr INGKARTek iterrerl-ayntetyek, rarl arrenhantherr arntarnt-arenh. Arrantherr angka Akngey-kenh arnkewararl, iytelarr-warl ingkwernem arrernelhemel ilityewarl, akapwert-warl. Alakenh iylpelerrey-angenh anayntetyek, angka ikwerenhek intem-antey awelherl-ayntetyek, arrantherr iterl-arem, rarl arawerrng rlterrkel arrenhantherr Egypt-they atnwenhey-alpek. ¹⁰ Atyeng awelhenherr-arey! Aherrety arrpanenhel alkent Abib ikwerel, arrantherr aleth-antey aker tyenkerr-then amern ilperr-ilperr-then arlkwayntetyek.”

¹¹ Moses-el ilek, “INGKARTel arrenhantherr apmer ikwer-warl atnwenhem, apmer Canaan-warl. INGKARTel alhelek, ‘Atha apmer arrekantherr anthetyek.’ Apmer irrkaty ra alhelek arrwekeleny-rnemek, ra apmer ikwer-rnem anthetyek. ¹² Apmer ikwerel aney-alpentyel, angka nhenh-angkwarr apenterl-ayntetyek. Avey arrwekeleny-rnem INGKART-kenh ingkerreh anem. Pwelek irrwey akely arrwekeleny tyenkerr INGKARTek-anem anthetyek, yep-yep-then tangkey-then. Renh-rnem ipmek atwetyek INGKART-kenh-angkwarr, alakenh renh-rnem anthetyek INGKARTek. Irrwey arrwekeleny-rnemant INGKART-kenh ingkerreh anem. ¹³ Tangkey irrwey akely arrwekeleny-akert apek, arrantherr arrekantherr atnyen-ayntetyek. Alakenh-anyem

mwerr. Tangkey ntwa atnyenentyel, ntwap yep-yeperl atwemel anthetyek INGKARTek. Ikwer-penhan ntwa tangkey yanh ngkwenhant-anem atnyena. Yep-yep atwey-angenhel, tangkey yanh atwa rtemal arternemel INGKARTek, yep-yep mentyarl. Avey arrwekeleny-rnem arrekantherrenh arrantherr INGKART-they angkep payemeletyek.” ...

INGKARTel Israel-kenh-rnem iylparrerneyel, nthenh-angkwarr rernem alhetyek

¹⁷ Pharaoh-el Israel-kenh-rnem Egypt-they tyarlewek-penh, Akngeyel renh-rnem atnwenhey-angenh iwerr Philistia-angkwarr. Iwerr Egypt-they arraty-antey aynteyneyel Philistia-angkwarr apmer Canaan-warl. Akngey iterrehn, “Atha Israel-kenh-rnem atnwenhenty iwerr Philistia aynteyel-angkwarr, ahelengkwel-rnem renh-rnem ater-anthekerr, renh-rnem atwey-ayntekerr. Rernem angkep alpekerr Egypt-warl. Menty, iwerr ingwer-angkwarr atha atnwenheynem.” Alakenh-anyem Akngey ra iterrek. ¹⁸ Apmer arlpaw-angkwarr ra atnwenhek amperang-amper kwaty ilkwa ingwer-ampeny-warl, itnan alay Apennangketyarr. Israel-kenhel-rnem irryart-then alkwert-then atnyeneneh, rernem atwerretyek.

¹⁹ Moses-el Joseph arrewaly ngkwern akngey-nenh. Awank-akerr Joseph ra ilwey-alenty, ra awayikw-rnemek angkek alakenh-anyem, “Akngeyel arrenhingkerr arntarnt-arem. Ra arrenhingkerr atnwenheyen Egypt-they. Arringkerr arraty ayen alheletyek, ayeng iltwenty,

arringkerr arrewaly ngkwern ayenh akngeyne-tyek apmer Canaan-warl, ikwer-itwek akwerne-tyek." Kel alakenh-anyem Joseph renh alhelek awayikw-rnemel.

20 Israel-kenhel-rnem Egypt iwerl-alhek-pennh, rernem apmer Succoth-itwek aynten. Ikwer-penhan rernem apmer Etham-warl alpek. Etham arrer-antey apmer arlpaw-itwek. **21-22** INGKARTel ikwer-rnem iylparrernek, nthek-angkwarr rernem alhetyek. INGKART ra arrwekel alhenh, iwerr ikwer-rnem arratyilemel, rernem renh arraty apenteyn-ayntetyek. Arltel ra alhenh kwenpay arlpenty-angkwarr. Ingwelan ra kwenpay arlpenty lherrm-akertel yerlirrenh ikwer-rnemek, rernem apentetyek. Iwerr arratyileynenh, rernem apentetyek apmer ikwer-warl. Renh-rnem alakenh-anyem atnwenheyneh ingwa arrpanenhel arla arrpanenhel, aleth-antey. Renh-rnem iwerl-alhey-angenh.

14

1-2 INGKART angkek Moses ikwer-warl, "Ila Israel-kenh-rnem apmer Pi Hahiroth ikwer-warl angkeperretyek. Ila renh-rnem apmer ampepel aynteynetyek, arrerentyl apmer Migdol kwaty alay itnan Apenng-angketyarr-itwek. Ikwer-itwek aney-alpetyek, kwaty alay impalthe. Apmer Baal Zephon alay intwar-ampeny-itwel aneyel. **3** Pharaoh ra alakenh-anyem iterrem, 'Ya nthakenh Israel-kenh-rnem anterrey-angenh aleyan, rernem iterl-areyang, nthek-angkwarr alpetyek wenh. Rernem atyengety

anterrey-angenh. Arrangkw aleyan. Atha renh-rnem antwerrkeyen arrer-antey arlpaw-itwek.' Alakenh-anyem Pharaoh ingwer-inger iterretyek. ⁴ Atha Pharaoh arwengkilem, ra arrenhantherr alwernetyek. Atha ahelengkw-rnem ingkerrenh ilwerl-athenem atwem. Ikwer-penh arrantherr iterl-aretyek, ayeng rlterrk ilkwa-akert aneyel. Arrantherr ayenh tnaketyek inkwerelhemel. Egypt-areny-rnem rernem iterl-arem-anem arrpemarl, ayeng INGKART ingkerrenhek aneyel." Alakenh-anyem INGKART angkek Moses-warl. Israel-kenhel-rnem awek, INGKARTarl Moses-warl angkek. Kel rernemap apmer Pi Hahiroth-itwek ayntey-alpek.

*Pharaoh artwa atningk ikwerenh-rnem-akert
artenhirreyel Israel-kenh-rnemek*

⁵ Ingwerentyel Pharaoh renh ileyek alhek, "Israel-kenh-rnem anterreke." Pharaoh-elarl awek-penh, rap atyetyart ampep-rnem-then angkek, "Ilekek anwantherr intwarek wenh, antwerrkey-angenhan? Rernemarl kel anterrekan! Anwantherr renh-rnem antwerrkey-areny! Angwenh-rnem-anem anwekantherr warrkirreyenhan?" ⁶ Pharaoh ra pakey nantewelarl ayteng-akngenh-warl nganerl-alhek. ⁷ Ra ikngwerl-alhek artwa ahelengkw-rnem 600-pel. Rernem alkwert-rnem-then irryart-rnem-then inerl-alhek, pakey-rnem-warl nganerl-alhetyek, atwerretyek. Rernem ingkerrenh Pharaoh-angkwarr alhek. Ahelengkw atyetyart-rnem alhek arrpemarl pakey-akert. ⁸ INGKARTel Pharaoh renh

arwengkilek. Pharaoh-el atningk ikwerenh-rnem-akertel Israel-kenh-rnem alwernek, renh-rnem atwetyek-anem. Israel-kenh-rnem rlterrk innga alhenh-antey, alhengkerirrey-angenh.
⁹ Pharaoh ra ahelengkw ikwerenh-rnem-akert Israel-kenh-rnem arrererrelhek apmer Pi Hahiroth-itwek, kwaty alay itnan Apenng-angketyarr ikwer-itwek. Apmer Baal Zephon intwar-ampeny kwaty alay.

Israel-kenh-rnem artarnpenheyel artempel intwar-ampeny-warl, kwaty alay Apenng-angketyarr ikwer-angkwarr

¹⁰ Israel-kenhel-rnem Egypt-areny-rnem arrer-anem apetyenty arnarek. Rernemap aterirrek, INGKARTek-anem arlkek, ra renh-rnem arntarnt-aretyek ahelengkw-rnem-kety.
¹¹ Rernem Moses ayntarrp-ilek, "Ilekarl ntwa anwernenhantherr Egypt-they atnwenhey-alpek? Anwantherr ingkerrenh ilweyenh wenh! Egypt-itwek anwantherr aney-areny, ikwer-itwek anwantherr ilweyek-atwety!
¹² Anwernantherr ngkweng ilelhek Egypt-itwek, 'Aney wenh anwernantherr nhel-antey, menty alpey-angenh warrk-anem irremel.' Alakenh-anyem anwernantherr arrwekel ngkweng ilelhekan! Ntwa anwernenhantherr ilek, anwernantherr ngkweng-angkwarr alhetyekarl! Aleyan anwenhantherr arlpawek ahelengkw-rnemel atweyenh ingkerrenh-antey!"

¹³ Moses angkek, "Kel mwerr! Aterirrey-angenh! Rlterrk anenherr-arey! INGKARTek

anwantherr nhenhel mpwelhey, rarl anwenhan-therr ingkerrenh arntarnt-aremarl. Anwantherr Egypt-areny-rnem arrer-anem arnareyel, nhepenhan anwantherr renh-rnem areyang-anem. ¹⁴ Arternpant anetyek. INGKARTel Egypt-areny-rnem ingkerrenh atweyen.”

¹⁵ Ikwer-penh INGKART angkek Moses-warl, “Ilekek ntwa atyeng arlkeyelan wenh? Israel-kenh-rnem ila, kwaty alay Apenng-angketyarr-warl alhetyek. ¹⁶ Irretety irrwerlela, irrerte-tyel kwaty-warl alhel-ara. Kwaty amentant-atherr irretyek, ampepan ahern artwerret-yarl ayntetyek, arrantherr alhetyek ikwer-angkwarr. ¹⁷ Atha Egypt-areny-rnem arwengk-ileyen. Alakenh rernem arrenhantherr al-wernem kwaty-angkwarr. Alakenh-kety atha renh-rnem kwatyek akwernem, rernem arrenhantherr alwernekerr. Atha ingkerrenh ilwerl-athenem, Pharaoh-then ahelengkw-rnem-then pakey-akert-rnem-then nantew-akert-rnem-then. Ikwer-penh arrantherr ayenh iterl-aretyek, ayeng rlterrk ilkawakert aneyel. Arrantherr ayenh tnaketyek inkwerelhemel. ¹⁸ Ikwer-penhan Egypt-arenyel-rnem rernem iterl-arem, ayeng INGKART ingkerrenhek aneyel.” Alakenh angkek INGKART Moses-ek.

¹⁹ Antyerl Akngey-kenh arrwekel alhayntenh Israel-kenh-rnemek, ra ikwer-rnem yerlirrek, rernem renh apentetyek. Kwenpay arlpenty arrwekel alhenh ikwer-rnemek arrpemarl. Kwenpay antyerl-then ingkernel-anem alpek. Antyerlel renh-rnem arntarnt-arayntetyek Egypt-areny-rnem-kety. ²⁰ Kwenpay ampepel-anem ir-

rek, Israel-kenh-rnem-thenek Egypt-areny-rnem-thenek. Ingwerrek-anem. Kwenpay Israel-kenh-rnemekant arrtyernenh-antey. Israel-kenh-rnem lyenentyel arenh-antey ingwel, mwerr alhenh. Kwenpayel artek Egypt-areny-rnem, renh-rnem arey-angenhelek-anem. Atwemengkirrek ikwer-rnem-itwekant. Rernem ingwel Israel-kenh-rnem arrererremel atwekerr, alakenh-kety atwemengkirrek.

²¹ Moses-el kwaty renh-anem alhel-arek irrertety ikwerel. INGKARTel alherrp thwenek, akngerrakw-they ingwel aleth pwenh. Kwaty akwarrant-atherr antwerrkenh, ampepel ahern artwerretyarl ayntek. ²² Israel-kenh-rnem ahern artwerretyel anperl-alhek kwaty ampepel-antey. Kwaty akwarrant-atherr rtney-alpek apwert-apeny. ²³ Pharaoh pakey-akert-rnem-then nantew-akert-rnem-then rernem ingkern-they renh-rnem apentek, kwaty ilkwa-angkwarr. ²⁴ Atwemengkel-antey ingkeny tyerrelhey-angenh-antey, INGKARTel Egypt-areny-rnem arek kwenpay lherrm-akert-they. Renh-rnem arwengkelek, rernem apatemel ywarn iterrenh. ²⁵ Pakey-kenh weyl aylpek ahern rtwel-anem, rernem ywarn ayteng-inenh. Egypt-areny-rnem arlkalhelerek, "Anwantherr Israel-kenh-rnem menty ipmey-areny renh-rnem! INGKARTel renh-rnem arntarnt-areyel-kety, ikwer-rnem-they atweyel-kety!"

²⁶ Israel-kenh-rnem artempel intwar-ampeny-warl irrek, INGKARTel Moses ilekanem, "Irretety irrwerlela, kwaty-anem alhel-ara ikwerel. Alakenhan kwaty ra

angkep-anem anterrey-alpetyek, Egypt-areny-rnem artenhetyek, pakey-rnem-then nantew-areny-rnem-then ingkerrenh-antey. Kwatyel akwernetyek renh-rnem.” Alakenh INGKARTel Moses renh ilek. ²⁷ Kel Moses-el kwaty alhel-arek irrertetyel. Ingkeny tyerrelhenh-anem. Ra alhel-arek-penh, kwaty angkep anyenterrenhey-alpek. Egypt-areny-rnem angkeperreynetyek arrkernelhek ywarn-antey. INGKARTel renh-rnem ilwerl-athenek ingkerrenh-antey kwatyel. ²⁸ Innga kwaty angkeperrek, kwatyel ahelengkw-rnem-then pakey-akert-rnem-then nantew-areny-rnem-then ingkerrenh akwernenhek. ²⁹ Arrwekel-antey Israel-kenh-rnem ahern artwerretyel alperlewenh ampepel-antey. Kwaty akwarrant-atherr rtney-alpek apwert-apeny. Kwaty alay intwar-ampenyel Israel-kenh-rnem iteth-antey ingkerrenh rtney-alhek.

³⁰ Alakenh-anyem INGKARTel Israel-kenh-rnem arntarnt-arenh Egypt-areny-rnem-kety. Israel-kenh-rnemel Egypt-areny arrewaly ingkerrenh rernem arek, kwaty impalthelarl ayntenh. ³¹ Rernem iterl-arek, INGKARTelarl renh-rnem arntarnt-arenh arawerrng rlterrk. Akater-anem rernem rtnenherrenh, angkerrenh-anem, “Innga INGKART ra rlterrk ilkwakert. Anwantherr ingkerrenhel renh iterl-arayntetyek, rarl anwenhantherr arntarnt-arek Egypt-areny-rnem-kety. Anwantherr Moses renh apent-ayntey, INGKARTel innga renh atyetyart arrernekk anwekantherr.”

15

¹ Moses Israel-kenh-rnem-then arleng-alenty aylelheyel, INGKARTek inkwerelhemel. ...

²⁰ Miriam Aaron-kenh angkwerikw anenh, angkakert Akngey-kenh. Ra ampwal rlterrpelheley-angker inek, rntwenh-anem ikwer-akert. Arelh ingwer-rnem ingkerrenh rntwenh arrpemarl ikwerenh-angkwarr.

²¹ Miriam alakenh aylelhek, “INGKARTek aylelhenherr-arey, rarl anwenhantherr arntarnt-arek Egypt-areny-rnem-kety. Ra nantew-then ahelengkw-then-antey ingkerrenh kwaty-warl iwek.”

Angka kwaty arrngeynp-akert

²² Moses-el kwaty alay Apenng-angketyarr ikwer-they renh-rnem atnwenheynek apmer arlpaw ikwer-warl, itnan Shur. Arlta irrpeteyek-atwety ingketyel alperlewenh, kwatyek ywarn nthweynenh. Kwaty arey-angenh arrangkw-antey. ²³ Rernem apmer Marah renh arey-alhek. Kel kwatyan ikwer-itwel nthakenh rernem antywey-angenh. Kwaty arrngeynp, alakenh-anyem rernem apmer Marahan itnewek, alakenh anayntileyel, “Kwaty apmwa”. ²⁴ Israel-kenh-rnem Moses-ek tyel-angkenh, “Kwaty mwerr-weny wenh! Arrngeynparl wenh, nthakenh anwantherr antywey-angenan! Nthenharl kwaty mwerran antywem wenh? Nthenharl wenh?”

²⁵ Moses apatemel anenh. Rap INGKARTek arlek, “Ilay atyeng, nthakenh atha angkethakwrnem ileman!” INGKARTel arwerl akely ikwer

iylparrernek. Moses-el arwerl renh kwaty arngeynp ikwer-warl iwek. Kwaty ra mwerranem irrek, antywetyek-anem.

INGKARTel angka rlterrk ingwer-anem renh-rnem anthek, rernem apenterl-ayntetyek, arraty-angkwarr anayntetyek. Renh-rnem arrkernek, rernem mwerr-angkwarr apek apenterl-ayntetyek. ²⁶ Ra angkek ikwer-rnem, "Ayengan INGKART wenh, Akngey arrekantherrenh. Ayeng atyetyart ilkwa ingkerrenhek. Ayeng apek arrekantherr angkenty, arrantherr atyeng awelhetyek, atyeng antwerr aney-angenh. Atha arrenhantherr ilem, arraty-angkwarr anayntetyek. Arraty-angkwarr anetyek atyeng. Angka atyenh apenterl-ayntetyek arraty-angkwarr. Arrantherr arraty-angkwarr anenty, nthakenh atha arrenhantherr arntety anthey-angenh. Arrantherr mwerr anetyek, arntety-weny. Atha Egypt-areny-rnem arntety anthek. Ayeng INGKART innga, atha arrenhantherr mwerriley-angker."

²⁷ Ikwer-penhan Israel-kenh-rnem apmer Elim-warl rernem arey-alhek. Apmer Elim ikwer-itwek kwaty apeynt 12-pel aynteh, arwerl ilkwerp-nem-then 70-pel. Rernem kwaty apeynt impalthel anenh.

16

INGKARTel amern alker-areny aker thip-then thweneyel, rernem arlkwetyek

¹ Israel-kenh-rnem rernem apmer Elim iwerl-alhek, arlpaw-warl alperlewenh, itnan Sin.

Arlpaw Elim-they Sinai-they ampepel-angkwarrantey. Egypt-they rernem alperlewenh-antey, alkent anyentel. ²⁻³ Arlpaw-itwek amern-weny, arrangkw. Israel-kenh-rnem tyel-angkek-anem Moses-ek-atherr Aaron-ek-atherr ikwer-atherrety. “Ilekek mpwel apmer apmwarl nhenh-warl atnwenhey-alpek! Amern-weny arrangkwarl-anem! Anwantherr ingkerrenh ilweyen h wenh, amern-wenyel! Egypt-itwel amern akngerrarl anwantherr arlkwenh awankan aker-then. Egypt-itwel INGKARTel anwenhantherr ipmek attwenty, mwerrarl! Lyertan anwantherr apmer nhenhelarl ilweyen h amern-weny!”

⁴ INGKART angkek Moses-warl, “Atha thwenem amern alker-areny arrekantherr, kwaty rntwem-apeny. Arrantherr amern akngerr arlkwem. Arlta arrpanenhel atha thwenem, arrantherr amern arlkwerl-ayntetyek-anem. Amern akely arlta anyentekant inetyek arrekantherr. Arlta arrpanenhel atha arrenhantherr arrkernerl-ayntem, nthakenh arrantherr irrem wenh, atyeng-angkwarr anetyek apek. ⁵ Arlta 6-el Friday arrpanenhelant arrantherr amern akngerr inetyek arlta ingwerel-rnem-apeny-weny. Friday-elant amern akngerr inetyek, ampernetyek. Friday-el Saturday-el arrantherr arlkwetyek, arlta impenel.”

⁶ Moses-atherr Aaron-atherr ilelhek Israel-kenh-rnemek, “Aylern arrenhantherr Egypt-they atnwenhey-angenh, arrangkw. Ingwel rlengk arrantherr iterl-aretyek, INGKARTelant

arrenhantherr Egypt-they atnwenhey-alpek. ⁷⁻⁸ Ingwelarreng arrantherr areyenh, INGKARTelarl arrtyerneyenh ingkenyel-apeny, rlterrk ilkwakert. Ra arrekantherr-warl apetyeyenh. Arrantherr aylernek ahelerrek, alakenh-anyem arrantherr INGKART irrwerl-arenyekarl ahelerrek! Ra arrenhantherr awek. Ra aylernenen hlanthek wenh, arrenhantherrenh apmer nhenh-warl atnwenhey-alpetyek. Aylern ikwer awelhenh, aylern warrkirreyel ikwerarl.” Moses angkek ikwer-rnem, “Atyeng awelhenherr-arey! Arlta arrpanenhel atwerrpatwerrp, INGKARTel aker arrekantherr anthem arlkwerl-ayntetyek. Ingwepenh arrpanenhel ra amern antherl-ayntem arrekantherr, arrantherr arlkwerl-ayntetyek. Arrantherr arlkwayntem wenh aker-then amern-then-anem wenh, angayakw irrey-angenharl.”

⁹ Ikwer-penhan Moses angkek Aaron-ek, “Ila renh-rnem, ‘Arrantherrarl aylernenen arlkarewek wenh. INGKARTel arrenhantherr awek. Alakenh-kety arrantherr akarirretyek INGKART-warl-anem.’” ¹⁰ Kel Aaron-el renh-rnem akarrelek ingkerrenh-antey. Aaron rarl ikwer-rnem angkenh-antey, rernem kwenpay arlpaw ikwer-angkwarr arleng arenh. Kwenpay ilkwa amparrkenhey-alpenh ikwer-rnem-warlathek. INGKARTan kwenpayelarl anenh, rlterrk ilkwakert.

¹¹⁻¹² INGKART Moses-warl angkek kwenpay-they, “Atha awek Israel-kenh-rnemelarl mpwelenh arlkarewek. Alakenh-anyem ila renh-rnem, ‘Alakenh INGKART angkek arrekantherr,

"Atwerrp-atwerrp atha arrenhantherr akerel wanteyenh. Ingwepenh atha arrenhantherr amern akngerrel wanteyenh. Nthakenh arrantherr angayakw irrey-angenh, amern akngerranem wenh. Ikwer-penhan arrantherr iterlarem, ayengan INGKARTarl, Akngey arrekantherrenh."

¹³ Arlta irrkaty ikwerel-antey atwerrp-atwerrp, Israel-kenhel-rnem thip atwelkarr akngerr arek, ikwer-rnem-warl alkerel apetyek. Alker-they rernem akngerr arrernelhenh ahern-warl, ahern ingkerrenh arrkngelek. Ingwepenh ingkeny tyerrelhenhey-alhentyel ahern-itwek rernem arek, kwaty aypmerr ahern-itwek. ¹⁴ Ingkeny irrwerlerrek, ahern artwerretyerrekk. Rernemap amernan apereltyapeny ahern-itwek arek. ¹⁵ Rernem apatemel ayernerrek, "Ilek nhenhan wenh?"

Moses-el renh-rnem tyernek, "Amern nhenhan. INGKART ra thwenek, arrantherr arlkwetyek. ¹⁶ Alakenh-anyem INGKARTel ayenh ilek, 'Tyampit-warl amern ineyn-ayntetyek arlta arrpanenhel aleth-antey. Artwek arelhek ampek anyentam-anyent-warl.' " ¹⁷⁻¹⁸ Israel-kenhrnem tyampit-warl inerl-apenh. Ingwerel-rnem akngerr inek, ingwerel-rneman akelyarl inek. Ingwerel-rnem akelyarl inek, rernem mwerr arlkwetyek. Ingkerrenhel amern akngerr-antey inek.

¹⁹ Ikwer-penhan Moses angkek ikwer-rnem, "Lyert-antey ingkerrenh-antey arlkwenherrarey wenh, ywerrelhiletyek, ingwepenhk atnyeney-angenh." ²⁰ Ingwer-rneman Moses-ek

awelhey-angenh. Rernem amern ingkerrenhantey arlkwey-angenh, amern irrtyertel-akwernek ingwepenhek. Amernan tyerrangketyarr irrek, intengerrek. Moses ikwer-rnem ahelerrek.

21 Ingwepenh arrpanenhel rernem amern akwetyey-ayntenh, amern arlt aanyentekant arwa. Ingkeny tyerrelhenhey-alhenh-apeny, rwenp-anem irremel amern ra irrkngwerrenhanem, arrangkwirremel-anem.

22 Arlta 6-el Friday-el rernem tyampit atherr-warl ineyam-ayntenh. Artwamp atyetyart-rnem Moses-warl apetyek, angketyek ikwer-warl, “Rernem tyampit atherr-warl amern inek.”

23 Moses angkek, “Kel mwerr. Alakenh-anyem INGKARTel ilek, ‘Ingwelarreng Saturday-el arlta impenel arrantherr ayenh tnakemel inkwerelhetyek. Arrantherr warrkirrey-angenh anetyek arrangkw, arrantherr anetyek ltyerremel. Lyertan amern ingwer ampernenherr-arey rwel apek, rtamp mpwaretyek. Amern ingwer tyampit-warl kwatyal arrtyenherr-arey apek. Ingwepenhk amern ingwer atnyenenherr-areyarl.’”

24 Rernem alakenh amern ampernek ingwepenhek, Moses-elarl ilek-angkwarrantey. Amern intengerrey-angenh arrangkw, tyerr-weny-anem arrangkw-anem mwerr-anem. **25** Moses-el ikwer-rnem ilek, “Lyertan arlta impen INGKART-kenh. Anenherr-arey warrkirrey-angenh. Arrantherr amernek nthwey-alhenty, arrantherr arem arrangkwarl.

Amern apmwerrkeny renhant arlkwenherrarey wenh, arrantherrarl apmwerrkel inekant.

²⁶ Alakenh-anyem INGKART-kenh angka aynteyelan. Arrantherr Sunday-they Friday-ek-atwetyant amernek nthwetyek, arlta 6-ek-atwety-antey. Saturday-el mentyarl, nthakenh arrantherr amernek ahern-itwek nthwetyangenharl. Arlta ikwerel Saturday impen INGKART-kenh, ltyerrey-angker.” Alakenh Moses-el ilek.

²⁷ Arraty innga. Arlta Saturday ikwerel ingwer-rneman ingwepenh amernek nthwetyekarl alhek. Arrangkw-antey rernem nthwenh ywarn-antey. ²⁸ INGKARTel ilek Moses renh, “Ay! Nthakenh arrantherr irreyelan? Atharl arrenhantherr ilek-angkwarr! Atyeng awelhey-angenharl arrantherr, apal nthwenh! ²⁹ Atyeng awelhenherr-arey! Atha arrenhantherr ilek, Saturday-el warrkirrey-angenh anetyek, arteny anetyek! Friday-el atha arrenhantherr amern akngerr anthayntem arlta atherrek-atwety arwa. Saturday-el arrantherr anyentel-antey anayntetyek, alhey-angenh.” ³⁰ Ikwer-penhan rernem Saturday arrpanenhel ltyerremel anenh, warrkirrey-angenh-anem, arrangkw-anem anenh.

³¹ Israel-kenhel-rnem amern renh itnewek mana. Mana aynteyel “Ilek nhenhan?”. Mana amern arlter aperelty-apeny. Mana arrkerneyel ngkwarl antemarn-apeny.

³² Moses angkek-anem, “INGKARTel ilek, atha amern mana arrernetyek tyampit ilkwewarl, intem-antey atnyenetyek, ampernemel renh

arayntetyek aleth-antey. Amern renh arenty, rernem iylpangkerl-ayntetyek, INGKARTelarl arrwekeleny-rnem atnwenhey-alpek Egypt-they, ra amern irrkaty renh anthenh apmer arlpaw-itwek. Ampernem rernem alakenh angkenty, ‘Ay! Amern irrkaty!’”

³³ Moses-el Aaron ilek, “Tyampit ilkwa ina, amern mana renh ikwer-warl arrerna. Renh arrerna box impen INGKART-kenh-warl, ingkern-penhel-rneman amern renh aleth-antey iterl-arayntetyek.” ³⁴ Kel Aaron-el tyampit inek, amern mana arrernek ikwer-warl. Ra tyampit box impen-warl arrernek INGKART-kenh-angkwarr. Israel-kenhel-rnem box aleth-antey atnyenenh amern mana-akert. ³⁵⁻³⁶ Israel-kenh-rnemel amern mana arlkwenh, aherrety 40-ek-atwety. Apmer arlpaw-itwek rernem ampererrenh ingketyel aleth-antey. Ikwer-penhan rernem apmer Canaan-warl arreranem irrek, INGKARTel renh-rnem amern mana anthey-angenh-anem, arrangkw-anem.

17

Moses-el apwert-they kwaty inpeyel

¹ Israel-kenh-rnem anperl-alhek arlpaw itnan Sin-they. Akngerr-inger INGKARTel renh-rnem thwenek apmer ingwer-warl alhetyek, kel rernem alherlewek rarl ilek-angkwarr. Ingwer-inger rernem apmer Rephidim-el ayntenh-anem. Apmer Rephidim-el rernem ayntenh arlpawel kwaty-wenyel, nthakenh rernem antywey-angenh. ² Rernem Moses ikwer ahelerrek, renh ayernek, “Kwaty-wenyarl arrangkwarl! Kwaty

anwenhantherr antherl-ayna wenh, anwantherr antywetyek!"

Moses ikwer-rnem angkek, "Ilek arrantherr atyeng ahelerreyel? Ilekek arrantherr INGKART arrkerneyelarl? INGKART-angkwarr apek arrantherr apentey-angenh! Arrantherr iterreyel apek, INGKARTel anwenhantherr iwerl-alhenty-arrpantey! Arrantherr iterreyel apek, INGKART rlterrk-weny, nthakenh ra anwenhantherr arntarst-arey-angenh! Arrantherr alakenh iterrenty, INGKART arrekantherr ahelerrem!"

³ Rernem angkethakw-anem irrek, kwaty-wenyl. Rernem Moses-ek aleth-antey tyel-angkerrenh. "Ilekek ntwa anwenhantherr Egypt-they atnwenhey-alpek wenh arlpaw-warlan kwaty-weny-warlan? Ilekekarl ntwa anwenhantherrenh ampernem-then, atnwenth-rnem-then nhenh-warl atnwenhey-alpek, aherrety inngewarl wenh? Anwantherr ingkerrenh ilwenherretyek arlpawel, kwatyek arrangkw-itwek wenh! Ilek-anem anwantherr antyweman?"

⁴ Moses INGKARTek arlkek, "Nthakenh atha nhenh-rnem ileman? Rernem atyeng awelhey-angenh. Rernem apwertel ayen wekerr, ipmek atwekerr!"

⁵ INGKART angkek Moses-warl, "Artwa ampwernem ikngwa. Nga-then artwa ampwernem-then arrwekel alhetyek, Israel-kenh-rnem ingkern-they alhetyek. Irretety irrkaty aknga, arrwel ntwa kwaty lher Nile ikwerel atwek. Anamerl-apeny alha! ⁶ Apwert itnan Sinai ikwer-warl alhenherr-arey wenh.

Sinai-itwek ntwa apwert ilkwa arey-alhem wenh. Ayeng apwert-itwek rtnem, arrekantherr-itwek arrwekel-ampeny-itwekarl. Apwert renh atwa irrertetyel. Kwaty-anem apwert-they thelelhetyek, arrantherr antywetyek-anem angkethakwel." Moses INGKARTek awelhenh. Ra alhek, kwaty renh atwek apwert-itwek irrertetyel, artwamp-rnemel renh arenhantey. Kwaty-anem thelelhek apwert ikwerthey. Rernemap antywek-anem ingkerrenhel-antey. ⁷ Moses-el apmer renh itnewek Massah-anem. Massah aynteyel arrkerneyelarl, Israel-kenhel-rnem INGKART arrkernek. Israel-kenh-rnem kwaty-weny anek, INGKART arrkernek, ayernerremel, "INGKARTang anwekantherr-itwek aneyel-antey? Arrangkw apek. INGKARTelang anwenhantherr arntarnt-areyel-antey? Arrangkw apek wenh." Moses-el apmer renh ingwer-angkwarr itnewek, itna Meribah. Meribah-an ayntek ilterreyelarl, Israel-kenh-rnem kwaty-they ilterrenharl arlkarewemel.

*Israel-kenh-rnem Amalek-areny-rnem-then
atwerreyel*

⁸ Israel-kenh-rnem apmer Rephidim-el aneh, Amalek-areny-rnem akngerr apetyek, renh-rnem atwetyek. ⁹ Moses angkek Joshua-warl, "Ntwa artwa mwerr-rnem rlwanetyek, arrantherr atwerretyek Amalek-areny-rnem-itwek. Ingwelarreng ayeng alhem, apwert irrwerl-itwek rtney-alhetyek-anem. Irretety renh atha akngem, INGKARTelarl ayenh anthek. Atha irrertety ikwerel alhel-arerl-ayntem,

arrantherarl atwerrerl-anem-angkwarr,
arranther renh-rnem ingkerrenh atwetyek."

¹⁰ Joshua Moses ikwer awelhek. Ra artwernem rlwaneynek, Amalek-areny-rnem atwetyek. Moses apwert irrwerl-warl nganek, Aaron-then artwa ingwer-then itnan Hur. ¹¹⁻¹² Moses-el irrertety irrwerlelek akapwert irrwerl-ampeny atnyenek. Rap irrwerl-warl irrertety renh antwerrkek, Israel-kenh-rnemel Amalek-areny-rnem antengelenh-antey. Moses artwamp-anem, akwa-atherr alhengkerr-anem irrek. Ra irrertety renh irrwerl antwerrkey-angenh arrangkw-anem. Akwa alhengkerr-anem kwenerrenh-anem, Amalek-arenyel-rnem Israel-kenh-rnem antengelenh-anem. Aaron-el-atherr Hur-el-atherr ratherr apwert akely arrernek, Moses ra anerl-ayntetyek. Ikwer-penh Aaron-el-atherr Hur-el-atherr akwa-atherr Moses-kenh antwerrkenh irrertety-akert irrwerl-antey, ingwerel-rnem atwerrenh-angkwarr-antey. Aaron-elan akwa arraty-ampeny antwerrkenh, Hur-elan ayleng-ampenyarl antwerrkenh. Ratherr alakenh-anyem akwa-atherr Moses-kenh antwerrkenh, ingkeny aylpenhetyek-atwety.

¹³ Alakenh-anyem Joshua-then irlkenty Israel-kenh-rnem-then rernem Amalek-areny-rnem antengelellemel atwek.

¹⁴ INGKART angkek Moses-ek, "Angka nhenh atwerrenharl-penh pip-warl ingkwern-aynta, ingwerel-rnem iterl-aryntetyek iylpelerrey-angenh. Angka nhenh Joshua-warl ilerl-ayntetyek, atha Amalek-areny-rnem ingkerrenh

altheneyen. Ingkern-penhel-rneman renh-rnem iterl-arey-angenh, akwerrp.”

¹⁵ Ikwer-penh Moses-el apwert-rnem arrernek, ampwal aker arrtyerneyek-arelh mpwarek INGKARTek. Ra renh itnewek, “INGKARTel Anwenhantherrenh Arntarnt-arayntem Ahelengkw-rnem-kety.” ¹⁶ Moses angkek-anem, “Atha irrertety alhel-arek irrwerlwarl-athek, INGKART aneyel-warl. INGKARTel aleth-antey atwayntem Amalek-areny-rnem.”

18

Jethro Moses-warl alheyel

¹⁻⁴ Arrwekel-antey Moses-el anewikw ikwerenh Zipporah alerikw-atherr-anem thwenek malyeyikw-warl Jethro-warl apmer Midian-warl. Moses-el alerikw ilkwa itnewek Gershom, alakenh anayntileyel, “Ayeng alethang apmer ingwer-areny.” Moses-el alerikw ingweran itnewek Eliezer, alakenh anayntileyel, “INGKART akngey atyen-h-kenhel ayenh arntarnt-arenh, ayenh iteth-antey atnyenek, Egypt-areny ahelengkw-kety!” Jethro Moses-kenh malyeyikw artwa ingkart arrpemarl anenh Midian-areny-rnemek. Ra angka ilek-ilek awek, Akngeyelarl arntarnt-arek Moses Israel-kenh-rnem-then, INGKARTelarl Israel-kenh-rnem atnwenhey-alpek Egypt-they.

⁵⁻⁶ Ikwer-penh Jethro-then anewikw Moses-kenh-then alerikw-atherr-then apetyek, Moses aretyek arlpaw-itwek. Moses anenh apwert Akngey-kenh Sinai-itwek apwert aknganenty-itwek. Jethro-el artwa angkakert thwenek

Moses-warl, “Jethro malyey ngkwenh ra apetyeyel ngkweng-warl alerengkw ngkwenh-atherr-then anewengkw ngkwenh-then.”

⁷ Moses malyey ikwerenh-warl arnekerrek. Rap ikwer kwenerrek, renh arrwantyemel-anem. Ratherr angkerrek, “Mwerrang nga?” Rernem kalikw-warl aylpenhek-anem. ⁸ Moses-el Jethro ilek, “INGKARTelarl anwernenhantherr arntarnt-arenh ahelengkw Egypt-areny-rnem-kety. Ra anwernenhantherr arntarnt-arenh apmwangketyarr-angkwarr. Ra anwernenhantherr Egypt-they atnwenhek apwert nhenh-warl.”

⁹ Jethro-el inkwerelhemel awek, INGKARTel renh-rnem arntarnt-arenh Egypt-areny-rnem-kety. ¹⁰ Rap angkek, “Inkwerelhenherr-arey INGKARTek, rarl arrenhantherr arntarnt-arek Pharaoh-kety, ahelengkw Egypt-areny-rnem-kety. ¹¹ Aleyan atha iterl-areyel, INGKART rlterrk innga, INGKART-arrpantey ingwer-rnem arrangkwarl. INGKARTel Egypt-areny-rnem atwek, rernemarl Israel-kenh-rnemek irrpelthirrenh, tnakelhemel.” ¹² Jethro-el aker pwelek aker ingwer-rnem-then akngek Moses-warl-anem. Moses-el aker tyenkerr arrtyemel anthek Akngeyek. Aaron-then artwamp Israel-kenh-rnem-then Jethro-itwek akarirrek. Rernem amern tyenkerr arlkwek, Akngeyek inkwerelhemel.

¹³ Ingwepenh akngerr ingwer-rnem apetyek Moses-warl, ikwer-itwek rtnenherrenh atwerrpek-atwety. Rernem renh ayernenh, angka arratyiletyek ikwer-rnem. ¹⁴ Jethro-el

arek, Moses rarl alakenh angka arratyileh. Ra angkek, "Nthakenh nga irreyelan? Ilekek ntwa angka arratyileyel amentelan, aleth-antey ngenh ayernem, ingwepenh-they atwerrpek-atwety ingkerrenhel?"

15-16 Moses-el renh ilek, "Artwa ingwer atherr ilterrenty-penh, ratherr atyeng-warl apetyem, ayenh ayern-ayntetyek-anem. Ratherr akaltyir-retyek Akngey-kenh-angkwarr. Atha renh-atherr ilem, 'Artwa nhanyem arraty aneyel. Artwa ingwer arraty-weny.' Atha angka arratyilem ikwer-atherr, Akngey-kenh angka anayntilemel. Alakenh-anyem akngerr atyeng-warl apetyem, ayern-ayntetyek."

17-18 Jethro-el Moses ilek, "Nhayman warrk ilkwa ngkweng, ngarl ament warrkirreyleh-angkwarr. Nga alhengkerr anem wenh arlkarewelheyel, ingwer-rnem arlkarewelheyel arrpemarl, ngenh ayerneyel intem-antey, alhengkerr antheyel. **19-20** Awelha atyeng! Atha angka mwerr ngkweng ileyek. Ntwa Akngey ayernetyek ingkerrenhek-antey. Ntwa akalty-antherl-ayntetyek angka Akngey-kenh, iylparrernetyek renh-rnem arraty-angkwarr anetyek wenh. Nga apek atyeng awelhenty, Akngey ngkweng-itwek anayntetyek. **21** Artwa mwerr-rnemant rlwana, artwa mwerr Akngeyek awelhem-rnemant. Rernem irrywerrey-angenh man inetyek, arrangkw. Rernem arraty inngar-nemant ankety-weny. Renh-rnem atyetyart arrerna ingkerrenhek, rernem ingwer-rnem arntarnt-arayntetyek, arlwarey 10-ek apek, 50-ek apek, 100-ek apek, 1000-ek apek. **22** Artwa

atherr ilterrenty-penh, ratherr atyetyart renhtangkwel ayern-ayntetyek. Atyetyartel renh-atherr arternpelenty, kel mwerr. Arrangkwapek, ratherr ilterrenty-antey, kel ratherr atyetyart ilkwewarl alhetyek, ayern-ayntetyek. Atyetyartel renh-atherr arternpelenty, kel mwerr. Alakenh atyetyart ingwer-rnem-angkwarr-tangkwel ratherr arratyilerrem, ngenh arlkarewey-angenh anayntetyek. Arrangkwelan, kel ratherr ngkweng-warl alhetyek, ngenhant ayern-ayntetyek, renh-atherr arratyiletyek. ²³ Ntwa alakenh mpwarenty, Akngeyel ngenh ilenty, ngan mwerr-anem anem alhengkerrerrey-angenh, Israel-kenh-rnem inkwerelhem-anemarl, mwarrant-arey anetyek." Alakenh Jethro-el Moses ilek.

²⁴ Moses malyeyikw ikwerenhek awelhek, alakenh mpwarek rarl renh ilek-angkwarr-antey.

²⁵ Ra rlwanek artwa mwerr-rnem, atyetyart ikwer-rnem rnkernek, atyetyart anetyek arlwarey artwa 10-ek apek, 50-ek apek, 100-ek apek, 1000-ek apek. ²⁶ Rernem aleth-antey angka arratyileneh ikwer-rnem. Angka awerr ayntenty, rernem Moses-warl alhenh, angka arratyiletyek.

²⁷ Moses-el malyeyikw ikwerenh ilek, apmer ikwerenh-warl alpetyek. Rap apmer Midian-warl-anem alpek.

19

INGKART angkeyel Israel-kenh-rnem-warl apwert aknganenty Sinai-itwek

1-2 Israel-kenh-rnem Egypt renh iwerl-alhek-penh, rernem alkent atherrel aleth alhek. Ingwer-ingeran rernem aremerrey-alhek arlpaw-itwek itnan Sinai. Ampepitwek rernem ayntek apmer Rephidim-itwek. Ikwer-penhan rernem apwert Sinai ikweritwek aynteyarr-alpek, apwert impalthel.

3-7 Moses apwert ikwer-warl nganenhek, Akngey awetyek. INGKART apwert irrwerl-they Moses-ek arlek, "Alakenh-anyem nga angketyek Israel-kenh-rnemek Jacob-kenh-rnemek." Ra angka Moses-ek ilek. Kel Moses apwert-they atwarrenhey-alpek. Ra artwamp-rnem akarrelek, rernem angkerretyek. Ra ikwer-rnem ilek, "Alakenh INGKART arrekantherr angkeyel, 'Arrantherr INGKART ayenh arek, atha Egypt-areny-rnem atwek. Arrantherr iterl-areyel, atha arrenhantherr Egypt-they atnwenhey-alpek. Atha arrenhantherr mwerr-angkwarr atnwenhey-alpek apwert nhenh-warl atyeng-warl. Atha arrenhantherr arntarnt-arenh, irretyelarl akwerrk ikwerenh arntarnt-arem-apeny. Alakenhaym atha arrenhantherrenh arntarnt-arenh. Mwerranty atyeng awelhenherr-arey, angka atyenh-rnem mwerr-angkwarr apentemel. Ingkerrenh apmer arrpanenhel aneyel-rnem, atyenh ingkerrenh. Arrantherr Israel-kenh-rnem atyeng awelhenty, atha arrenhantherrenh ayerrpelem, arrantherr atyenh ingkerrenh anem impen mwerr-rnemarl. Arrantherr atyengant awelh-ayntetyek apenterl-ayntetyek. Arrantherr ingkerrenh ingkart-rnem anetyek, atyengant warrkIRR-ayntetyek

intem-antey. Israel-kenh-rnem arrantherr ingkerrenh atyeng-angkwarr mwerr-angkwarr anayntetyek!' ”⁸ Artwamp-rnemel Israel-kenh-rnem angka INGKART-kenh ilek. Rernem apeyalpek, Moses-warl angkek-anem, “Kel mwerr. INGKARTel ilek-angkwarr, anwantherr ikwerant awelhem. Anwantherr anemarl, ikwerant warrkirrem.” Moses ra angkep apwert-warl nganek, INGKART-warl angkek, “Israel-kenh-rnem alakenh angkek, ‘Anwantherr ngkwengant warrkirretyek.’ ”

⁹ INGKART angkek Moses-warl, “Ayeng ngkweng-warl apetyeyenh kwenpay irrpwerl-angkwarr, ayeng ngkweng angketyek. Ingwer-rnemelan awenty-penhan, rernem ngenh iterlarem-anem ngarl atyenh angkakert, rernem ngkwengant awelh-ayntem intem-antey.”

¹⁰⁻¹³ INGKART angkek ikwer-warl, “Israel-kenh-rnem-warl alha, angka atyenh iletyek.” Kel Moses atwarrenhey-alpek apwert-they Israel-kenh-rnem-warl. Ra renh-rnem ilek, “Alakenh INGKARTel arrekantherr ileyel, ‘Arrantherr ingwa atherrel atyeng mpwelhetyek, ayenh aretyek. Pwerlpirretyek. Arnkwa lhewetyek. Ingwa atherr-penh ayeng apetyeyenh irrwerl-they apwert Sinai ikwer-warl. Ingkerrenhel ayenh areyenh, ayengarl irrwerl-they apwert-warl apetyeyenh. Arrer-warl alhewer alhey-angen, apwert aknganenty ikwer-warl, arleng-antey rtnetyek. Ingwerenty apwert ikwerel rtnenty, renh ipmek atwemarl. Arrewaly arney-angen, arrantherrap renh apwertel wetyek, irrryartel apek atantheyek, pewenarrel apek.

Innga, artwa apek apwert aknganentyel rt-nenty, atnwenth apek, renh ipmekarl atwemarl. Terampet arrantherr awentyel, arrantherr alhewer nganetyek apwert-warl.' " Alakenh Moses-el Israel-kenh-rnem ilek.

¹⁴ Angka awek-penh Israel-kenh-rnem pwerlpirrek. Rernem arnkwa lhewek, arnkwa mwerr-angker-warl aylpemel. Rernem arrayt mpwelhenh, INGKART aretyekant-anem.

¹⁵ Moses ikwer-rnem angkek, "Arrantherr ikwer mwantz iterretyek. Artwernemay, anew arrekantherrenh-itwek ingwa atherrel ayntey-angenh mentyarl. Arnkentyel-tangkwel ayntenherr-arey. Arelh-rnemay, ament-tangkwel amperrel ayntenherr-arey." Alakenh angkek Moses Israel-kenh-rnemek. Ingwa atherrel rernem mpwelhek.

¹⁶ Ingwepenh rernem awely-awely arek, artewentyel innga awek. Kwenpay irrpwerlel apwert renh artek-anem. Terampet angkelh-angkelhelerl-anenty awek rernem. Ingkerrenh aterirrek-anem. ¹⁷ Moses-el renh-rnem apmert-they atnwenhenh, rernem anyenterremel Akngeyek-anem mpwelhetyek. Rernem rtnenherrey-alhek apwert arrerentyel.

¹⁸ INGKART irrwerl-they apetyenh apwert-warl rwakert. Kwertel apwert renh artek. Kwert alker-warl-athetk itntenh. Apwert ra akngelhek-anem rlterrk innga. ¹⁹ Terampet ra arnterram-arrnerr angkek. Moses Akngeyek angkek. Moses-el awek kwaty awely-awely angkakert, Akngey artewentyel angkenh ikwer-angkwarr.

20 Innga INGKART ra irrwerl-they apetyek apwert irrwerl-warl. Irrwerl-they ra Moses-ek arlek, "Moses, nganey-alhetyek apwert irrwerl-warl." Kel Moses nganenhek apwert irrwerl-warl. **21** INGKART angkek Moses-ek, "Atwarrenhey-alpa, renh-rnem iley-alpa, 'Arrantherr nthakenh apetyey-angenh apwert-warl, INGKART renh aretyek! Arrantherr alakenh-anyem arenty, arrantherr ilwemarl wenh!" **22** Atyetyart-rnem ilenherr-arey arrpemarl, 'Arrantherr pwerlpirretyek, arnkwa lheweyek, INGKART ikwer arrayt mpwelhem-anem, ra arrenhantherr atwekerr.' "

23 Moses angkek INGKARTek, "Kel mwerr. Arrayt inngarl yanhan. Ingwer-rnem apwert nhenh-warl nthakenh nganey-angenh. Ntwarl arrwekel-antey anwenhantherr ilek, 'Apwert aknganenty nhenh arrer-warl alhey-angenh anetyek.' "

24 INGKART angkek Moses-warl, "Apwert-they atwarreyna, Aaron ingwerl-alpa apwert nhenh-warl. Ingwer-rnem atyetyart-rnem-then ila, 'Arrantherr yanhel-antey mpwelhetyek, apwert nhenh-warl apetyey-angenharl, mentyarl. Arrantherr arrer apetyenty, INGKARTel arrenhantherrehn atwemarl. Arleng-antey anewanenherr-arey.' "

25 Kel Moses atwarrerl-alpek, Israel-kenh-rnem ileyek, INGKARTarl angkek-angkwarr.

20

Akngeyel Moses angka rlterrk 10-pel antheyel

¹ Akngey angkenh Israel-kenh-rnemek alakenh-anyem, ² “Ayengan Akngey arrekantherrenh, itnan INGKARTarl. Atharl arrenhantherrenh Egypt-they atnwenhey-alpek, Egypt-arenyel-rnemarl arrenhantherrenh warrk ilkwa anthenh-kety, arrantherr tyayl-areny-apeny warrkirrenh.

³ Ayengan Akngey arrekantherrenh anem. Arrantherr altyerr-arrpantey ingwer-rnem apentey-angenh anetyek. Atyengant arrantherr inkwerelhetyek.

⁴⁻⁵ Akngey-arrpantey ingwer-rnemel mpwarem apwert-penh arwerl-penh. Rernem altyerr-arrpantey mpwarem irrwerl-areny-apeny apek ahern-areny-apeny apek kwaty-areny-apeny apek. Rernem ikwer-rnem kwenerr-ayntetyek inkwerelhemel. Alakenh-anyem rernem apmwel-ayeth mpwarem atyengety. Alakenh-anyem arrantherr mpwarey-angenh! Akngey-arrpantey arrantherr mpwarey-angenh, kwenerrey-angenh ikwer-rnem. Menty ayntetyek! Ayengan Akngey arrekantherrenh anem, itnan INGKARTarl. Atha arrenhantherr antwerrkeman, atyenh-rnem. Arrantherr atyeng arlkarerrenty, altyerr-arrpantey apenterl-anenty, alakenh-they ayeng arrekantherr ahelerrem. Arrantherr apek alakenh atyengety intwemelerrenty, atha aler arrekantherrenh atwem alhewer, arrengey-rnem-then, artartey-rnem-then atwemarl, ingkern-penh-rnem ingkerrenh atwem alhewer. ⁶ Ingwer-rnemel angka atyenh apenterl-ayntem, rernem atyeng artewentyel ilkelh-ayntem, ayeng

ikwer-rnem ikwer-rnem-kenh-then aleth-antey artewentyel ilkelh-ayntem. Nthakenh atha renh-rnem iwerl-alhey-angenh.

⁷ Itnan atyenh impen. Arrantherr itna atyenh INGKART arwa iley-angenh, arrantherr arraty-angkwarrant itna atyenh ileyek. Arrantherr itna atyenh apmwangkwarr itnewenty, atha arrenthalherr atwem.

⁸ Arrantherr arlta ltyerrey-angker atyenh iterl-ayntetyek. Arlta Saturday anyent impen ikwerel, arrantherr atyengant iterretyek wenh, atyeng iylpelirrey-angenh. ⁹ Arlta 6-ek-atwetyant arrantherr alhewer warrkirk-ayntetyek. ¹⁰ Arlta 7-el impen ltyerrey-angkerarl, arlta atyenharl. Ayengan Akngey arrekantherrenh, itnan INGKARTarl. Arlta ikwerel warrkirrey-angenh anetyek. Angka nhenh ingkerrenhekarl, aler-rnem arrekantherrenhek-then, warrkenh-rnemek-then, pwelek-rnem arrekantherrenhek-then, alethang-rnemek-then rernemarl aneyel arrekantherr-itwek. ¹¹ Awank-akerr atha ingkerrenh arrpmernek arlta 6-ek-atwety. Atha alker-then ahern-then kwaty alay-rnem ingkerrenh-then arrpmernekan. Atha ahernel alheyel-rnem-then alkerel alheyel-rnem-then kwaty-areny-rnem-then atnwenth ingkerrenh arrpmernek. Ikwer-penhan arlta 7 Saturday-elan ayeng ltyerre-anem warrkirrey-angenh-anem anenh. Alakenh atha arlta anyent impen renh itnewek, arrantherr ltyerrayntetyek.

¹² Arrantherr akngeyek-then ameyek-then awelhetyek, rernem arrenenthalherr ilenty. Antwerr alhey-angenh. Arrantherr ikwer-rnem

awelhemel iylpareth anetyek, inkwerelhemel. Arrantherr ikwer-rnem awelhenty, arrantherr arleng-alenty anem apmer ikwer-itwek, atharl arrekantherr anthem.

¹³ Arrantherr ingwer-rnem ipmek atwey-angenh anetyek.

¹⁴ Arrantherr anewikw ingwer-kenh ikngwey-angenh anetyek.

¹⁵ Arrantherr ingwer-kenh ampwal ilek-ilek irryertel iney-angenh anetyek.

¹⁶ Arrantherr court-itwek ingwerenty irry-werremel iley-angenh, arrantherr ingwerenty angka arratyant ileyek.

¹⁷ Arrantherr alharlkwerrey-angenh ingwer-rnemek anetyek. Arrantherr ingwer-kenh apmer-they apek, anewikw-they apek, pwelek-akerr-they, tangkey-akerr-they, warrkenh ikwerenh-they alharlkwerrey-angenh anetyek. Ampwal nhenh-rnem aynteng, ingwer-kenhan aynteyel.

Angka rlterrk nhenh-rnem arrantherr aleth-antey apenterl-ayntetyek ipmey-angenh.”

*INGKART ra Israel-kenh-rnem-warl
arrererreyel, rernem ikwerety aterirreyel*

¹⁸ Israel-kenh-rnem ingkerrenh apwert ikwer-itwek arrerenty rtnenherrenh. Rernem awely-awely awek angkenharl, terampet-anem angkelh-angkelhelenty awek. Kwert-angketyarr rernem apwert-itwek arek. Rernem arek-penhan, rernem aterirrek-anem, arleng-anem rtney-alpek apwert ikwerety. ¹⁹ Rernem Moses-warl angkek, “Ngant anwekantherr

angkey-areny. Akngey apek anwekantherr angkenty, anwantherr ilwekerrarl. Anwantherr ngkwengant awelhem.”

20 Moses ikwer-rnem angkek, “Aterirrey-angenh! Akngey apwert nhenh-warl apetyek, rarl arrenhantherrenh arrkernetyek, arrantherr renh apek apentetyek. Ra ilkelheyel, arrantherr ikwer iterretyek aleth-antey, apmwangkwarr aney-angenh.” **21** Rernem rtnenh apwert ilk-wethey arleng-antey. Moses-ant alhek kwenpay ikwer-warl Akngey-warl. ...

23

Akngey-kenh antyerl Israel-kenh-rnemek yer-lirretyek apmer Canaan-warl

20 ... Akngey angkek Israel-kenh-rnemek, “Atha antyerl arrekantherr-warl thwenetyek, ra arrekantherr-akert yerlirretyek apmer ikwer-warl, atharl awank-akerr arrekantherr anthek-warl. Ra arrenhantherr arntarnt-arayntetyek ahelengkw-rnem-kety. **21** Arrantherr arternpel antyerl ikwer awelhenherr-arey. Ran angkakert atyenah-akert, ament-weny-antey. Arrantherr ikwer irrpeltherrenty, ra arrenhantherr apmwekety arntarnt-arey-angenh. **22** Arrantherr arternp ikwer awelhenty, angka atyenah-angkwarr apententy, ahelengkw ingwer-rnem arrekantherr arrkngert angkentyan, kel atha ahelengkw-rnem atwemarl. **23** Antyerl atyenah

arrwekel yerlirr-ayntem, arrantherr apent-ayntetyek apmer Canaan-warl. Aleyan Amor-areny-rnem, Hitt-kenh-rnem-akerr, Perizz-areny-rnem-akerr, Canaan-areny-rnem-akerr, Hivite-areny-rnem-akerr, Jebus-areny-rnem-akerr rernem anew-aneyel. Atha renh-rnem irralkemel ilwerl-atheneyen. ²⁴ Yanh-areny-rnemel mpwarem altyerr-arrpanney-rnem apwert-penh arwerl-penh-then gold-penh-then. Altyerr-arrpanney-rnem ikwer-rnem-kenhek kwenerrey-angenharl anetyek arrantherr, angka ikwer-rnem-kenhek awelhey-angenh anetyek. Altyerr-arrpanney-rnem ikwer-rnem-kenh ingkerrenh ngkweltyeletyek. Apwert arlpenty-rnem ikwer-rnem-kenh ingkerrenh ngkweltyeletyek arrpemarl. ²⁵ Arrantherr ayenh apenterl-ayntetyek inkwerelhemel. Ayeng Akngey arrekantherrenh, itnan INGKARTarl. Arrantherr ayenh apententy, atha arrekanther amern akngerr anthem kwaty-then-antey. Arrantherr arntetyerrey-angen. ²⁶ Arrantherr ingkerrenh arleng-alenty anerl-ayntem. Arelh ingkerrenh mwerr anerl-ayntem, arntetyerrey-angen. Ampa akely-rnem mwerr anerl-ayntem arntety-weny. Ampa akngerr atha arrenhantherr anthem.”

²⁷ INGKART angkek Israel-kenh-rnemek, “Arrantherr Canaan-warl alhentyel, arrantherr tawen arrpanenh-warl alhey-alenty, atha tawen-areny-rnem ater-antheyen. Rernem ingkerrenh anterreyen arrekantherret. ²⁸ Atha ingwer-rnem Hivite-areny-rnem Canaan-areny-rnem-then Hitt-kenh-rnem-then irrenteyen,

arrantherr apmer ikwer-rnem-kenh-warl alhey-alenty. ²⁹ Arrantherr Canaan-warl alhey-alenty, atha apek renh-rnem irrentey-angenh aherrety anyentel, menty. Apmer ingkeny, werrk-apeny, atnwenth ateralth-angketyarr, apmer alther. Alakenh atha apmer-areny-rnem Canaan-they irrenterl-ayntem arternpel-antey. ³⁰ Atha renh-rnem irrpetyarl-irrpetyarl irrenterl-ayntem wenh, arrantherr akngerrelan apmer renh inemarl, apmer mwerr arntarnt-arayntemel."

³¹ INGKART angkek Israel-kenh-rnemek, "Apmer arrekantherrenh Canaan-ampeny kwaty alay Apenng-angketyarr-they altwerl ayerrer ayntayntem. Apmer kwaty alay itna Ilkwarl-they akngerrakw ayntayntem. Apmer arlpaw itna Sinai-they ayerrer ayntayntem. Apmer kwaty lher Euphrates-they antekerr ayntayntem. Apmer Canaan ampepelarl. Atha arrenhantherr rlterrakilem, arrantherr-anem yanh-areny-rnem Canaan-they irrenterl-ayntem. ³² Ikwer-rnem alakenh angkey-angenh, 'Anwantherr apmer nhenhel arrekantherritwek mwarrant-arey anetyek, atwerrey-angenh anetyek.' Menty. Alakenh ikwer-rnem angkey-angenh. Apmer nharen-y-rnem-kety amenterretyek, altyerr-arrpantey-rnem ikwer-rnem-kenh-kety-then. ³³ Canaan-el apmer arrekantherrenhel rernem ilkelhem anayntetyek. Menty. Nthakenh rernem aney-angenh, arrangkw. Arrngert angkenherr-arey. Rernem arrenhantherrenh apmwangkwarr ilekerr. Rernem altyerr-arrpantey-rnem apenteyel. Rernem arrenhantherrenh-anem

ilanthekerr, arrantherr altyerr-arrpantey-rnem apenterl-ayntetyek. Rernem arrenhantherrenh arrkernekerr, arrantherr apmwangkwarr apenterl-ayntetyek.”

24

Israel-kenh-rnemel Moses ileyel, “INGKARTel anwenhantherr ilek-angkwarr, anwantherr ikwer awelhetyek”

¹ INGKARTel Moses ilek apwert irrwerl-they, “Aaron, Nadab-then, Abihu-then artwamp 70-pel Israel-kenh-rnem-then renh-rnem ingwerl-alpa wenh, atyeng-warl apetyetyek. Arrer-apeny apetyey-angenh. Atyengety arleng-antey anetyek kwenerremel. ² Moses, nga anyentant atyeng-warl arrer-apeny apetya. Israel-kenh-rnem ingwer-rnem ilenherr-arey, apwert-warl nganey-angenh anetyek.”

³ Moses alpek ikwer-rnem-warl, angkakert INGKART-kenh. Rernem ikwer angkek, “Alakenhaym mwerrarl wenh. INGKARTel ngkweng-angkwarr angka ilem, anwantherr awelhemarl.”

⁴ Moses-el pip-warl ingkwernek, INGKARTel renh ilek-angkwarr. Ingwepenh ra apwert akely-rnem akarrelek, akerek-arelh mpwarek INGKARTek. Renh rnkernek-anem apwert Sinai arrerenty ikwer-itwek. Apwert arlpenty ingwer-rnem 12 ra rnkerneynek akert-arraty. Apwert-rnem 12-pel ileyel, Israel-kenh-rnem 12-pel amentewament rernem iterl-arayntetyek. ⁵ Moses-el artwa akely-rnem thwenek, aker atwetyek. Aker

pwelek-rnem rernem apwert-rnem-itwek ampernek. Rernem INGKARTek arrtyemel aker tyenkerr anthek, ikwer inkwerelhemel. Aker ingwer-rnem ingkerrenhel arlkwek, mwerr ingkerr rernem anew-anenh INGKARTek. ⁶ Aker rernem atwek-penh, Moses-el arrnga aker-penh inpek, arlengarr-rnem-warl amentew-ament theleynek. Arrnga ingwer-rneman ra apwert-rnem-warl akerek-arelh-warl theleynek. ⁷ Moses-el pip-anem inek, Akngey-kenh angkernem-akert, ra atayel-antey innga reytemilek, ingkerrenhel Akngey-kenh angka awetyek. Rernem ikwer angkek, “Ilek-ilek INGKART-kenh angka pip nhenh-itwek ayntem, anwantherr ikwer awelhem.”

⁸ Moses-el arlengarr-rnem arrnga-akert inek, ra arrnga ikwerel arlperryt iwek ikwer-rnem-warl, irrpelhelek renh-rnem arrngel INGKART-kenh-angkwarr. Ra ikwer-rnem angkek, “INGKARTel anwenhantherr alhelek, rarl anwenhantherr aleth-antey arntarnt-arayntem. Arrantherr alhelek arrpemarl, arrantherr angka ingkerrenh apenterl-ayntetyek pip nhenh-itwek. Alakenh-they atha arrekantherr-warl arrnganem iwek.”

⁹ Moses Aaron-then Aaron-kenh alerikwatherr Nadab-then Abihu-then artwamp 70-pel-then Israel-kenh-rnem rernem apwert irrwerl-warl nganek, Akngey renh awetyek. ¹⁰ Apwert ikwer-itwek rernem Akngey Israel-kenh-rnem-kenh renh arey-alhek. Ingka Akngey-kenh kweneng-ampeny-itwek iwerr-apeny ayntenhekarl rernem arek, iwerr ra arrtyernek

alker-apeny, apwert turquoise-apeny. ¹¹ Arraty innga! Artwamp-rnem Israel-kenh-rnem rernem Akngey anngel innga-antey arek! Alhewer rernem arek renh, ranap atwey-angenh-antey renh-rnem mwerr-antey. Ikwer-penh rernem amern arlkwek, kwaty-then antywemel.

INGKARTel Moses-ek apwert ilperr-ilperr atherr angkakert antheyel

¹² INGKART angkek Moses-ek, “Atyeng-warl nganenhey-alha. Mpwelha-anem atyeng, atha ngenh apwert ilperr-ilperr atherr anthetyek. Apwert atherr-itwek atha ingkwernek angkernem, ingwer-rnemel reytemilemel akaltyerrerl-ayntetyek.”

¹³⁻¹⁴ Ikwer-penhan Moses artwamp-rnem-warl angkek, “Arrantherr mpwelhenherr-arey nhenhitwek. Aaron-atherr Hur-atherr arteny mpwelhayntem arrpemarl, ratherr ament angka arratyiletyek ingwer-rnemek ingkernan, aylanth alhemarl-kety. Joshua-ant atyeng-itwek apetyetyek wenh.” Kwertengerl Moses-kenh itnan Joshua. Moses-el Joshua ikngwek, ratherr atherr-antey apwert-warl nganenhek, apwert Akngey-kenh. Moses-el Joshua ampep-warl arrernenhek-anem, ra apwert irrwerl-warl nganenhek ament-anem.

¹⁵ Moses apwert-warl nganenhek, kwenpayel apwert ingkerrenh artenhek-anem. ¹⁶ Innga, INGKART irrwerl-they kwenerrek-anem apwert irrwerl-warl, lyenenty rlterrk ilkwakert arrtyernenh. Kwenpayel apwert renh artek arlta 7-ek-atwety. Arlta ingkernelan INGKART Moses-

ek arlkek kwenpay-they. ¹⁷ Israel-kenh-rnem rwa lherrm-apeny apwert irrwerl-itwek rernem arenh. ¹⁸ Moses anenh apwert ikwer-itwek, kwenpayel apwert artek. Ra anenh apwert-itwek arlta 40-ek-atwety. ...

31

INGKARTel Israel-kenh-rnem ileyel, Saturday arlta impen ikwerel warrkirrey-anengh anetyek

¹² ... INGKART Moses-ek angkek, ¹³ “Israel-kenh-rnem alakenh ila, ‘Arrantherr angka INGKART-kenh apenterl-ayntetyek Saturday ikwer, arlta impen INGKART-kenh ltyerreyangker. Saturday arrpanenhel arrantherr ltyerretyek, INGKARTek iterrerl-ayntetyek. Ikwer-penhan arrantherr renh iterl-arayntetyek, rarl arrenhantherr arratyilek. Arrantherr mwerr anerl-ayntem INGKART-kenh-angkwarr. Aler arrekantherrenh-rnem-then, arrengey-rnem-then, artartey-rnem-then rernem iterl-arayntetyek arrpemarl aleth-antey. Alakenh-anyem arrantherr mwerr INGKARTek anerl-ayntetyek intem-antey, INGKART-kenh-anem anem.

¹⁴ Saturday ament arlta ingwer-apeny-weny, arrangkw. Saturday-an INGKART-kenh arlta impen. Ingwerentyel apek Saturday-el warrkirrem, arrantherr artwa renh ipmek atwetyek. ¹⁵ Warrkirretyek Sunday-they Friday-ek-atwetyant arlta 6-ek-atwetyant. Alakenhan mwerrarl. Saturday arrpanenhel ltyerryntetyek warrkirrey-anengh. Arlta

Saturday-el arrantherr INGKARTek iterr-ayntetyek inkwerelhemel. Ingwerenty apek Saturday-el warrkirrenty, ipmek-antey renh atwem. ¹⁶ Saturday arrpanenhel arrantherr ltyerryntetyek warrkirrey-angenh. Arrantherr INGKARTek iterr-ayntetyek inkwerelhemel, ingkern-penhel-rnem arrpemarl aleth-antey. ¹⁷ Arrantherr INGKARTek atyeng Saturday arrpanenhel iterrel-ayntetyek aleth-antey, atha arrenhantherrenh aleth-antey arntarnt-arayntem. Arrantherr iterl-areyel, alker-then ahern-then ingkerrenh atha arrpmernek arlta 6-ek-atwety. Arlta 7-elan ayeng warrkirrey-angenh ipmelhek, arwa-anem anek ltyerremel. Alakenh arrantherr ayenh iterl-arayntetyek intem-antey, ingkern-pen-hrnem rernem ayenh iterl-arayntetyek arrpemarl intem-antey.' "

¹⁸ INGKART ipmelhek-anem Moses-warl angkenh-penh Sinai apwert-itwek. Akngey ra angka apwert ilperr-ilperr atherr-warl arrwekel-antey ingkwernek iltyel. Ra Moses-ek apwert ilperr-ilperr atherr anthek, angka ikwerenh-akert.

32

Israel-kenh-rnem kwenerreyel pwelek irrwey gold-penh mpwarek-itwek

¹ Moses apwert Sinai-itwek arleng-alenty anenh-antey. Israel-kenh-rnem alhek Aaron-warl, rernem renh ayernek, "Aytteyengkw Moses-alew? Nthakenh ra irrek? Ilek-kety ra apey-alpey-angenh? Artwa rarl anwenhan-therr Egypt-they atnwenhek. Ilwek apek ra.

Aaron-ay! Ilengem ntwa anwekantherr mpwara arwerl-penh apek, apwert-penh apek, ra altyerr anwekantherr anetyek. Ra ilayntetyek apek, nthenh-angkwarr anwantherr alhetyek.”

² Aaron angkek ikwer-rnemek, “Iylpek-arelh-rnem gold-penh arelh arrekantherrenh-kenh atyeng anthenherr-arey, aler arrekantherrenh-kenh-then.” ³ Rernemap iylpek-arelh-rnem akngetyek, Aaron-ek anthek. ⁴ Aaron-el iylpek-arelh-rnem akngerr arrernekk tyampit ilkwe-warl. Tyampit ilkwa rwitwek arrernekk irrng-werretyek. Ra gold renh-anem ipert pwelek-apeny-warl thelek, pwelek irrwey-arrpantey gold-penh mpwarek. Israel-kenh-rnemel arek-penh, rernem angkerrek, “Israel-kenh-rnemay! Nhenh arenherr-arey! Akngey nhanyemelan anwenhantherrenh Egypt-they atnwenhey-alpek nhenh-warl!”

⁵ Aaron-el awek-penh, ra apwert-rnem arrernekk amperneyek-arelh, pwelek ikwer-itwek arrwekel-apenyek. Ra angkek ikwer-rnemek, “Ingwelarreng anwantherr anyenterretseyek kwenty arlkwetyek. Anwantherr rntwetyek aylelhemel INGKARTek inkwerelhemel!” ⁶ Arlta ingwerelan Israel-kenh-rnem ingwepenh-antey akemerr-ayntek, rernem pwelek-rnem inek atwemel-anem. Pwelek ingwer-rnem arrangkwirremel ampek, INGKARTek inkwerelhetyek-arrpantey. Pwelek ingwer-rnem rernem irrnyewek, aker ampernemel arlkwetyek, INGKARTek inkwerelhetyek-arrpantey. Rernem aker arlkwenh, ngkwarl wayn-then antywemel, terangk irrenh. Ikwer-

penh rernem arelh-rnem mpweny ingwerl-alhenh, artnewarl anterrenh.

⁷ INGKART angkek Moses-ek, "Anamerlantey apwert-they alpa ngkwenh-rnem-warl, ntwarl Egypt-they renh-rnem atnwenhey-alpek. Rernem apmwererrek-anem. ⁸ Rernem angka atyenhek awelhey-angenh-anem menty anek, apmwel-areth mpwarek. Rernemap pwelek irrwey gold-penh mpwarek. Aker-anem rernem ampernek, pwelek ikwer anthemel. Rernem ikwer kwenerr-ayntetyek inkwerelhemel. Rernem angkerrek alakenh, 'Israel-kenh-rnemay! Nhenh arenherr-arey! Akngey nhanyemelan anwenhantherrenh Egypt-they atnwenhey-alpek nhenh-warl!'"

⁹ Ikwer-penh INGKART angkek Moses-ek, "Atha weth-rnem iterl-areyel, rernem awerr innga, iylpelant awem. ¹⁰ Ayeng ikwer-rnem ahelerreyel, atha renh-rnem ywerrelhilemel atweyen. Atyeng arrngert angkey-angenh! Atha anewengkw ngkwenh alerengkw ngkwenh-atherr-then nthakenh ipma atwey-angenh, arrangkw. Ngkwenh-rnem-theyarl akngerram-akngerr irreyen."

¹¹ Moses-el ampermgerremel ayernek INGKART, "INGKARTay! Ahelerrey-angenh ngkwenh-rnemek. Weth-rnem ntwa atnwenhey-alpek Egypt-they arawerrng rlterrkel.

¹² Ntwa renh-rnem attwenty, Egypt-arenynem alakenh ngkweng irrpelthirrekerr, 'INGKARTel ikwerenh-rnem atnwenhey-alpek Egypt-they apmer arlpaw-warl, renh-rnem ilwerl-athenetyek apwert-itwek!' Menty, nga

ahelerrey-angenh ngkwenh-rnemek, renh-rnem atwey-angenh! ¹³ Abraham-ek-then Isaac-ek-then Jacob-ek-then iterra! Awank-akerr ntwa alhelenh ikwer-rnem angkemel, 'Ntwa alerengkw-then artartey-rnem-then arrengey-rnem-then akngerr atnyenem. Rernem akngerr innga aneyenh, antyarr alkerel aneyel-apeny. Atha apmer Canaan ikwer-rnem anthem, ikwer-rnem aleth-antey ayntetyek.' Alakenh-anyem ntwa renh-rnem alhelek." ¹⁴ INGKARTel Moses awek-penh, ra ingwer-angkwarr-anem iterrek. INGKARTel ikwerenh-rnem ywerrelhilemel atwey-angenh.

¹⁵ Ikwer-penhan Moses atwarrerl-alhek apwert-they, ra apwert ilperr-ilperr atherr akngeynek. Apwert ikwer-atherr-itwek INGKARTel arrwekel angka ikwerenh ingkwernek atherr-angkwarr-antey arrwekel-ampeny-then ingkern-ampeny-then. ¹⁶ Moses-elan apwert atherr mpwarey-angenh arrangkw, Akngeyelant arrwekel-antey apwert atherr mpwarek, ra angka ikwerenh-rnem apwert atherr-itwek ingkwernek.

¹⁷ Moses apwert-they atwarreynenh-antey, ra Joshua rlwatek ampep-itwek. Rernem apmer arrerirrek-anem. Joshua-el awek, ingkerrenharl arlkenh. Ra angkek Moses-ek, "Awa! Israel-kenh-rnem apek atwerreyel!"

¹⁸ Moses angkek Joshua-ek, "Arrangkw. Israel-kenh-rnem inkwerelhey-angenh, rernem atwerrenty-penh. Rernem artney-angenh, rernem atwerrenty-penh. Atha renh-rnem aweyelarl, rernem aylelherreyel."

¹⁹ Moses arrer-anemirrek ikwer-rnem-warl, ra pwelek irrwey gold-penh arek. Ra ingwer-rnem arek rntwerl-anenty. Ra ikwer-rnem ahelerrek-anem. Ra apwert atherr ahern-warl iwek. Apwert atherr akelhek-anem apwert Sinai impalth-itwek. ²⁰ Ikwer-penhan ra pwelek gold-penh renh inek. Ra rwewarl iwek, gold kwaty-apeny irrnngwerrenhek. Ikwer-penhan ra gold ahern-warl thelek, irrernterretyek. Ikwer-penhan ra gold ngkweltyelek lher-apeny-anem. Gold renh inek, kwaty-warl ra iwemel. Israel-kenh-rnem ra ilek, "Arrantherr kwaty gold ikwer-akert antywetyek."

²¹ Moses Aaron-warl angkek, "Ilek ntwa weth-rnem akngartewek INGKART-kety pwelek nhenh-warl? Alakenhaym apmwarl! Rernem artewentyel apmwelhelek."

²² Aaron angkek Moses-warl, "Nga atyetyart atyenh. Atyeng ahelerrey-angen. Ntwa renh-rnem iterl-areyel, rernem apmwangkwarr iter-reyel aleth-antey. ²³ Rernem atyeng angkek alakenh, 'Ateyengkw Moses nthakenh irrek? Ilek-kety ra apey-alpey-angen? Artwa weth ra anwenhantherrenh Egypt-they atnwenhey-alpek. Ilwek apek ra. Aaron-ay! Ilengem ntwa anwekantherr mpwara arwerl-penh apek apwert-penh apek, ra altyerr anwekantherr anetyek. Ra ilayntetyek apek nthenh-angkwarr anwantherr alhetyek.' ²⁴ Ayeng Israel-kenh-rnemek angkek, 'Gold iylpek-arelh-rnem arrekantherrenh-they lhelenherr-arey, ilek-ilek gold-penh-then. Ayenh-anem anthemel.' Ingkerrenh-antey gold-penh rernem atyeng anthek ampwal ilek-ilek. Gold-

rnem atha rwewarl iwek, pwelek irrwey-anem rwethay tyerrelhenhey-ayntek!"

²⁵ Moses ra renh-rnem arenh, arwengk-apeny arlkenty. Aaron ra renh-rnem iltey-angenh arrangkw. Moses ament angkek, "Ingwerel-rnem atherrelhelekerr, anwekantherr arlkwentey-angenh-rnem."

²⁶ Moses arriw ilkwa-itwek rtney-alhek. Ra ingkerrenhek arlek, "Ingwer-rnemel apek INGKART apentetyek ilkelhem, atyeng-angkwarr apetyetyek!" Levi-kenh-rneman rernem Moses-itwek rtney-alhek.

²⁷ Ikwer-penhan Moses Levi-kenh-rnemek angkek, "INGKART Akngey Israel-kenh-rnem-kenh alakenh-anyem ra arrenhantherr ileyel, 'Artwernem, arrantherr inkwartey inenherr-arey! Apmer-warl alhemel awayengkw-rnem-then ayteyengkw-rnem-then arrantherr iterl-areyel ingwer-rnem-then ingkerrenh ipmek atwetyek.'"²⁸ Levi-kenh-rnem rernem Moses-ek awelhek. Rernem inkwartey-rnem inek, 3,000 innga rernem ipmek atwek.

²⁹ Moses Levi-kenh-rnemek angkek, "Lyertan INGKART-angkwarr anetyek arrantherr, atyetyart arrantherr anayntetyek, INGKART ikwer warrkirk-ayntetyek. Arrantherr ikwer awelhek, awayengkw-rnem-then ayteyengkw-rnem-then alerengkw-rnem-then ipmek atwek. Alakenh-they INGKART arrekantherr inkwerelhek."

³⁰ Arlta ingwerelan Moses angkek Israel-kenh-rnemek, "Arrantherr apmwangkwarr mpwarek. Lyert atha INGKART ayernem arrekantherr. Ayeng ikwer-warl angkenty, ra arrekantherr

ahelerrey-angenh anetyek, apmwa arrekanther-rety iwetyek, arrantherr apek ikwerenh-anem arrpemarl anem.” ³¹ Moses alhek INGKART-warl ayernetyek, “Weth-rnemel apmwel-areth mpwarek. Rernem pwelek gold-penh mpwarek, ikwer kwenirr-ayntetyek inkwerelhemel. ³² Irrepern-rnem atwey-angenh. Menty rernem anetyek. Renh-rnem angkep atwey-angenh, rernem apmwel-areth mpwarek-penh. Renh-rnem atwey-angenh, ayenhant ntwa atwetyek. Ayenh ntwa katy atwetyek, menty ingwer-rnem aney-akenh. Ayeng ikwer-rnem katy ilwetyek. Itna atyenh ipara pip ilkwa ngkwenh-they, ntwarl itna atyenh ingkwernek ingwer-rnem-then, rernem ngkwenh-rnem intem-antey anetyek.”

³³ INGKART Moses-ek angkek, “Ingwer apek apmwangkwarr alhenty, atyeng ilkelhey-angenh, atha itna ikwerenh pip ikwer-they iparem. ³⁴ Israel-kenh-rnem-warl alpa, atnwenha renh-rnem apmer atha alhelek-warl, atha ngenh arrwekel-antey ilek-warl. Antyerl atyenh arrekantherr yerlirrem, iwerr arrekantherr iylparrernetyek, apmer ikwer-warl alpetyek. Apmwel-areth aneyel-rnem atha ingwer-inger atwemant-anem.” ³⁵ INGKARTel Israel-kenh-rnem arntety ilkwa anthek, rernem apmwel-areth mpwarek-they.

33

¹ INGKART angkek Moses-warl, “Apmer nhenh iwerl-alhenherr-arey, nga-then ingwer-rnem-then, ntwarl renh-rnem Egypt-they atnwenhek. Alhenherr-arey apmer ikwer-warl, atharl

Exodus 33:2

civ

Exodus 33:7

arrwekel-antey alhelek Abraham-ek-rnem-then Isaac-ek-rnem-then Jacob-ek-rnem. ² Atha arrwekel-antey antyerl thwenem arrekantherr-warl yanh-areny-rnem irrentetyek, Canaan-areny-rnem, Amor-areny-rnem-then, Hitt-kenh-rnem-then, Perizz-areny-rnem-then, Hiv-areny-rnem-then, Jebus-areny-rnem-then. ³ Alhenherr-arey apmer ikwer-warl, amern-angketyarr-warl arwengalker-angketyarr-warl. Nthakenh ayeng arrekantherr-itwek alhey-angenh, arranther awerr-rnemarl wethey, atyeng awelhey-angenh. Ayeng arrekantherr alhenty apmer ikwer-warl, atha ampepel apek arrenhantherr ilwerl-athenekerr."

⁴⁻⁶ Arrwekel-antey INGKART Moses-ek angkek, "Angka nhenh Israel-kenh-rnem ila." Kel Moses Israel-kenh-rnemek angkek, "Alakenh INGKARTel arrenhantherr ileyel, 'Arranther awerr innga. Ayeng apek arrekantherr-angkwarr alhenty, atha apek arrenhantherr ilwerl-athenekerr. Ampwal-rnem iylpek-arelh-rnem-then nikleth-rnem-then akwek-arelh-rnem-then lhelenherr-arey. Alerl ayeng iterrey, nthakenh atha ileman.'" Angka nhenh awek-pennh, rernem ampwal-rnem lhelek apwert itna Sinai-itwek. Rernem amperrngerrek, ampwal-rnem angkep arrerneyney-angenh-anemarl.

INGKART Moses-warl angkeyel kalikw-itwek

⁷ Moses-el apmelerr kalikw artenh, apmer-they arleng. Kalikw renh itnewek, "Kalikw-itwek INGKART ayernetyek". Ingwerentyel INGKART ayernetyek, rap alhem kalikw

ikwer-warl, apmer-they akwerr-ampeny-warl. ⁸ Moses kalikw-warl alhenhel, rernem arriw-ampeny kalikw akely-rnem-itwek rtney-alhenh. Rernem Moses intwarenh, kalikw-warl aylpenharl. ⁹ Moses kalikw-warl aylpenhel, kwenpay arlpenty apetyek irrwerl-they, arriw-ampeny-itwek artenh. Kwenpay ikwer-they INGKART Moses-warl angkenh. ¹⁰ Kwenpay renh arenh kalikw arriw-itwek, ingkerrenhel apmelerr kalikw arriw ikwer-rnem-kenh-itwek rtnenh, INGKARTek kwenerretyek. ¹¹ INGKART Moses-warl kalikw-itwek angkenh. Ratherr arerrenhant-atherr angkerremel. Ikwer-penh Moses apmer-warl alpenh. Joshua ra kalikw ikwer-itwek apmelerr arteny anenh alpey-angenh. Joshua Nun-kenh alerikw anenh, ra kwertengerl Moses-kenh anenh.

*INGKARTel alheleyel, ra ikwerenh-rnem-itwek
anayntetyek, rernem alperlewetyek*

¹² Ingwer-inger Moses-el INGKART ayernek, “Ntwa ayenh arrwekel-antey alakenh ilek, ‘Atha ngenh Moses iterl-areyel, ayeng inkwerelheyel ngkweng.’ Ntwa ayenh ilek arrpemarl, ‘Ntwa nhenn-rnem atnwenheynetyek apmer ingwer-warl-anem.’ Kel atha ngenh lyert ayernetyek, ‘Angwenh ntwa thwenem, atyeng-angkwarr ilk-watherr?’ Ntwa ayenh iley-angenh-antey. ¹³ Nga atyeng inkwerelhentyan, ntwa ayenh ngkwenn-angkwarr akalty-antha. Atha ngenh iterl-aretyek. Ayeng ilkelheyel, nga atyeng intem-antey inkwerelh-ayntetyek. Nhenh-rnemek

iterra iylpelerrey-angenh-antey. Ntwa renh-rnem ayerrpelek, ngkwenh-rnem anayntetyek.”

¹⁴ INGKART angkek Moses-warl, “Ayeng arrekantherr-angkwarr alhem. Arrantherr mwarrant-arey anetyek, ahelengkw-rnem nthakenh arrekantherr atwerrey-angenh.”

¹⁵ Moses ikwer-warl angkek, “Nga anwekantherr yerlirrey-angenh apek, ntwa anwenhantherr apmer ingwer-warl thweney-angenh anetyek. ¹⁶ Nga anwekantherr yerlirrenty, ingwer-arenyel-rnem iterl-arayntetyek, ngarl anwekantherr inkwerelheyel. Anwantherr ngkwenh-rnemarl impenarl, ingwer-rnem arrangkwarl.”

¹⁷ INGKART angkek Moses-ek, “Alakenh mwerr. Nga mwerr innga angkek. Atha ngenh Moses iterl-areyel innga, ayeng ngkweng inkwerelheyel. Alakenh-they ayeng arrekantherr-angkwarr alhem ilkwatherr.”

¹⁸ Moses angkek INGKART-warl, “Atha ngenh arem, arawerrng rlterrkel lyenenty arrtyer-nenty.”

¹⁹ INGKART angkek ikwer-warl, “Ya. Ayeng ngkweng-angkwarr rwaylpenhem. Ayeng ngkweng aremirrem. Ntwa aretyek, ayengarl mwerr-angker innga. Ayeng ngkweng itna mwerr-angker atyen-h-anem illehetyek. Itnan atyen INGKART. Ayeng ilkelhenty atha ingwer-rnemek amperrngirremel arntarnt-arem arrpemarl. ²⁰ Ayeng ngkweng aremirretyek. Nthakenh ayeng inngerr aremerrey-angenh ngkweng-warl. Ingwerentyel inngerr ayenh arenty, rap

ilwemarl. ²¹ Ay, apwert nhak aray. Apwert ikwer-itwek rtnerl-alha. ²² Atha arrty-erneyenh rlterrk ilkwakert apwert-angkwarr anper-alhentyel. Ayeng anper-alhey-alentyarl, atha ngenh apwert intey-warl ikwer-itwek akwernem, atha ngenh ilytel arteyenh. ²³ Atha ngenh arteyenh-tangkwel, ikwer-penh altywer-ilem arrpemarl, ntwap artepant-anem ayenh intwareyehan.”

34

Moses-el apwert ilperr-ilperr atherr mpwareyel arrpemarl, INGKART-kenh angka ingkwernetyek

¹ INGKART angkek Moses-warl, “Apwert ilperr-ilperr atherr akaltha, atharl ingwer weth arrwekel-antey mpwarek-apeny. Apwert ingwer atherr angkakert ntwa iwek, ratherrap akelhek-anem. Atha apwert ilperr-ilperr atherr-warl irrkaty-angkarr ingkwernetyek. ² Ingwepenh-antey apwert ilperr-ilperr atherr akngetya apwert itna Sinai-warl. Ayeng ngkweng-warl apwert irrwerl-itwek angketyek. ³ Ingwerenty akngetyey-angenh, ngant apetya. Ingwer-rnem ila, ‘Apwert nhenh-warl apetyekerr!’ Yep-yep-rnem-then pwelek-rnem-then renh-rnem antwerrketyek, atherrk apwert ilkwa-angkwarr rernem arlkweynekerr.”

⁴ Moses-el apwert ilperr-ilperr atherr akaltheke. Ingwepenh ra apwert Sinai-warl nganek apwert ilperr-ilperr atherr-akert. Alakenh INGKARTel renh arrwekel ilek-angkwarr. ⁵ INGKART

kwenpay-angkwarr Sinai apwert-warl apetyek. Ran apetyek, Moses-itwek arrer rtney-alhek. Ra itnewelhek INGKART. ⁶ Moses-warl arrwekelampeny-itwek ra anper-alhek. Ra ikwer-warl angkek, "Ayeng INGKART, Akngey innga. Ayeng aleth amperrngerreyel ingkerrenhek, ayeng mwerr innga iterreyel ikwer-rnemek. Rernem apmwel-areth atyeng anem, ayeng anamerl ahelerrey-angenh ikwer-rnemek, arrangkw. Ayeng ikwer-rnem artewentyel ilkelheyel-antey. Atha renh-rnem alhelenty, nthakenh ayeng ingwer-angkwarr iterrey-angenh. Ayeng arrayt ikwer-rnem-warl angkem aleth. ⁷ Alakenh-anyem innga. Ayeng mwerr ingkerrenhek aneyel. Rernem apmwel-ayeth atyengety anenty, ikwer-penh rernem atyeng-warl apey-alpenty, atha renh-rnem irrentey-angenh, arrangkw. Menty, atha renh-rnem angkep atwey-angenh. Ayeng ikwer-rnem inkwerelheyel inngey. Ingwer-rnem apek apmwangkwarr aleth anenty, angkeperrey-angenh, atha renh-rnem inngarl atwem, alerikw-rnem-then arrengey-rnem-then artartey-rnem-then ingkerrenh-antey atha aleth-antey irrwampenh-anthemel atwem arrpemarl."

⁸ Moses anamerl-antey ahern-itwek kwen-errek, ampwethel arrernalhek, Akngey-warl inkwerelhemel angkek. ⁹ Moses angkek ikwer-warl, "INGKARTay, nga apek atyeng inkwerelhenty, anwekantherr-angkwarr alhayntetyek. Rernem awerr innga, iylpelant awem. Apmwa anwekantherrenh iwa, angkep atwey-angenh. Anwenhantherr intem-antey atnyena, anwan-therr ngkwenh-rnem anetyek."

10 INGKART angkek-anem, “Atha arrenhantherr innga alhelem. Rernem ayenh areyenh, ayengarl ilek-ilek mpwarey-angker arawerrng rlterrk-akert, arrantherr aketh-antey aretyek. Arrwekel ingwer-rnemel arey-angenh alakenh-anyem. Ingwer-rnem arrekantherr-itwek aneyel-rnemel areyenh arrpemarl.

11 Arrantherr angka atyenhek awelhetyek, atharl lyert ilem. Atha Amor-areny-rnem, Canaan-areny-rnem-then, Hitt-kenh-rnem, Perizz-areny-rnem, Hiv-areny-rnem, Jebus-areny-rnem-then ingkerrenh irrenteyen apmer ikwer-they, apmer atharl arrwekel arrekantherr alhelek.

12 Arrantherr apmer Canaan-warl alhentyel, mwanty arntarnt-arelhemele anayntetyek yanh-rnem-kety, mwarrant-arey arrantherr aney-angenh ikwer-rnem-itwel, rernem arrenhantherrenh apmwangkwarranem akngartewekerr.

13 Tyaty-arrpantey-rnem rernem mpwarek. Ampwal akerek-arelh-then apwert impen-rnem-then rernem tyaty kwen-itwek rnkernek, ampwal arlpenty-rnem-then. Rernem altyerr-arrpantey-rnem ilek-ilek apenteyel. Ingkerrenh ngkweltyeletyek atakemel, ampwal akerek-arelh-rnem-then, apwert impen-rnem-then, ampwal arlpenty-rnem-then.

14 Ayengan INGKARTarl. Arrantherr altyerr-arrpantey-rnemek kwenirrey-angenh anetyek. Arrantherr atyengant awelh-ayntetyek.”

15 INGKART angkek, “Mwantyel arntarnt-arelheneherr-arey yanh-rnem-kety. Mwarrant-arey arrantherr apmer ikwer-areny-rnem-itwek

aney-angenh. Rernem altyerr-arrpanney-rnem apent-ayntem apmwangkwarr. Rernem aker tyenkerr arrtyemel anthem altyerr-arrpanney-rnemek. Arrenhantherr apmwangkwarr angkepilekerr, Menty awenh-arey! ¹⁶ Artwa aler arrekantherrenh-rnem kwey aleyak ikwer-rnem-kenh-itwek itengerrey-angenh anetyek. Aleyak ikwer-rnem-kenh altyerrekk-arrpanney kwenerremel tnaketyek. Rernem artwa aler arrekantherrenh-rnem irrkaty-angkwarr arrpemarl akalty-anthekerr.

¹⁷ Ingwerel-rnem gold rwel arrtyemel irrng-werretiyek, altyerr-arrpanney mpwaremel ikwernpenh. Alakenh mpwarey-angenh arrantherr anetyek.

¹⁸ Amern ilperr-ilperr-akert arrantherr kwenty arlkwetyek inkwerelhemel, kwenty itna 'Amern ilperr-ilperr'. Arlta 7-ek-atwety arrantherr amern ilperr-ilperr arlkwetyek pikinpat-weny, atharl ilek-angkwarr-antey. Arrantherr alakenh mpwaretyek alkent Abib ikwerel-antey aherrety arrpanenhel. Arrantherr amern ilperr-ilperr renh kwenty arlkwayntetyek, arrantherr iterretyek Abib ikwerel, Egypt-theyarl anperl-alhekan.

¹⁹ Avey arrwekeleny-rnem-then atnwenth irrwey arrwekeleny-rnem-then rernem atyenh ingkerrenh. ²⁰ Tangkey arrwekeleny ntwa apek iteth atnyenetyek, yep-yep akelyant antha atyeng. Arrangkwel apek, tangkey renh akertemal atwetyek. Arrantherr aler awey arrekantherrenh arrwekeleny-rnem ingkerrenh payemeletyek atyeng-they. Ingwerenty rtnemel

angkenty atyeng-warl, ra ayenh aker tyenkerr antheynetyek-tangkwel.

²¹ Arlta 6-ek-atwety warrkIRR-ayntetyek, arlta 7-el ltyerretyek warrkirrey-angenh. Ahern angerney-angenh, ntang ineyney-angenh, ikwerkety ltyerretyek-antey. Menty anetyek arlta ikwerel.

²² Aherrety arrpanenhel arrantherr kwenty arlkwayntetyek itna Pentecost ikwerel. Ntang weyt arrwekeleny-penh arrantherr atyeng anthetyek. Ingwer-inger arrantherr kwenty ingwer arlkwayntetyek, ntang weyt ingkern-penh arrantherr atyeng anthetyek. ²³ Aherrety arrpanenhel irrpety-inger artwernem ingkerrenh rernem akarirretyek arrwekelantey atyeng. Ayeng INGKARTarl, Akngey innga Israel-kenh-rnem-kenh. ²⁴ Arrantherr aherrety arrpanenhel irrpety-inger atyeng-warl apetyenty, atha Canaan-areny-rnem arrwekelantey apmer ikwer-they irrentem. Atha arrenhantherrenh apmer akngerr arrpemarl anthem. Nthakenh ingwer-rnemel apmer renh angkep rakeyney-angenh arrekantherr-they.

²⁵ Arrantherr aker atyeng anthenty, amern tyenkerr-then. Amern pikinpat-weny ayenh anthetyek. Arrantherr yep-yep renh attwentyel, tyenkerr itna Anperarl Alhek ‘Passover’, aker tyelk arrerney-angenh ingwepenhek-atwety. Arrantherr rwel arrtyetyek ingkerrenh-antey. ²⁶ Aherrety arrpanenhel, ntang weyt arrwekelarl lyapek akngetyenHerr-arey, kalikw atyenh-warl, amern tyenkerr mwerr-angker ayenh anthetyek.

Nanikwet akely apek ampernenty arrantherr, amikw ikwerenhen aylpatel arrtyey-angenh."

²⁷ INGKART angkek Moses-warl, "Ingkwerneyek angka nhenh. Alakenh atha ngenh alheleyel, Israel-kenh-rnem arrantherr atyenh-rnem intem-antey anayntetyek." ²⁸ Moses INGKART-itwek anenh, arlta 40-ek-atwety. Amern arlkwey-angenh kwaty antywey-angenh. Apwert ilperr-ilperr atherr-warl INGKARTel ingkwernek angkernem 10, rernem aleth-antey apenterl-ayntetyek.

Moses apwert Sinai-they atwarrelhenhey-alpeyel inngeerr amparrkenh

²⁹ Moses-anem apwert Sinai-they atwarrenhey-alpenh, apwert ilperr-ilperr atherr-akert iltylek akngey-alpenh. Moses inngeerr amparrkenh, ra Akngey-itwek angkenh-penh. Ra iterl-arelhey-angenh inngeerrarl amparrkenh. ³⁰ Aaron-then Israel-kenh-rnem-then rernem inngeerr Moses arek amparrkenharl. Rernem ikwerety aterirrek. Alakenh-they rernem arrer-warl alhey-angenh ikwer-warl. ³¹ Moses ikwer-rnemek atayel arlek, "Atyengety aterirrey-angenh! Arrer-warl apetyenherr-arey!" Aaron artwamp-rnem-then arrer-warl ikwer-warl apetyek. Ra ikwer-rnem angkek. ³² Ikwer-penh ingkerr-anem Moses-warl arrererrenhey-alhek. Ra ikwer-rnem angka ilenh, INGKARTelarl apwert Sinai-itwek renh ilek. ³³ Moses ikwer-rnem-warl angkek-penh, ra inngeerr-anem arnkwa akelyel artelhek. ³⁴ Moses ra kalikw-warl aylpenh aleth INGKART-warl ayernetyek.

Ra arnkwa akely apmelerr lhelenh, INGKART-warl angkey-alhenty. Ra kalikw iwerl-alhenh, apmer-warl alpenh, ra ingkerrenhek iley-alpenh, INGKARTel ilek-angkwarr. ³⁵ Ingkerrenhel renh arey-ayntenh, inngerr Moses amparrkenharl. Ikwer-penh ra inngerr apmelerr artelhenn-anem arnkwa akely ikwerel. ...

40

Kwenpay INGKART-kenh-anem ra kalikw impen arteyel

³⁴ ... Moses-el kalikw impen artek. Ra ampwal impen-rnem ingkerrenh akwernek Akngeyel renh ilek-angkwarr. Moses-el warrk ywerrelhilek-penh, kwenpay INGKART-akert alker-they apetyek, kalikw impen artek. INGKART-kenh lyenentyel kalikw kwen alhernek. ³⁵ Kwenpayel iwerr arrngelek, Moses nthakenh kalikw-warl kwen aylpenhey-angen.

³⁶⁻³⁷ Kwenpayel kalikw-itwek artenhel-antey, Israel-kenh-rnem apmerel-antey anenh. Kwenpay rarл anperl-alhenh, Israel-kenh-rnemel kwenpay renh apentenh, apmer ingwer-warlanem. ³⁸ Alakenh-anyem innga. Itwernek kwenpayel kalikw artenh. Ingwelan kwenpay amparrkenh rwapenyarl. Israel-kenh-rnem apmer arrpanenh-warl alpenhel, rernem kwenpayan kalikw-itwek arenh.

**Alyawarr Bible
Portions of the Holy Bible in the Alyawarr language
of Australia**

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 9 Mar 2024 from source files dated 10 Nov 2023

284d4e02-292d-5bd8-a8a6-8360a307b937